

# KAMEETHARI ÑAANTSİ ROJANKINATAKIRI JUAN

---

## Ratziritaki iiteetziri “Ñaantsi”

**1** <sup>1</sup>Owakira etantanakari rowetsikan-teetzi paerani, tema tzimitaka iiteetziri “Ñaantsi.” Ari itsipatari Tajorentsi. Tema rijatzi Tajorentsi rirori. <sup>2</sup>Riitaki itsipatakari paerani Tajorentsi owakira etantanakari. <sup>3</sup>Riitaki owetsika-jaanta-kirori maawoeni tzimayita-tsiri. Tekatsira apaani okaatzi tzimayita-tsiri kaari rowetsiki rirori. <sup>4</sup>Ikimi-waetakari koñeentyaatsiri ikoñeetyaa-koteeri atziripaeni omatantee-yaari rañaakaayiteeri. <sup>5</sup>Roshiya-kota-paakari koñeetyaa-kotan-tatsiri otsireni-kaakitzira. Teemaeta rotsinampaeri roetsiwaka-wakiri oshiyakawori tsirenikaakiri.

<sup>6</sup>Paerani rotyaantaki Tajorentsi apaani atziri, iita Juan. <sup>7</sup>Riitaki kenkitha-takota-paakiriri iiteetziri “Koñeetyaatsiri,” omatantyaari ikemijanteetero maawoeni riyotaanteri. <sup>8</sup>Irika Juan kaarira iiteetziri “Koñeetyaatsiri.” Tema riitaki kenkithata-koterini pokatsini.

<sup>9</sup>Tema pokaki jaka kepatsiki maperotzirori roshiya-kotari koñeetyaatsiri, riitaki koñeetyaa-koteerini maawoeni atziripaeni. <sup>10</sup>Ijeeka-paentzi kepatsiki. Tema riitaki owetsika-kirori kepatsi. Roo kanteencha tee riyotawakiri atziripaeni ikaatzi jeekatsiri kepatsiki. <sup>11</sup>Ijeekimowita-paentari ikaatzi isheninkata-wakahaeayani. Teemaeta raakameethata-wakiri. <sup>12</sup>Riima ikaatzi aakameethata-wakiriri, awentaa-naariri, riitytaki itomiyitaari Tajorentsi.<sup>a</sup> <sup>13</sup>Riitaki itomintayitaari Tajorentsi irika-paeni. Tee oshiyawo itominta-piinta-yitee atziri-paeni, teera iñaaman-kakiini itzimantayitakaeri. Tema riitaki Tajorentsi kowashiteen-chari itomitantyaa.

<sup>14</sup>Irika iiteetziri “Ñaantsi,” ratziritaki, ijeekimoyita-paentee. Osheki ikaminthaantzi rirori. Kyaari-perori iñaanitari. (Naaka-paeni ñaajaanta-kirori itajorenka, ari oshiy-a-jaantawo itajorenka rapintzite itomi Ashitariri.) <sup>15</sup>Riitaki cheraa-wenta-paakiriri paerani Juan, ikantapaaki:

---

<sup>a</sup> **1.12** Waerontsi

“Irika nokenkithata-kotziri paerani, nokantaki: ‘Awotsikitaki poyaatenani, rawijana naaka, tema riitaki etakawori paerani tekira notzimiita naaka.’”<sup>16</sup> Tema kameetha-pero-taki rirori, rootaki añaanta-yitaawori maawoeni aakapaeni ikaminthaa-pero-ta-piintee.<sup>17</sup> Paerani riitaki Moisés rojankinata-kaetakiri Ikantakaan-teetani. Riima Jesús Jeepatzii-toetani, riitaki neshironka-yiteeri, rijatzi ñawaaya-ita-paentzirori kyaari-perori.<sup>18</sup> Tekatsi materoni iñeeri Tajorentsi. Riima rapintzite itomi Ashiteeri, jeeki-moperotziriri, riitaki kamanta-yiteeri aakapaeni ayotantaari jempe ikanta Ashiteeri.

### **Ikamantan-takiri Juan Omitsiryaatantaniri**

*(Mt. 3.11-12; Mr. 1.7-8; Lc. 3.15-17)*

<sup>19</sup> Ikanta Judá-paeni nampitawori Aapatziyaweniki, rotyaantaki reewarite-paeni Ompera-tajorentsitaarewo ejatzi Leví-paeni rojampiteri Juan, ikanteri: “¿Jempema piitaka eeroka?”<sup>20</sup> Iroka ikantanaki Juan, tee romana-kotyaa, ikantzi: “Tee naaka Jeepatzii-toetani.”<sup>21</sup> Eekiro rojampitee-tatziiri, ikantee-tziri: “¿Jempema piitaka? ¿Eerokama Kamantan-taniri Elías?” Ikantzi Juan: “Tee naaka.” Eekiro ikantee-tatziiri: “¿Eerokama Kamantan-taniri pokatsini?” Ikantzi: “Tee.”<sup>22</sup> Ari ikantee-tziri: “¿Jempema piitatyaaka eeroka? Pikamantena, rootaki nokanta-paeriri naaka otyaanta-kinari. Anjatyaa pikamanta-kotyaa.”<sup>23</sup> Ikantzi Juan: “Naakataki cheraapaen-tsini ochempi-mashiki, ikante: ‘Powameethateeniri Awinkatharite jempe ikinapaaki, poshiya-kaantero itampatzikae-tziro awotsi.’ Rootaki ikamantan-tzitakari paerani Kamantan-taniri Isaías.”

<sup>24</sup> Irika-paeni pokaentsiri rojampitziri Juan, rotyaantani Inashitantaniri-paeni.<sup>25</sup> Eekiro rojampita-tziri, ikantziri: “Tee eeroka Jeepatzii-toetani, tee eeroka Elías, tee eeroka Kamantan-taniri. ¿Litaka pomitsiryaatantari?”<sup>26</sup> Ikantzi Juan: “Apatziro nomitsiryaatantawo naaka njaa. Roo kanteencha tzimatsi apaani jakä pitsipatakari, kaari piyoteeyini.”<sup>27</sup> Riitaki poyaatenani naaka, rawijanakina naaka. Tee okantya roshiya-kaantena naaka romperatani noeyotashitan-tyaari nothopaeniri ikyaatari iitziki.”<sup>28</sup> Rootaki awijayiteen-tsiri paerani intatsikironta Pareenkaariniki iiteetziro Ashironkaaweniki jempe romitsiryaatantzi Juan.

### **Ipira Tajorentsi**

<sup>29</sup> Okanta okitejeta-manee, iñaawaeri Juan ikinapae Jesús, ikantzi: “¡Irika ipira Tajorentsi, riitaki atsipetee-yaawoni iyaari-peronka maawoeni atziripaeni, ipeyakoe-tantee-yaariri!<sup>b</sup>”<sup>30</sup> Riitaki nokenkithata-

<sup>b</sup> 1.29,36 ipira = cordero

kotakiri paerani nokantaki: ‘Awotsikitaki atziri poyaateenani naaka, rawijana, tema riitaki etakawori tekira notzimiita naaka.’<sup>31</sup> Tee niywitari naaka. Rootaki nopolan-takari nomitsiyaa-tantyaawo nijaa, rootaki riyotan-tenari maawoeni Israel-paeni.”<sup>32</sup> Eekiro ryaata-kaana-kitziiro Juan ikamantantz, ikantzi: “Noñaakiri naaka Ishire tajorentsi ikinapaaki jenoki roshiyakari jamomo, rookanta-paakari rirori.<sup>33</sup> Tee niywitari naaka. Roo kanteencha irika otyaanta-kinari nomitsiryaaatan-tyaawo nijaa, ikantakina: ‘Aririka piñaakiri rayiita-shitakiri Ishire tajorentsi, itzimi-rika rookanta-paakyaari, riitaki kimitakaantemironi romitsiryaaatan-temiro Ishire tajorentsi.’<sup>34</sup> Naakataki ñaakiriri, rootaki nokenkithata-kotan-tariri riitaki Itomi Tajorentsi.”

### **Etanakawori riyotaani Jesús**

<sup>35</sup> Okanta okitejeta-manee ari ijeka-manee Juan eejatzi apite riyotaani. <sup>36</sup> Ikanta iñaawaeri Jesús ikinapae, ikantzi Juan: “Irinta ipira Tajorentsi.” <sup>37</sup> Ikanta ikemawaki apite riyotaani Juan, royaata-nakiri Jesús. <sup>38</sup> Ari ipithokanaka Jesús, iñaatziri ikaatzi oyaatakiriri, ikantziri: “¿Jempema piyaateka?” Ikanteeyini rirori: “¡Yotaanari! ¿Jempema pinampi?”<sup>c</sup> <sup>39</sup> Ikantzi Jesús: “Pipoki piñeero.” Ikanta royaatee-yanakirini, iñaakiro jempe inampitawo. Ari imaapaentzi, tema tsireniityaaki.<sup>d</sup> <sup>40</sup> Tema irika kemakiriri Juan, oyaatana-kiriri Jesús, riitaki Andrés rirentzi Simón Pedro. <sup>41</sup> Tema apatziro Andrés ryaata-shita-nakiri Simón, rirentzi ikantapaakiri: “Noñaakiri Jeepatzii-toetani (roo ikantee-tziri eejatzi, ‘Cristo.’)”<sup>e</sup> <sup>42</sup> Ikanta Andrés raanakiri Simón ijekira Jesús. Ikanta iñaawakiri Jesús rirentzi Andrés, ikantawakiri: “Eeroka Simón, itomi Jonás. Nimaeka piiteeyaa ‘Kijori’.” (Roo ikantee-tziri eejatzi, Pedro.)<sup>f</sup>

### **Ikaemae-takiri Felipe eejatzi Nataneel**

<sup>43</sup> Okanta okitejeta-manee, jataki Jesús Tepoweniki. Ari iñaapaa-kiriri Felipe, ikantapaakiri: “Poyaatena.”<sup>44</sup> Tema irika Felipe, Shimapankoni-jatzi, rootaki inampi Andrés eejatzi Pedro. <sup>45</sup> Ikanta Felipe, ryaata-shita-nakiri Nataneel, ikantapaakiri: “Noñaakirira rojankinata-kotakiri Moisés Ikantakaan-teetaniki, riiyatzi rojankinata-kotzitaka eejatzi Kamantan-taniripaeni. Riitaki Jesús, itomi José, Kashiyakaa-weni-jatzi.”<sup>46</sup> Ikantzi Nataneel: “¿Eenitatsima kameetha-shireri janta Kashiyakaa-weniki?” Ikantzi Felipe: “Pipoki, piñeeri.”<sup>47</sup> Ikanta iñaawakiri Jesús ipokaki Nataneel, ikantanaki: “Kaakitaki riroperori isheninka Israel, tee itheeya-nityaa.”<sup>48</sup> Ari ikantzi Nataneel: “¿Jempema janta piñaanaka piyotan-tanari?” Ikantzi Jesús: “Noñiitakimi tekira ikaemimiita

<sup>c</sup> 1.38,49 Yotaanari = Rabí    <sup>d</sup> 1.39 tsireniityaaki = riwuyaaka ooryaa 10. (Ari okanta riyotee-tziri ooryaa paerani.)    <sup>e</sup> 1.41 Jeepatzii-toetani = Mesías    <sup>f</sup> 1.42 Kijori = Cefas

Felipe pijeeki otsimankaetyeera pankirentsi.”<sup>g</sup> <sup>49</sup> Ikantanaki Nataneel: “¡Yotaanarí! ¡Eerokataki Itomi Tajorentsi, eerokataki Iwinkatharite Israel-paeni!” <sup>50</sup> Ikantzi Jesús: “Rootaki pikemijatanta-matsita-nakari nokantakimi noñaakimi pijeeki otsimankaetyeera pankirentsi. Roo kanteencha, aritaki piñaaki otsipa awijironi iroka.” <sup>51</sup> Eekiro ikantana-kitzii Jesús: “Ari piñaakiro ashitareeya inkite. Ari ipiya-piyateeyini ronampiripaeni tajorentsi rayiita-shiteri Itomi Atziri.”<sup>h</sup>

### Aawakahaantsi Nampitsiki Menkoshiniki

**2** <sup>1</sup> Okanta mawatapaen-tsiri kitejeri ari raawakae-takari nampitsiki <sup>2</sup> itachari Menkoshini, jeekatsiri Tepoveniki. Ari ojeekakiri ejatziri riniro Jesú斯 janta. <sup>3</sup> Ari ikaemakaan-teetakiri Jesú斯 ejatziri Riyotaani-paeni janta aawakahaan-tsiki. <sup>4</sup> Ikanta roemoshirenkaeyani, thaatapaaka imiritee-yirini. Okanta riniro Jesú斯, okantakiri otomi: “Thaatapaaka imiriteetziri.”<sup>i</sup> <sup>5</sup> Ikantzi riori: “¡Tsinani! ¡Litaka pikantan-tanari naaka? Tema tekira omonkaa-paetetyaata noñaahan-tantyaa.” <sup>6</sup> Okantanakiri roori ikaatzi kitanta-tsiri: “Pantero okaate ikantemiri notyomi.” <sup>7</sup> Ari owayitaka janta <sup>8</sup> chomo mapinakitsiri, rootaki rowanta-piintari Judá-paeni nijaa, roojatzsi ikewayitantari rantakiro-rika ipinkae-tsiri. Iroka chomo, eeniyitatsi iyomaatachari apite ikaanteetari nijaa, otsipa mawa ikaanteetari.<sup>j</sup> <sup>9</sup> Ikantanakiri Jesú斯 ikaatzi kitanta-tsiri: “Piyeekite nijaa maawoeni chomoki.” Imatakiro riyeeki-pero-yitakiro chomokipaeni. <sup>10</sup> Ipoñaa ikantzi Jesú斯: “Pinkitera eepichokiini amiri, paanakiniri aminakaan-tzirori oemoshirenkaantsi.” Imatakiro ikantee-takiriri. <sup>11</sup> Ikanta irika aminakaan-tzirori oemoshirenkaantsi iñaan-tawakawo eepichokiini imiriteetziri nijaawita-chari, tee riyotzi jempe okina-kota-paaki rooperori imiriteetziri. Apatziro riyoteeyini kitanta-tsiri, tema riyyitaki yekikatirori nijaa. Ikanta aminakaan-tzirori oemoshirenkaantsi, ikaemakiri aawakaa-chari, <sup>12</sup> ikantziri: “Rootaki rameyitari atziri-paeni retapiintawo ipakotan-tziro rooperori imiriteetziri, aririka ikemaeyanakaani oemoshirenka-chari, ari ipakotan-teetero jentaa. Rooma eeroka powaan-tawakawo rooperori imiriteetziri roojatzsi nimaeka.” <sup>13</sup> Rootaki etanakawori roñaahan-tziro Jesú斯 nampitsiki Menkoshiniki janta Tepoveniki, ari retanakawori itajonka-wentantzi roñaahan-tzirori ishintsinka. Ari ikemijanta-perota-nakiri Riyotaani-paeni.

<sup>12</sup> Ikanta okaatapaaki roemoshirenkaeta, jatanaki nampitsiki Capernaum, itsipata-naawo riniro, rirentzi-paeni, ejatziri Riyotaani-paeni. Tee ojamani ijeka-paentzi janta.

<sup>g</sup> 1.48 pankirentsi = higuera    <sup>h</sup> 1.51 ashitareeya inkite = iñeeteri inkite-jatzi, kaari iñeeta-piintetsi.    <sup>i</sup> 2.3 imiriteetziri = vino    <sup>j</sup> 2.6 apite ikaanteetari = 50 litro; mawa ikaanteetari = 70-100 litro

**Romishito-yiri Jesús pimanta-yitatsiri tajorentsi-pankoki**  
*(Mt. 21.12-13; Mr. 11.15-18; Lc. 19.45-46)*

<sup>13</sup> Okaakitzi-matee roemoshirenka-piintan-tawori Judá-paeni Anonkoryaantsi. Jataki Jesús Aapatziyaweniki. <sup>14</sup> Iñaapaakiri tajorentsi-pankoki pimantayitziriri ipira-paeni, eejatzi ijamomote-paeni. Ari ijeekayitakiri iyomparitariri koriki.<sup>k l</sup> <sup>15</sup> Ikanta iñaapaakiri, raminthataki Jesús ipaja-mento, romishitowakiri maawoeni iyomparita-chari tajorentsi-pankoki, itsipataakiri ipira-paeni. Rojokitakiri iyorikite ikaatzi iyomparitariri koriki, rotatsinki-takiri okaatzi rowanta-yitariri. <sup>16</sup> Ikantakiri Jesús pimantziriri ijamomote: “¡Paaneeri pipira! ¡Tee okameethatzi piyompari-pankotyaawo ipanko Ashitanari!” <sup>17</sup> Ari ikenkishiryaa-nakiro riyotaani okaatzi rojankinee-takiri paerani, ikanteetzi:

Antawo nokija-kotyaawo pipanko.

<sup>18</sup> Ikanta Judá-paeni ikantanakiri Jesús: “Anjatyaa poñaahante kaari iñaapiinteetzi niyotan-tyaari omaperotatyat otzimi pishintsinka pimatan-takawori pomishitowantzi.” <sup>19</sup> Ikantzi Jesús: “Pipookiro iroka tajorentsi-pango, roo awijawitakyya mawa kitejeri, aritaki nopiriinteero eejatzi.” <sup>20</sup> Ikanteeyini Judá-paeni: “Tema okaatzi 46 ojarentsi rantawaeteetaki rowetsikan-teeta-kawori iroka tajorentsi-pango, ¿arima pitzinahaero eeroka okaate mawa kitejeri?” <sup>21</sup> Iroka “tajorentsi-pango” ikenkithata-kotakiri Jesús, roo ikantakowita iwatha rirori. <sup>22</sup> Ikanta rañahaera paerani Jesús, ikenkishiryaa-neero riyotaani-paeni ikenkithata-kotzi-takari. Rootaki ikematha-perotan-tanakawori Jankina-rentsi, eejatzi okaatzi ikantayitakiri Jesús.

**Maawoeni ryoshiretziri Jesús**

<sup>23</sup> Tema eeniro ijeeki Jesús Aapatziyaweniki roemoshirenkae-tziro Anonkoryaantsi, osheki kemijanta-nakiriri iñaayitakiri itajonka-wentantaki.<sup>m</sup> <sup>24</sup> Roo kanteencha Jesús, tee rawentaa-yitari irika atziri-paeni, tema ryoshiretziri maawoeni. <sup>25</sup> Tema tekatsi kamantawityaarini Jesús jempe ikanta-shireyitzi atziri, tema ryoyitziri rirori ishireki.

**Jesús eejatzi Nicodemo**

**3** <sup>1</sup>Eenitatsi Inashitantaniri iita Nicodemo, riiperori Judá-paeni irika. <sup>2</sup>Ikanta riyaataki tsireniki Nicodemo iñeeri Jesús. Ikantapaakiri:

---

<sup>k</sup> 2.14,15 ipira-paeni = buey, owisha (oveja)    <sup>l</sup> 2.14 Ikaatzi pokayita-tsiri Aapatziyaweniki, ramayitzi iyorikite ipoñaakaa-yitari inampiiteki rirori. Roo okowantari ryomparityaari iyorikite Aapatziyaweniki, okantyaar ramanantan-tyaari tsimeri-paeni ipomete-niriri Tajorentsi    <sup>m</sup> 2.23 Waerontsi

“¡Yotaanaí! Niyoteeyini naaka riitaki Tajorentsi otyaantakimiri piyotaa-yiten, tema tekatsi materoni okaatzi poñaahan-takiri eeroka eerorika itsipa-shiretari Tajorentsi.”<sup>n</sup> <sup>3</sup> Ari rakanaki Jesús, ikantziri: “Pikemi nokantemi. Itzimi-rika kaari apiiteeroni itzimae, eero iñeero ipinkathari-wentantee Tajorentsi. Omaperotatya.” <sup>4</sup> Ikantzi Nicodemo: “¿Kantachama rapiiteero itzimae atziri antyashipariteen-tsiri? ¿Arima omateeeya ikyahae omotziki riniro rapiitan-teeyaawori itzimae?” <sup>5</sup> Ikantzi Jesús: “Itzimi-rika kaari kimitakaan-teroni itziman-teeyaawomi nijaa, kaarira otzimashiretakaa-yiteeri Ishire tajorentsi, eero iñeero ipinkathari-wentantee Tajorentsi.” <sup>6</sup> Ikaatzi rowakaantziri atziri, atzirira irika. Riima ikaatzi kimitakaan-tanaawori itziman-teeyaawomi Ishire tajorentsi, tajorentsi-shire-tanee. <sup>7</sup> Eero pipampoyaa-wentziro okaatzi nokanta-kimiri: ‘Okowa-perotatya papiiteero pitzima-yitee.’ <sup>8</sup> Oshiyatyaawo tampyaa otajonka-piintzi jempe okoyiro. Pikemawitawo opoematzi, temaeta piyotzi jempe-rika okinapaaki, jempe-rika iyaatziro. Ari ikimitari eejatzi ikaatzi itzimashiretakaa-yiteeri Ishire tajorentsi.” <sup>9</sup> Ari rapiita-nakiro Nicodemo rojampitziri, ikantziri: “¿Jempema okanta-kotaka iroka?” <sup>10</sup> Ikantzi Jesús: “Eeroka yotaayitziriri Israel-paeni, ¿tema piyotzi jempe okanta-kota iroka? <sup>11</sup> Nokenkithatee-yatzii-mironi okaatzi niyotako-yitziri. Nokenkithatee-yatzii-mironi okaatzi noñaayita-piintziri nokiki, temaeta pikemijantee-yanitzi okaatzi nokanta-yitzimiri. Oaperotatya. <sup>12</sup> Tee pikemijantena nokenkithata-kotzimiro jaawiki-jato, rootaki maperota-chani eero pikemijantana aririka nokenkithata-kotemiro inkite-jato. <sup>13</sup> Tekatsira apaani jatatsini inkiteki, apatziro ikantakaawo poñeenchari inkiteki. Riitaki akenkithata-kotziri, Itomi Atziri. <sup>14</sup> Paerani rowatzika-kotakiri maanki awaejatziteni Moisés janta ochempi-mashiki, ari ikimiteteeri eejatzi Itomi Atziri, otzimathee rowatzika-koeteri rirori, <sup>15</sup> rañaantee-yaari ikaate kemijanteerini”.

### Retakotari Tajorentsi maawoeni jaawiki-jatzi

<sup>16</sup> “Tema retako-perotani royiri Tajorentsi jaawiki-jatzi, ishinetakiri rapintzite Itomi ikamawenteeri, rootaki eero ikaamanitantaan ikaate kemijanteerini, ashi rowaero rañaayitee. <sup>17</sup> Tema Tajorentsi tee rotyaantziri Itomi jakä kepatsiki riyakowenteeri jaawiki-jatzi, tema ikowatzii rowawijaa-koyiteeri. <sup>18</sup> Ikaate kemijanteerini Itomi Tajorentsi, eero riyakowentee-tziri. Riima kaari kemijanteerini, tema ari

<sup>n</sup> 3.2 Yotaanarí = Rabí      <sup>o</sup> 3.5 Okaatzi kenkithata-kota-chari jakä “kimitakaan-teroni itziman-teeyaawomi nijaa,” eenitatsi oshiyakaa-wenta-yitachari: (1) Eenitatsi kantatsiri riitaki kenkithata-kotacha ikaatzi omitsiryaaanaa-chari roshiya-kaanteero ikewatyeromi ikaaripero-yitaki. (2) Eenitatsi kantatsiri rootaki kenkithata-kotacha itzimaari eenchaaniki. (3) Eenitatsi kantayita-tsiri riitaki kenkithata-kotacha Ishire tajorentsi, tema anaapiintakiri Ishire tajorentsi roshiya-kaawentee-tziri nijaa.

riyakowentee-takiri, okantakaan-tziro tee ikemijanteeri rapintzite Itomi Tajorentsi.<sup>p</sup> <sup>19</sup> Maawoeni kaari kemijanta-tsini, aritaki riyakowentee-takiri, tema ranta-piintakiro kaari-perori. Tema ipokawita-paenta paerani kepatsiki iiteetziri ‘Koñeetyaatsiri,’ roo ikowa-perotee-tanaki tsireniri, imaninta-wakiri ‘Koñeetyaatsiri’, <sup>20</sup> maawoeni antayitzirori kaari-perori ikijaneenta-tziri iiteetziri ‘Koñeetyaatsiri.’ Ikoementa-waeta eero rirotakoe-tantari rantayitziro kaari-perori. <sup>21</sup> Riima antapiinta-neerori kyaari-perori, rawentaa-perota-naari ‘Koñeetyaatsiri,’ rootaki iñahaetan-tyaariri rantawae-tanaatziniri Tajorentsi.”

### Raapatziya-minthari iimenteetari

<sup>22</sup> Ikanta ikinanee Jesús iipatsiteki Judá-paeni itsipayita-naari riyotaani, ari itsipatakari romitsiryaatantzi. <sup>23</sup> Imatzitakawo Juan romitsiryaatantzi rirori Apinyaateki, jempe okaakitapae Aapatziyaarini, tema janta ari otzima-perotziri nijaa. Ikaatzi jatayiteen-tsiri janta, romitsiryaa-yitawakiri. <sup>24</sup> Tema tekira raakaan-teeteriita Juan romonkyahaeteri.

<sup>25</sup> Ikanta riyotaani-paeni Juan iñaana-minthatakiri Judá-paeni jempe okanta-kota ikitewa-thatan-teeyaaari rantayitziro ipinkae-tziri.

<sup>26</sup> Ari riyaatee-yakini ijekira Juan, ikantapaakiri: “Yotaantanari, irinta tsipatzimiri intatsikiro eni Pareenkaarini, pikenkithata-kotakinari, romitsiryaan-tatzii rirori, osheki atziri pokashitakiriri.”<sup>q</sup>

<sup>27</sup> Ari rakanaki Juan, ikantzi: “Jempe ikanta piñaakiri irika, teera opoñaashi-waeta, riitaki Tajorentsi riiperota-kaakiriri. <sup>28</sup> Tema eeroka-paeni kemakinari nokantaki paerani: ‘Tee naaka Jeepatzii-toetani, apatziro rotyaantee-takina neewata-paakiri nokenkithata-kotakiri.’

<sup>29</sup> Jame noshiya-kaanta-wakiro aawakaa-chari, riitaki aapiintziro tsinani iimenteetari. Riima itsipa-minthatani, eero ikosheka-waeta rirori, apatziro ikimo-shiretanaki ikemakiri-rika iñaawaetanaki iiminentsi. Ari nokantari naaka, tee niriipero-waetzi, roo kanteencha antawo nokimo-shiretanaki. <sup>30</sup> Tema eekiro riyaatayee ririiperote irika, rooma naaka ari nopeyakoetyaanakyaa.”

### Poñeenchari jenoki

<sup>31</sup> “Irika poñeenchari jenoki rawijiri maawoeni. Riima nampitawori kepatsiki, jaawiki-jatzira irika, ikenkithata-shita-piintawo jaawiki-jato. Riima poñeenchari inkiteki rawijiri maawoeni, <sup>32</sup> ikenkithata-kotziro okaatzi iñiri, okaatzi ikemiri. Roo kanteencha eero ikemijanteetee-tziro okaatzi ikenkithata-kotziri. <sup>33</sup> Roo kanteencha ikaate kemijanta-neerini irika, aritaki imatanakyaa rirori ikenkithata-kota-nakiri Tajorentsi

<sup>p</sup> 3.18 Waerontsi    <sup>q</sup> 3.26 Yotaantanarí = Rabí

kyaariperori. <sup>34</sup>Irika rotyaantakiri Tajorentsi, iñaani Tajorentsi ikenkithata-kote. Tema Tajorentsi ithonkiro ijeeka-shireta-kaantantawo Itajorenka. <sup>35</sup>Irika Ashiteeri retakotari Itomi, ipinkatha-ritakaakiri maawoeni tzimayita-tsiri.

<sup>36</sup>Itzimi-rika kemijanta-neerini Itomi, aritaki rañahae. Riima kaari kemijanteerini Itomi, eero rañahae rirori, apatziro ratsipetee-yaawo rowajankitahaeri Tajorentsi.”

### Jesús eejatzi Oshitekii-toni-jato

**4** <sup>1</sup>Okanta paata riyotaki Jesús ikemaeyakini Inashitantaniri-paeni, ikanteetzi: “Tzimaki osheki riyotaani Jesús, romitsiryaaataki osheki atziri, rawijanakiri Juan.” <sup>2</sup>(Kaarira Jesús omitsiryaa-tantatsini, tema riyotaani-paeni omitsiryaaatan-tatsiri.) <sup>3</sup>Rootaki ipiyantaari Jesús Tepoweniki ijekawitaka iipatsiteki Judá-paeni. <sup>4</sup>Otzimatiyee ikinaneero Oshitekii-toniki jempe eenta-thakitzi. <sup>5</sup>Roojatzi rareetantakari nampitsiki iiteetziri Shempachaari. Roo tsipa-nampitawori iipatsite Jacob, ipaneeriri itomi José ikamaera rirori Jacob. <sup>6</sup>Ari otzimiri janta njaa ikekana-takotziri paerani Jacob. Tema ayimatakiri imakoni Jesús ranashitakaha, ijeki-mota-paakiro njaa. Tema tampatzikataki ooryaa.<sup>r</sup>

<sup>7</sup>Ari opokakiri Oshitekii-toni-jato okayi njaa. Ikantawakiro Jesús: “Pipina njaa nirawaki.” <sup>8</sup>Riyaatee-yatziini riyotaani nampitsiki ramanante owanawontsi. <sup>9</sup>Ari akanakiri tsinani okantanakiri: “¿Jempe pikinakaeroka? Judá-paeni pineeyini eeroka, pomapokina pikowa-kotana nopimi njaa, naaka Oshitekii-toni-jato.” Tema maawoeni Judá-paeni tee raapatziyaari kameetha Oshitekii-toni-jatzi. <sup>10</sup>Ari rakanakiro Jesús, ikantziro: “Arimi piyote oeta ipantziri Tajorentsi, ari piyoterimi kowakota-kimiri njaa, eeroka kowakoterinimi rirori. Aritaki ipakimiromi rirori nija añaakaan-tatsiri.” <sup>11</sup>Okantanaki tsinani: “Pinkathari, tekatsira payi pikitan-tyaari njaa, inthomoeki ojeeki, ¿jempe payika pipinari nija añaakaan-tatsiri?” <sup>12</sup>¿Pawijirima eeroka awaejatziteni Jacob, paneerori iroka nija, imiritakiri paerani rirori, itomi-paeni, eejatzi ipira-paeni?” <sup>13</sup>Ikantzi Jesús: “Maawoeni miritzirori iroka nija, eero opeyaa imiri. <sup>14</sup>Riima ikaate miriteeroni nija nopantziri naaka, eero iñeero imiritee. Tema iroka nija nopaeriri naaka okimitee-yaawo nijaateni oshiyaa-shiretan-teeyaarimi, ashi rowaero rañaayitee.” <sup>15</sup>Okantzi tsinani: “Pinkathari, pipinawo naaka iroka nija, eero nomiritantaa, eero nopya-piya-waetanta nokayi nija.”

<sup>16</sup>Ikantziro Jesús: “Piyaate pikaemiri piimi, pipiyeera eejatzi jaka.” <sup>17</sup>Okantzi tsinani: “Tekatsi noemi.” Ikantziro Jesús: “Kameetha pikantaki, tee itzimi piimi. <sup>18</sup>Tema paerani tzimawitacha ikaatzi 5 piimi. Riima

<sup>r</sup> 4.6 tampatzika ooryaa = ooryaa 6. (Ari okanta riyotee-tziri ooryaa paerani.)

pitsipatari nimaeka, kaari piimi. omaperotatyā pikantakiri.”<sup>19</sup> Ari okantanaki tsinani: “Pinkatharí, kimitaka eeroka Kamantan-taniri.<sup>20</sup> Paerani nowaejatzite-paeni Oshitekii-toni-jatzi ipinkathata-piintakiri rirori Tajorentsi jaka ochempiki. Rooma eeroka Judá-paeni pikanteeyini janta Aapatziyaweniki apinkathata-piinteeeri.”<sup>21</sup> Ikantanakiro Jesús: “¡Pikemi tsinani! Rooteentsi pipinkatha-yiteeri eerokapaeni Ashiteeri, tee okowa-perota pipoki jaka ochempiki, tee okowa-perota eejatzí piyaate Aapatziyaweniki.<sup>22</sup> Omaperotatyā, tee piyotee-yawitani eeroka iita pipinkathata-piintziri. Rooma naaka-paeni Judá-paeni niyotziri nopinkathatziri. Tema apaani isheninka Judá-paeni owawijaa-kotan-tatsini.<sup>23</sup> Tema rootzi-mateentsi piñahaero. Nimaeka imateero ipinkatha-shireteeri Ashiteeri ikaatzira pinkathaperoteeriri. Tema riitaki ikowaeri rirori Ashiteeri ipinkatha-yiteeri.<sup>24</sup> Tema irika Tajorentsi riitaki eejatzí Ishire tajorentsi, kaari koñaata-tsini. Ikaate pinkatha-yiteerini, otzimathee ipinkatha-shire-pero-teeri, tee okowa-perota rantayiteero koñaayita-tsiri.”<sup>25</sup> Okantzi tsinani: “Niyotzi naaka ari ipokaki Jeepatzii-toetani, (iiteetziri Cristo.) Aririka rareetakyaa, riitaki kamanta-paakaeroni maawoeni jempe okanta-kota iroka-paeni.”<sup>s</sup><sup>26</sup> Ikantzi Jesús: “Naakataki, kenkitha-waeta-kaakimiri.”

<sup>27</sup> Ari rareetee-yapaani Riyotaani. Ipampoyeeya-paakirini iñaapaakirira ikenkitha-waeta-kaero tsinani. Roo kanteencha, tekatsi apaani ojampita-paakirini, ikanteri: “¿Oeta ojampitzimiri tsinani? ¿Oeta pikenkitha-waeta-kaerori?”<sup>28</sup> Ookanakiro tsinani ochomoni, jataki nampsiki, okantapaakiri osheninka-paeni:<sup>29</sup> “Pipokaeyini, piñeeri atziri yotakirori maawoeni nantayitakiri paerani. ¿Karima Jeepatzii-toetani?”<sup>30</sup> Ari ikowae-yanakini atziri-paeni jeekatsiri nampsiki, pokaeya-nakini ijeekakira Jesús.

<sup>31</sup> Ari ikanteeyirini Riyotaani, ikantziri: “¡Yotaanarí, poyaa!”<sup>t</sup><sup>32</sup> Ikantzi Jesús: “Eenitatsi oeta nowari naaka, tee piñeeyironi eeroka.”<sup>33</sup> Ari rojampita-wakaanaka Riyotaani: “¿Eenitatsima iita amakiniriri rowanawo?”<sup>34</sup> Ikantzi Jesús: “Rootaki nokimita-kaantari naaka nowanawo nanteniri ikoyiri otyaanta-kinari. Otzimathee amonkaateeniri ikoyiri anteeniri rirori.<sup>35</sup> Iroka pikanta-piinteeeyini eeroka: ‘Yotapaaka 4 kashiri ojampatan-tyaari pankirentsi.’ Roo kanteencha, pikemi nokantzimi. Pamini pankirentsi-mashiki, aritaki mataka jampayitaki owiitan-tyaawori.<sup>36</sup> Ikaate owiiteeroni ipineeteeri. Tema rowiiteero okithoki pankirentsi oshiyakaa-wentziriri añaayita-tsini. Rootaki ithaamentan-teeyaari pankita-kirori itsipatee-yaari owiikiteerori.<sup>37</sup> Tema omaperotatyā roshiya-kaawentee-takiri, ikanteetzi: ‘Tzimatsi apaani pankita-kirori, eenitatsi itsipa owiiteeroni.’<sup>38</sup> Tema notyaanta-yitakimi

<sup>s</sup> 4.25 Jeepatzii-toetani = Mesías    <sup>t</sup> 4.31 Yotaanarí = Rabí

eerokapaeni powiiyiteero kaari pipomeentsi-wenta pantawae-wentero. Tema tzmatsi itsipa pomeentsi-wenta-kawori rantawae-wentakiro. Eerokapaeni nintahaeyaawori rantawaetani.”

<sup>39</sup> Tema osheki Oshitekii-toni-jatzi, ashitawori inampi janta ikemijanta-nakiri Jesú斯 okamanta-paakiri tsinani, okantzi: “Riyotakiro okaatzi nantayitakiri paerani.” <sup>40</sup> Ikanta rareetee-yapaakani Oshitekii-toni-jatzi ijeekakira Jesú斯, ikanteeyapaakirini ijeeki-mota-nakiri inampiki. Roojatzi ijeekan-tanakari Jesú斯, okaatzi apite kitejeri ijeekanaki. <sup>41</sup> Eekiro ishenita-nakitzii itsipa kemijanta-neentsiri, tema riitaki kema-kiriri okaatzi ikantayitziri Jesú斯. <sup>42</sup> Ari ikantee-tanakiro tsinani: “Kemijanta-yitaana naaka, teera apatziro nokemijanteeri pikaman-tapaakina eeroka, tema naaka kemaperotakiriri okaatzi ikantayitziri. Niyotee-yakirini riitaki matzirori rowawijaa-koteeri atziri-paeni, riitaki Jeepatzii-toetani.”

### Rowawijaakoteeri Jesú斯 itomi apaani jewari

<sup>43</sup> Ikanta omonkaataka apite kitejeri ijeekapaaki Jesú斯 Oshitekii-toniki, awijanaki ryaatero Tepoweniki. <sup>44</sup> Tema riitaki Jesú斯 kanteentsiri: “Apaani Kamantan-taniri tee ipinkathatee-tziri inampi-peroriki.” <sup>45</sup> Ikanta rareetaa Tepoweniki, osheki raakameethatee-tawaeri janta, tema ari ikaataki ryaatee-yakini Aapatziyaweni roemoshirenkiro Anonkoryaantsi, iñaakiro maawoensi rantayitakiri Jesú斯 janta.

<sup>46</sup> Ari rareetaari Jesú斯 janta Menkoshiniki jeekatsiri Tepoweniki, jempe ipeyakirowanki nijaa okimita-nakawo imiriteetziri. Eenitatsi janta riiperori jewari, mantsiyateen-tsiri itomi janta nampitsiki Capernaum.<sup>u</sup>

<sup>47</sup> Ikanta irika jewari ikema-kotakiri Jesú斯 ari rareeta Tepoweniki ipoñakawo iipatsiteki Judá-paeni, ryaata-shita-nakiri iñeeri. Ikanta-paakiri, ryaate ipankoki rowawijateeniri itomi, rooteentsi ikami.

<sup>48</sup> Ari ikantanaki Jesú斯: “¿Itaka kaari pikemijanantana eerokapaeni? Pikowa-perotzi noñaayimiro kaari piñaa-piintzi, pikowa-jaantzi notajonka-wentante.” <sup>49</sup> Roo kanteencha ikantanakiri jewari: “Pinkathari, jameeta nimaeka, tekira ikamana-kiita notyomi.” <sup>50</sup> Ipoñaa ikantzi Jesú斯: “Pipiye pipankoki. Etsiyata-kotee pitomi.” Ikemijantanakitzii atziri okaatzi ikantakiriri Jesú斯, piyanaka. <sup>51</sup> Ipiya-mintheeta ipankoki, itonkiyotakari romperatani-paeni, ikantawaeri: “¡Etsiyata-kotee pitomi!”

<sup>52</sup> Rojampita-nakiri jempe riweyaaka ooryaa raryaaajeenitanaari itomi, ikanteeyini romperatani: “Chapinki, iteenkanaki ooryaa, aritaki awijanakiri ijaawamereki-waetzi.”<sup>v</sup> <sup>53</sup> Ari ikenkishiryaa-nakiro ashitariri aritaki roweyaakari ooryaa chapinki ikantakiri Jesú斯: “Etsiyata-kotee pitomi.” Rootaki ikemijanan-tanakari rirori, ari ikimitanakari eejatzi

<sup>u</sup> 4.46 imiriteetziri = vino    <sup>v</sup> 4.52 iteenkanaki ooryaa = ooryaa 7. (Ari okanta riyotee-tziri ooryaa paerani.)

maawoeni isheninka-paeni rirori ikemijanta-nakiri Jesús.<sup>54</sup> Rootaki apiteteen-tsiri roñaahan-tziro Jesús itajonka-wentantzi rareetaa Tepoveniki ipoñahaawo iipatsiteki Judá-paeni.

### Kijopookiri Shimapankoni-jatzi

**5** <sup>1</sup>Okanta paata, roemoshirenkae-yaani Judá-paeni Aapatziyaweniki. Ari riyaatz-i-takari eejatzi Jesús.

<sup>2</sup> Ari ojeekiri Aapatziyaweniki owaankanatee-tziro nijaa ikantee-tziro “Neshironka-pankoni.” Eenitatsi okaatzi 5 opanko-sheta-paeni. Roo otsipa-nampitari ashitakowontsi iieteetziri “Owisha.”<sup>w</sup> <sup>3</sup> Ari ipiyotari osheki mantsiyari, mawityaakiri, kijopookiri, ethori-waeta-tsiri. Tema omaryaa-yitaka kepatsiki royaawentawo oshewaatyaa nijaa. <sup>4</sup> Ikanteetzi inatziira ipoki ronampiripaeni tajorentsi ishewaata-kaero nijaa, itzimiri-ka etanakyaawoni ipiinkaatan-tyaawo nijaa oshewaataha, aritaki retsiyata-kotee imantsiya-waetzira.<sup>x</sup> <sup>5</sup> Eenitatsi janta apaani mantsiyari okaatzi 38 ojarentsi imantsiya-waetaki. <sup>6</sup> Ikanta iñaapaakiri Jesús romaryaaka irika mantsiyari, riyotapaakiri osheki rojamanitakotaki imantsiya-waetaki, rojampita-paakiri, ikantziri: “¿Pikoyi petsiyata-kotee?” <sup>7</sup>Ikantzi mantsiyari: “Tekatsi owiinkinani nijaaki aririka oshewaa-paetetyaa. Tema nokowawita-piinta nopiinkaatemi, ranaakowaetanikina itsipa ipiinkaataki rirori.” <sup>8</sup> Ikantzi Jesús: “Pipiriinte, paaneero pomaryaa-mento, piyaatee.” <sup>9</sup> Apathakirotanaa retsiyata-kotanee irika atziri, raaneero romaryaaa-mento, anashitanaa. Tema irooka kitejeri imakoryaan-teetari, <sup>10</sup>ikantakiri Judá-paeni irika atziri etsiyata-kotaatsiri: “Kitejeri irooka imakoryaan-teetari nimaeka, tee oshinetaantsitzi paaneero pomaryaa-mento.” <sup>11</sup>Ikantzi etsiyata-kotaas-tsiri: “Tema ikantatyaaa etsiyata-kota-kahaanari: ‘Paaneero pomaryaa-mento, piyaatee.’” <sup>12</sup> Ari rojampita-nakiri Judá-paeni, ikantziri: “¿Itzimika kantakimiri: ‘Paaneero pomaryaa-mento, piyaatee?’” <sup>13</sup> Roo kanteencha irika etsiyatakotaa-tsiri, tee riyotzi jempe itzimi etsiyata-kota-kahaeriri, tee iñaawaeri jempe ikinanaki Jesús, tema osheki atziri piyoteen-chari janta. <sup>14</sup> Okanta janta tajorentsi-pankoki iñahaeri Jesús retsiyata-kota-kahaeriri, ikantziri: “Tema etsiyata-koteemi nimaeka, eero papiiteero panteero kaari-perori, omaperotzimi-kari kowaenka-perota-tsiri.” <sup>15</sup> Ari riyaatanaki etsiyata-kotaa-tsiri, ikamantakiri Judá-paeni riitaki Jesús etsiyata-kota-kahaeriri. <sup>16</sup> Rootaki retanta-nakawori ikijaneentziri Jesús, okantakaan-tziro retsiyata-kota-kaantaki kitejeri imakoryaan-teetari. <sup>17</sup>Roo kanteencha ikantzi Jesús: “ashi royiro rantawaetzi Ashitanari, ari nokimitzita naaka nantawaetzi.” <sup>18</sup> Rootaki ikowa-perotantari Judá-

w 5.2 Neshironka-pankoni = ikantee-tziro iñaaniki Heber-paeni Betesda; Owisha = Oveja

x 5.4 Otsipayita ñaantsi-paeni

paeni rowamayiri Jesús, tema tee apatziro rantawaetantawo kitejeri imakoryaan-teetari, tema roshiya-kotakari Tajorentsi, ikantaki Jesú: “Riitaki Tajorentsi ashitanari.”

### **Ishintsinka Itomi Tajorentsi**

<sup>19</sup>Ari rakanaki Jesú, ikantzi: “Irika Itomi Tajorentsi, tee rantziro ikowashi-yitari rirori. Apatziro rantziro okaatzi iñaakotziriri Ashitariri. Tema okaatzi rantziri Ashitariri, roojatzi rantziri Itomi. Omaperotaty. <sup>20</sup>Tema retakotari Ashitariri irika Itomi, roñaayiri maawoeni rantayitziri rirori. Eekiro roñaaha-tyeeri oeta-rika antawoyita-tsiri, tema ari pipampoyaawenteero eerokapaen. <sup>21</sup>Ikimitaha Ashitariri rowiriinta-yitziri kaminkari, rañaakayiteeri, aritaki ikimi-tzitari Itomi rirori, rañaakaa-yiteeri ikoyiri. <sup>22</sup>Tee riyakatantzi Ashitanari, riitaki ikowakaaki Itomi riyakowentantee, <sup>23</sup>rootaki ipinkathatan-teetyaariri rirori Itomi, ikimitee-tziri Ashitariri. Itzimi kaari pinkathaterini Itomi, tee ipinkathatzitari Ashitariri, otyanta-kiriri jaka.

<sup>24</sup>Ikaate kemaeroni nokanta-yitakiri, aririka rawentaa-neeyaari otyaanta-kinari, aritaki rañaa-shire-yitee. Eero rowajankitee-tziri, aritaki okaatapaaki ikaamanita-waetzi, ashi rowaero rañahae. Omaperotaty. <sup>25</sup>Tema rooteentsi omonkaateeyaa, nimaekataki ikemayiteero kamashireri-paeni iñaani Itomi Tajorentsi. Tema ikaatzi kemaeroni, aritaki rañaa-shire-yitee. Omaperotaty. <sup>26</sup>Ikimitari Ashitariri rañaakaantzi, aritaki ikantzi-taari Itomi rañaakaantee rirori, <sup>27</sup>ipakiri ishintsinka riyakowentantee, tema riitaki Itomi Atziri. <sup>28</sup>Eero pipampoyaa-shitawo nokantakiri. Rooteentsi omateeyaa ikemantee-yaawori kaminkari-paeni iñaani, <sup>29</sup>ari ipiriinta-yitanaki jempe ikitayitaka. Ikaatzi antapiinta-kirori kameethari, ari rañaa-yitee. Riima antapiinta-kirori kaari-perori, ari rañaawitaneeyaa roo kanteencha ari rowajankitahae-teeri.”

### **Ñaayita-kiriri Jeepatzii-toetani**

<sup>30</sup>“Tee nanta-shitawo nokowa-shitari naaka, riitakira Ashitanari kowatsiri niyakowentayiteemi. Okaatzi niyakowentan-tziri naaka rootaki tampatzikatatsiri, tema tee nantashi-waetawo nokowa-shitari naaka, rootaki ikoyiri Ashitanari otyaanta-kinari. <sup>31</sup>Naakami kenkithata-kota-chanimi apaniroeni, eero okameethatzimi nokenkithata-kowaetari. <sup>32</sup>Roo kanteencha eenitatsi itsipa kenkithata-kotanari, tema niyotzi naaka maperori okaatzi ikenkithata-kotanari rirori. <sup>33</sup>Tema omaperotaty ikantakiri paerani Juan potyaantakiri ojampita-kiterini. Tema okaatzi ikenkithata-kota-wakinari rirori omaperotatyaa. <sup>34</sup>Roo kanteencha tee nokowawaetziri naaka atziri kenkithata-kotenani, ikante: “Kameethari irika.” Noshiretan-tawori ikenkithata-kota-kinari paerani Juan, rootaki

pikemijanan-teeyaariri eeroka Tajorentsi, pawijkoteeta. <sup>35</sup>Tema okaatzi ikamantan-takiri paerani Juan okimita-paentari ootamentotsi koñeetyaa-tsiri. Rootaki pikowawita-paentari eerokapaeni pinintaa-wakyaawomi koñeetyaatsiri. <sup>36</sup>Roo kanteencha eenitatsi awijirini Juan ikenkithata-kotana. Okaatzi nantziri naaka, rootaki ikantanari Ashitanari, rootaki maperotzirori oñaahan-tzirori riitaki Ashitanari otyaanta-kinari.

<sup>37</sup>Riitaki Ashitanari otyaanta-kinari. Rijjatzi kamantan-teentsiri ikemijanan-teenari naaka. Teemaeta pikemiro eerokapaeni iñaawaetziri. Tema tee piñaawoota-nitziri. <sup>38</sup>Tee pikemijantziro eerokapaeni iñaani, okantakaan-tziro tee pikemijantana naaka, tema naaka rotyaantani. <sup>39</sup>Pamatsinkawentakawo piñaanatziro Iñaani Tajorentsi, poshiya-kaatzti ari pinkañaane-yitee. Tema naakawitaka okenkithata-kotziri Iñaani Tajorentsi, <sup>40</sup>teemaeta pikowaeyini eeroka pawentahaena ashi powantee-yaawori pañaayitee. <sup>41</sup>Tee nokowa-shityaawo naaka ithaamenta-waetena atziripaeni. <sup>42</sup>Tema niyoyitzimi naaka jempe pikanteeyani eeroka-paeni, tee pikowaeri Tajorentsi. <sup>43</sup>Naaka rotyaantaki Ashitanari nopoiki, tee pikemijantena eerokapaeni. Roo kanteencha aririka ipoki itsipa rantayita-paakiro ikowa-shitari rirori, aritaki paakameethatee-yawakirini.<sup>y</sup> <sup>44</sup>¿Jempema pikantyaaka pikemijanteeyini, osheki piñaama-waetawo ikimo-shireta-kaawaetemi atziri ikantakaapero-wentzimi? Eero pikowawaeta-shita ikimo-shire-wenteemi Tajorentsi. <sup>45</sup>Eero pikenkishirya-waeta-shita naaka iyakowenteemini Ashitanariki. Tema riitaki Moisés iyakowenta-yiteemini eerokapaeni, tema riitaki pawentaa-piintakari. <sup>46</sup>Riimi pikemijantakimi Moisés, ari pikemijanta-kinami naaka, tema naaka rojankinata-kotaki paerani Moisés. <sup>47</sup>Teera pikemijanta-tziiri Moisés rojankinata-kowitakina, ¿jempema pikantyaaka pikemijantero okaate nokanta-yitemiri naaka?"

### Rowakaari Jesús 5000 atziri

(Mt. 14.13-21; Mr. 6.30-44; Lc. 9.10-17)

**6** <sup>1</sup>Ikanta imontyaanaka Jesús intatsikiro inkaari jeekatsiri <sup>2</sup>Tepoweniki, roojatzi ii teetziri Tiberias. <sup>3</sup>Osheki atziri oyaatakiriri, tema iñaakiri okaatzi rantayi-takiri, retsiyatatakota-kaayitee osheki mantsiyari-paeni. <sup>4</sup>Roojatzi itonkaan-tanakari Jesús ochempiki. Ari ijekapaaki itsipaiyi-takari riyotaani-paeni. <sup>5</sup>Tema areetzi-mataa kitejeri Anonkoryaantsi, roemoshirenkanta-piintari Judá-paeni. <sup>6</sup>Ikanta raminaki Jesús, iñaatziiri osheki atziri oyaatakiriri, ikantanakiri Felipe: "¿Jempema amananteka owanawontsi owakaeyaariri maawoeni irikapaeni atziri?" <sup>7</sup>Tema Riyotaki rirori Jesús oetarika ranteri. Roo kanteencha rojampi-tashitari Felipe ikemant-yaariri oetarika ikanteri. <sup>8</sup>Ari rakanaki Felipe,

ikantzi: “Tema otzimatyee antawaete ikaate 6 kashiri aantyaari osheki koriki amanantan-tyaari owanawontsi, rowamatsi-tyaari eepichokiini atziri-paeni.”<sup>z</sup> <sup>8</sup>Akanaki itsipa riyotaani Jesús, riitaki Andrés rirentzi Simón Pedro, ikantzi: <sup>9</sup>“Irika apaani eentsi amaentsiri 5 ratanteetari, apite shima. ¿Arima imonkaatakyaa osheki atziri?”<sup>a</sup> <sup>10</sup>Ari ikantzi Jesús: “Pikanteri ijekaayeni.” Ari ojeeki janta katawoshi-mashi, ari ijekae-yanakini. Tema apatziro riyoteet-takiri shirampari-paeni ikaateeyini 5000. <sup>11</sup>Ikanta raakotakiro Jesús ratanteetari, ikaataki ramanakari Tajorentsi, ipayitakiri ikaatzi jeekayi-teentsiri. Ari ikimitakiri shima, ipakiri ikaatzi piyooteenchari royaa. <sup>12</sup>Ikanta ikemaeyakan maawoeni atziri, ikanteeri Jesús riyotaani: “Paayiteero opetoki okaatzi tzimahaan-tapaen-tsiri, eero apaawae-tanta.” <sup>13</sup>Ari rowiiyi-teero riyotaani-paeni, riyeekitee okaatzi 12 kantziri tzimahaan-tapaen-tsiri kaawita-chari 5 ratanteetari. <sup>14</sup>Ikanta iñaakiro atziri-paeni itajonka-wentakiro Jesús owanawontsi, ikantee-yanakini: “Riitaki irika akemakotziri Kamantan-taniri pokatsini jaka kepatsiki. Omaperotatya.”

<sup>15</sup>Roo kanteencha riyotaki Jesús ipokaeya-tyeeni atziripaeni raapaenteri, iwinkathari-tetyaari. Rootaki ipiyanta-naari tonkaariki ijekawaetzi apaniroeni.

### Ranashi-tantawo Jesús inkaari (Mt. 14.22-27; Mr. 6.45-52)

<sup>16</sup>Ikanta otsireniityaanaki, oerinkae-yaani inkaariki riyotaani Jesús, <sup>17</sup>oteteeyaa-paakanai pitotsiki, montyaa-kotanaka intatsikironta inkaari ryaateero nampitsiki Capernaum. Tema tsireni-tanaki, tekira rareetaawo rirori Jesús jempe ijekae-yakini riyotaani-paeni. <sup>18</sup>Antawo okantaka otamakaatzi inkaari, tema oshintsitatzii otampyaa-tzii. <sup>19</sup>Tema janthataki imontyaa-koteeyani riyotaani inkaariki, iñaatziiri ipokae Jesús ranashi-tantaawo inkaari. Antawo ithaawae-yanakini riyotaani.<sup>b</sup> <sup>20</sup>Roo kanteencha ikantapaeri Jesús irika-paeni riyotaani: “¡Naakataki, eero pithaawan-tashitana!” <sup>21</sup>Tema kimoshireteeyaneeni rotetawaeri pitotsiki, tekira ojamanitanakiita aatakotee-yapaakini jempe roshiretawo rareetyaa.

### Osheki atziri amina-mina-teeriri Jesús

<sup>22</sup>Okanta okiteejeta-manee, riyotaki atziri-paeni jeekaen-tsiri intatsikiro apinto iroka pitotsi imontyaa-tanaari riyotaani-paeni Jesús, tema apaniroeni imontyaa-kotanaka riyotaani-paeni, tee ryaatzi rirori Jesús. <sup>23</sup>Roo kanteencha, ramaeta-paaki otsipa pitotsi poñaayi-

<sup>z</sup> 6.7 osheki koriki = 200 denario   <sup>a</sup> 6.9,13 ratanteetari = pan rowetsikae-tziri cebada

<sup>b</sup> 6.19 janthataki imontyaa-koteeyani = 5–6 kilómetro = 25 terika 30 estadio

teenchari nampitsiki Tiberias, aatakoeya-paakini jempe ramanakotakawo Awinkatharite atanteetari rowaeya-karini.<sup>24</sup> Ikanta iñaakiro atziri-paeni tee ijekki Jesús eejatzí riyotaani-paeni, oteteeya-nakani pitotsiki, jateeyakini nampitsiki Capernaum, ramina-mina-teeri Jesús.

### Iiteetziri Jesús “owanawontsi añaakaan-tatsiri”

<sup>25</sup> Ikanta rareetee-yakani intatsikironta inkaari iñaapaeri Jesús, rojampi-tapaeri, ikantziri: “Yotaanari. ¿Jempema okaatzika pareetaka eeroka jaka?”<sup>c</sup> <sup>26</sup> Ikantzí Jesús: “Tee roo pikowa-kowataa-tantanari pikematha-teero notajonka-wentakiro owanawontsi. Tema roo pikowa-kowa-tantaanari pikemaneeentee-yakani chapinki powaeyakaní. Omaperotatya. <sup>27</sup>Eero pantawenta-shitawo owanawontsi thonkani-tachari, tema otzimatayee pantawenteero owanawontsi kaari thonkachani añaakaemini. Rootaki owanawontsi ipantziri Itomi Atziri, tema riitaki roñaaahan-takiri Tajorentsi, Ashitariri, eenitatsiri itajorenka.” <sup>28</sup>Ari rojampi-teeta-nakiri, ikantee-tziri: “¿Jempema nokantyaaka nantant-yaawori okaatzi ikoyiri Tajorentsi nanteniri?” <sup>29</sup>Ikantzí Jesús: “Iroka ikoyiri Tajorentsi panteeri, otzimatayee pikemijanteeri irika rotyaantakiri.” <sup>30</sup>Eekiro rojampi-teeta-tziiri, ikantee-tziri: “¿Itama pitajonka-wentanteri eeroka nokemijan-tanteemiri? ¿Oetaka pantayi-tziri? <sup>31</sup>Tema paerani rowayitakawo awaejatziteni iiteetziri ‘Itama’ janta ochempi-mashiki, iroka ikanteeetzi rojankina-takoe-tziro:

Tajorentsi pakiri royaawo owanawontsi paryahaen-tsiri  
inkiteki.”<sup>d</sup> 6.31-58

<sup>32</sup> Ari rakanaki Jesús, ikantzí: “Okaatzi owanawontsi poñeenchari paerani inkiteki, kaarira awaejatziteni Moisés panteroni. Roo kanteencha riitaki panteeróni Ashitanari rooperori owanawontsi. Omaperortatya. <sup>33</sup>Tema okaatzi owanawontsi ipantziri Tajorentsi, riitaki irika poñeenchari inkiteki, riitaki añaakaa-yiteerini maawoeni jaawiki-jatzi.” <sup>34</sup>Ari ikantee-tanakiri: “Pinkathari, rootaki nokoyiri pipapiintenawo iroka owanawontsi.”

<sup>35</sup> Ikantzí Jesús: “Naakataki owanawontsi añaakaan-taniri. Ikaate tsipa-shire-teenani naaka, eero itasheyawaetee. Ikaate kemijanta-neenani naaka, eero imiriwaetee. <sup>36</sup>Tema nokantakimi, piñaawi-teeya-kinani eeroka, tee pikemijantana. <sup>37</sup>Ikaatzi ikowakiri Ashitanari itsipa-shire-tena aritaki imatakiro, eero nomaninta-wakiri naaka. <sup>38</sup>Tee roo nopokan-tyaari jaká nopoñaaka inkiteki nantayitero nokowashitari naaka, apatziro nanta-piintero ikoyiri Ashitanari otyaanta-kinari jaká. <sup>39</sup>Iroka ikoyiri Ashitanari otyaanta-kinari, eero nopeyahaan-tawaetzi apaani ikaatzi itsipa-shire-takaan-kinari, otzimatayee nowañaa-yiteeri paata

<sup>c</sup> 6.25 Yotaanari = Rabí    <sup>d</sup> 6.31,49 iitama = maná    6.31-58 owanawontsi = pan

oweyaantyaawoni kitejeri.<sup>40</sup> Iroka ikoyiri Ashitanari otyaanta-kinari jaka, ikaate yoteerini riitaki Itomi, ikemijanta-neeri, aritaki rañaakaa-yiteeri. Naaka owiriinterini paata oweyaantyaawoni kitejeri.”

<sup>41</sup> Rootaki opoñaantari ikijima-waeta-nakiri Judá-paeni irika Jesús, ikemakiri ikantaki: “Naakataki owanawontsi poñeenchari inkiteki.” <sup>42</sup> Ari ikanta-wakahae-yanakaní: “¿Kaarima irika Jesús, itomi José? Niyoteeyirini naaka ashitariri. ¿Oetaka ikantantari: ‘Nopoñaawo inkiteki?’”

<sup>43</sup> Ikantzi Jesús: “Aritapaaki pikijima-waetakina. <sup>44</sup> Tekatsi tsipa-shire-tashi-tenani naaka eerorika ramashire-teeri Ashitanari otyaanta-kinari. Tema naaka owiriinterini paata oweyaantyaawoni kitejeri. <sup>45</sup> Rootaki rojankina-takotakiri Kamantan-taniri-paeni, ikantaki:

Riita-ki Tajorentsi yotahaerini maawoeni.

Tema ikaatzi kemaerini Ashitanari, yoteerini rirori, aritaki itsipa-shire-teena naaka. <sup>46</sup> Tema tekatsi ñaawooterini Ashitanari, apatziro poñeenchari Tajorentsiki, riitaki ñaawootziriri. <sup>47</sup> Ikaate kemijanteenani naaka, aritaki rañahae. Omaperotatyá. <sup>48</sup> Naakataki owanawontsi añaakaan-taniri. <sup>49</sup> Rowawitakawo piwaejatziteni ikantee-tziri ‘Itama’ janta ochempí-mashiki, roo kanteencha kamayitee rirori. <sup>50</sup> Riima irika oshiyakawori owanawontsi poñahaen-charí inkiteki, eero ikaamanitee ikaate owakyaarini. <sup>51</sup> Naakataki kañaaniri owanawontsi poñeenchari inkiteki. Itzimi-rika owakyaawoni iroka owanawontsi, aritaki rañahae. Iroka owanawontsi nopantziri naaka, rootaki nowatha. Riitaki natsipe-wenta jaawiki-jatzi-paeni rañaantee-yaari rirori.”

<sup>52</sup> Ari ikanta-wakahae yani Judá-paeni: “¿Jempema ikinakaeroka irika rowakaan-teerori iwatha?” <sup>53</sup> Ikantzi Jesús: “Eerorika powawo iwatha Itomi Atziri, eerorika píriro rira, eero pañaayitee. Omaperotatyá. <sup>54</sup> Itzimi-rika owakyaawoni nowatha, itzimi-rika irakironi nira, aritaki rañayitee. Naakataki owiriinterini iweyaantyaawoni kitejeri. <sup>55</sup> Tema owanawontsi-perori iroka nowatha, rooma nira rootaki imiri-peroetziri. <sup>56</sup> Itzimi-rika owakyaawoni nowatha, itzimi-rika irakironi nira, itsipa-shire-taana naaka, nomatzitari naaka notsipa-shire-taari rirori. <sup>57</sup> Tema irika Ashitanari otyaanta-kinari naaka kañaaniri rirori, riitaki añaakaanari naaka. Ari okantzitari eejatzí, itzimi-rika kemijanteenani naaka, aritaki nañaakaa-yiteeri. <sup>58</sup> Nokenkitha-takota-tzíiro owanawontsi poñeenchari inkiteki. Iroka owanawontsi tee oshiyawo iiteetziri ‘Itama’ rowayitakari paerani piwaejatziteni, rowayiwi-takawo, kamayitee rirori. Riima ikaate owakyaarini irika oshiyawori owanawontsi, ashi rowaero rañahae.” <sup>59</sup> Rootaki ryotaantakiri Jesús jempe ipiyota-piinteta janta nampsíki Capernaum.

### Ikenkitha-takoe-tziro añaantsi

<sup>60</sup> Ikanta ikemaetakiro iroka yotaantsi, osheki ikaatzi kemijanta-kiriri Jesús, kantaneen-tsiri: “Osheki okompitataka okaatzi ikantayi-takiri

Jesús. ¿Itama kemijanta-matsi-terini?”<sup>61</sup> Tema yotaki Jesús iñaawae-pooki-tatzii ikaatzi ikenkitha-takaakiri, rojampi-tanakiri: “¿Tema inimomitzi okaatzi nokaman-takimiri? <sup>62</sup> ¿Jempema pikanteka aririka piñeerimi irika Itomi Atziri roenokaeya jempe ipoñaaka paerani? <sup>63</sup> Okaatzi nokenkitha-takoyi-takimiri, rootaki kantako-tachari okaatzi añaashire-takaan-tatsiri, kaari awatha-perori nokenkitha-takotzi, tekatsi oetajaantyaa awatha. Tema nokenkitha-takota-tziro awentaa-shire-taantsi kaari koñaani-tatsi, añaakaan-tatsiri. <sup>64</sup> Roo kanteencha eeniyitatsi pikaatee-yakini eerokapaeni kaari kemijanta-tsini.” Tema riyotzi-takari Jesús ikaate kemijanteerini, eejatzi pithoka-shityaarini. <sup>65</sup> Eekiro ikantana-kitzii Jesús: “Rootaki nokantzi-tanta-kimiri: ‘Tekatsira apaani tsipa-shire-teenani naaka, eerorika ikowakaanari Ashitanari.’”

<sup>66</sup> Aripaete iñeetakiro, osheki pakaa-nakirori ikemijantawitarira Jesús, tee itsipata-naari. <sup>67</sup> Ari rojampi-tanakiri Jesús kaatatsiri 12 riyotaani, ikantziri: “¿Pikoyima piyaayitee eeroka-paeni?” <sup>68</sup> Ari rakanaki Simón Pedro, ikantziri: “Pinkathari, ¿Eenitatsima itsipa nopiyashi-teeri naaka-paeni? Apatziro pikanta eeroka pikenkitha-takotziro añaakaan-tatsiri. <sup>69</sup> Aritaki nokemijantee-yakimini naaka-paeni, niyoteeyakimini eerokataki Jeepatzitoetani, Itomi Tajorentsi Kañaari.” <sup>70</sup> Ari rakanaki Jesús, ikantziri: “¿Kaarima naaka yoyaakimiri pikaatakira 12? Roo kanteencha eenitatsi apaani pikaatakira, kamaaritaki.” <sup>71</sup> Tema ikenkitha-takota-tziiri Judas, Itomi Simón Nampitsi-weri. Riitaki Judas pithoka-shityaarini, tema riiwitaka apaani ikaatzira 12 riyotaani.

### Rirentzi-paeni Jesús tee ikemijantee-yirini

**7** <sup>1</sup> Ipoñaa ryaataki Jesús rareetan-tawaeyita Tepoveniki, tee ikoyi ikinanee iipatsiteki Judá-paeni, tema ramina-mina-tatzii Judá-paeni rowamayiri. <sup>2</sup> Roo kanteencha monkaatzi-mataa kitejeri roemoshirenkanta-piintawori Judá-paeni iiteetziri “Panko-shetantsi.” <sup>3</sup> Imatanakiro rirentzi okaakiini Jesús, ikantanakiri: “Eero pomanashita jaka, piyaate inampiteki Judá-paeni iñaantemiri janta piyotaani-paeni okaate pantayiteri. <sup>4</sup> Tema ikaatzi kowatsiri rajahaa-wentee-tyaari, tee romanakaa-shitawo rantayi-tziri. Piyotziro eeroka pantayi-tziro oeta-rikapaeni, poñaaahantero jempe ipiyoteeyani atziripaeni.” <sup>5</sup> Tema imatzitakawo rirentzi-paeni rirori itheenka-shiryaa-waetakiri. <sup>6</sup> Ari ikantanakiri Jesús: “Tema tekira omonkaata noñaahan-tantyaari naaka, rooma eeroka-paeni tee inashita piñaayi-tziro kitejeri-paeni. <sup>7</sup> Tee ikijaneentzimi eerokapaeni jaawiki-jatzi. Rooma naaka osheki ikijaneentakina, tema nooñaawontatziiro nokenkitha-takotziro naaka, kaari-perori okaatzi rantayi-takiri. <sup>8</sup> Piyaateeyini eeroka roemoshirenkaetaha, eero niyaatzita naaka, tema tekira omonkaatyaa noñaahan-tantya.” <sup>9</sup> Ikaatakiro ikenkithawae-yitakiro iroka ñaantsi, roojatzi ijekanaki Tepoveniki.

### Roemoshirenkiro Jesú斯 iiteetziri “Panko-shetantsi”

<sup>10</sup> Roo kanteencha, tema jateeyakini rirentzi-paeni, ari rimpooetanaki rirori Jesú斯, romanakaashitanaka riyatakti, tekatsi yotatsini. <sup>11</sup> Osheki ikowa-kowa-takiri Judá-paeni janta roemoshirenkaetaha, ikanteeeyini: “¿Jempema ijekika irika atziri?” <sup>12</sup> Tema osheki atziri theenka-waeta-kiriri Jesú斯. Eenitatsi kantatsiri: “Kameethari irika atziri.” Eenitatsi itsipa kantatsiri: “Tee ikameethatzi, tema ramataawi-takiri atziri-paeni.” <sup>13</sup> Roo kanteencha, romanakaashitari itheenki-mawae-takiri Jesú斯, tema ithaawan-tan-tyaari reewarite-paeni Judá-paeni.

<sup>14</sup> Roo kanteencha, aritaki niyankitaki roemoshirenkaeyani, ari ikyaapaaki Jesú斯 tajorentsi-pankoki, riyotaan-tapae. <sup>15</sup> Tema yoteeyakini Judá-paeni, ikanteeeyini: “¿Jempema riyotani-tantari irika, tee ikyaawita jempe riyotaan-teetzi?” <sup>16</sup> Ari rakanaki Jesú斯, ikantzi: “Tema okaatzi niyotaa-yitakimiri tee naaka iyotashi-tyaawoni, tema riitaki yotakaa-nawori otyaanta-kinari. <sup>17</sup> Ikaate kowapero-teeroni ikoyiri Tajorentsi, aritaki riyoteero riitaki Tajorentsi yotakaa-nawori okaatzi niyotaan-tziri, tema tee naaka yotashi-waetyaawoni. <sup>18</sup> Tema ikaatzi yotaantzirori riyotashi-waetari, ramina-mina-tatziiro ipinkathatanteetyaariri. Riima amina-mina-tzirori ipinkatha-teeri otyaanta-nakiri, riitaki ñaawaetzirori kyaariperori. Teera itzipi-shire-waetzi rirori. <sup>19</sup> ¿Tema rojankina-witakimi paerani Moisés Ikantakaan-teetani? Roo kanteencha, tee pimonkaa-tziro. ¿Itama pajaryaan-tanari powamayina?” <sup>20</sup> Ari ikantee-yanakini atziripaeni: “¡Kamaarí! ¿Itama ajariimiri rowamayimi?” <sup>21</sup> Ikantzi Jesú斯: “Maawoeni eerokapaeni osheki pipampoyaa-wentakiro piñaakina nantakiri kitejeri imakoryaan-teetari. <sup>22</sup> Ikantakaantaki paerani Moisés pitomeshi-taani-teeyaa. (Tema kaari Moisés etakaan-tyaawoni itomeshi-taani-teeyaa, tema awaejatziiteni etakaan-tanakawori paerani tekira itzimiita Moisés.) Rootaki pitomeshi-taanitanta-piintari eeroka-paeni kitejeri imakoryaan-teetari. <sup>23</sup> Piñaakiro, pitomeshi-taanitanta-piintaki eeroka-paeni kitejeri imakoryaan-teetari pimatan-tyaawori Ikantakaantani paerani Moisés. ¿Itama pikijaneentan-tanari naaka netsiya-takota-kahaeri maawoeni iwathaki apaani atziri kitejeri imakoryaan-teetari? <sup>24</sup> Paamawentyaa owapeyi-motzimi-kari piyakowentante. Tema kametha pitampatzika-shirewentantee.”

#### ¿Riitakima Jeepatzii-toetani irika?

<sup>25</sup> Ari rojampita-wakaanaka Aapatziyaweni-jatzi, ikanta-wakaa: “¿Kaarima irika amina-mineetziri rowamahaeteri? <sup>26</sup> Iriinta ijekaki, maawoeni ikemaetakiri ñaawaetzti, tekatsi akirini. ¿Riyotatziima pinkathari-paeni riitaki Jeepatzii-toetani irinta? <sup>27</sup> Roo kanteencha, niyoteeyirini irika atziri jempe ipoñaawo. Rooma paata aririka ipokaki

matzirori iita Jeepatzii-toetani, tekatsi yotatsini jempe ipoñaaka.”<sup>28</sup> Tema roojatzi ijekaki Jesús tajorentsi-pankoki riyotaantzi, ari icheraanaki, ikantanaki: “¡Arimá! ¡Piyotanama eeroka-paeni jempe nopoñaaka! Roo kanteencha, tee naaka nintashi-tachani nopoki, tema rotyaantani irika rawentaa-pero-teetari. Kaari piyotako-taajaetzti eerokapaeni.<sup>29</sup> Roo kanteencha niyotziri naaka, tema aritaki nokaateeyini, riitaki otyaantakinari.”<sup>30</sup> Ari ikowawi-tanaka raakaan-terimi, roo kanteencha tekatsi akotashi-terini, tema tekira omonkaa-paeteta.<sup>31</sup> Tema osheki kemijanta-nakiriri Jesús, ikanteeyini: “Aamaa riitaki irika Jeepatzii-toetani, tema osheki itajonka-wentantzi. ¿Plkenkishiryaama awijiro okaate itajonka-wentanteri Jeepatzii-toetani?”

### **Rotyaantaki Inashitantaniri oteyirini Jesús**

<sup>32</sup> Ikanta Inashitantaniri ikemakiri atziri-paeni ikenkitha-waeta-kotziri Jesús. Raapatziya-nakari reewari-paeni Ompera-tajorentsi-taarewo, rotyaantaki aminako-wentzi-rori tajorentsi-panko oteyaki-terini.

<sup>33</sup> Ikantzi Jesús: “Eero ojamanitzi nojeeki-motaneemi, rooteentsi nopye ijekira otyaanta-kinari.”<sup>34</sup> Osheki pamina-mina-witeena, roo kanteencha eero piñahaana, tema eero pitsipatana jempe nojeekapae naaka.”<sup>35</sup> Ari rojampita-wakahaeyani Judá-paeni, ikantzi: “Jempema riyaaa-matsiteka irika eero añaantari? ¿Riyaata-tyeema otsipaki nampitsi itzimpookayitakaha ashenkina-paeni Judá-paeni, riyotaa-yiteeri wirakochapaeni?<sup>e</sup><sup>36</sup> ¿Oetaka ikantako-tziri: ‘Pamina-mina-teena, eero piñiimaetaana, tema eero pitsipatana jempe nojeekapae naaka?’”

### **Nijaa añaakaan-tatsiri**

<sup>37</sup> Okanta oweyaanta-paakawori kitejeri roemoshirenka-peroe-tantyaari. Ari ikatziyanaka Jesús, ishintsitanaki icheraanaki, ikantanaki: “Eenitatsi-rika mirita-tsiri, itsipa-shire-teena naaka, riraawaetee.”<sup>38</sup> Tema okantzi Jankinarentsi-perori:

Ikaate kemijanteenani naaka, okimiwi-tyaawo oshiyaa-shire-tantee-mi nijaa añaakaan-tatsiri.”

<sup>39</sup> Riitaki roshiya-kaawentzi Jesús ikaate kemijanteerini ojeeka-shire-tantee-yaari Ishire tajorentsi. Tema tekira rotyaantee-tziroota Ishire tajorentsi, tekira roenoka-shitaawoota Jesús rowaneenkawo.

### **Itzimpookae-yanakini atziri-paeni**

<sup>40</sup> Eenitatsi atziri-paeni kemakirori ikantakiri Jesús, ikantee-yanakini: “Omapero-tatziiri irika atziri riitaki Kamantan-taniri.”<sup>41</sup> Eenitatsi itsipa kantaneen-tsiri: “Riitaki Jeepatzii-toetani irika.” Roo kanteencha

<sup>e</sup> 7.35 wirakochapaeni = griegos

eenitatsi itsipa kantatsiri: “Kaari, tema eero ipoñaawo Jeepatzii-toetani Tepoweniki.”<sup>42</sup> Tema okantzi Jankinarentsi-perori:

Riitaki icharini pinkatharini David Ijeepatziitoetani, ipoñeeyaawo Owapankoniki, inampiki paerani David.”

<sup>43</sup> Ari itzimpookae-yanakini atziri ikija-wakaa-wenta-nakari Jesús.

<sup>44</sup> Eenitatsi kowawita-neenchari raakaan-terimi, roo kanteencha tekatsi akotashi-terini.

### Tekatsi oshiyaarini iñaawaetzi irika

<sup>45</sup> Ikanta ipiyapaaka aminakowentzirori tajorentsi-pango jempe ijeki Inashitantaniri eejatzi reewari Ompera-tajorentsi-taarewo, rojampi-tawaeri, ikantziri: “¿Itama kaari pamantakari?”<sup>46</sup> Ikanteeyini rirori: “¿Tekatsira kimityaarini iñaawaetzi irikal?”<sup>47</sup> Ikanteeyini Inashitantaniri: “¿Ramatawi-tzita-kimima eeroka-paeni?”<sup>48</sup> ¿Eenitatsima eewarite kemijanta-kiriri irika atziri? ¿Eenitatsima nokaatziri Inashitantaniri kemijanta-kiriri?<sup>49</sup> Apatzirowa ikemijan-tziri atziri-paeni kaari yotakoteroni Ikantakaan-teetani, tema yakataarewo irika.”<sup>50</sup> Ikanta Inashitantaniri Nicodemo, pokaentsiri paerani tsireniriki iñeeri Jesús, ikantanaki:<sup>51</sup> “Rojankineetaki paerani Ikantakaan-teetani, ikanteetzi, tee oshinetaan-tsitzti riyakowenteeteri apaani atziri eerrika akemiri aakapaeni, rootaki ayotantyaari oeta rantakiri.”<sup>52</sup> Ikantee-tanakiri: “¿Eerokama Tepoweni-jatzi? Piñaana-perotero Jankinarentsi, aritaki piñaakiro, tekatsi Kamantan-taniri poñaachani Tepoweniki.”

### Tsinani mayempiro

<sup>53</sup> Ipoñaa riyaayitee apaani-paeni ipankokipaeni.

**8** <sup>1</sup> Roo kanteencha tonkaanaki Jesús ocheinpiki Yeenkae-toni.

<sup>2</sup> Okanta okiteejeta-manee, ipiyaa tajorentsi-pankoki. Osheki atziri piyowenta-waari, jeekapae Jesús ryotaa-paeri atziri-paeni.<sup>3</sup> Ikanta Yotaantaniri-paeni itsipatakari Inashitantaniri-paeni ramakiniri apaani tsinani itonkiyo-teetakari omayempitzi. Ipiriinta-paakiro niyankineki ipiyoteeyani.<sup>4</sup> Ikantapaakiri Jesús: “Yotaantanirí, iroka tsinani iñaakoetakiro omayempi-waetzi.<sup>5</sup> Ikantakaantaki paerani Moisés rowamahaetero mayempi-tatsiri tsinani. ¿Jempe pikantzika eeroka?”

<sup>6</sup> Rootaki rojampi-tantariri ikoyi ikompita-kaetyaari Jesús, opoñaantyaari ikantakoe-teriri. Roo kanteencha oeyotanaka Jesús rojankina-tantanakawo rako kepatsiki.<sup>7</sup> Eekiro rojampi-teeta-tziiri, ari ikatziyanaka roeyowitakaha, ikantanakiri: “Eenitatsi-rika apaani pikaatee-yakini kaari anteroni kaari-perori, riitaki etakaan-tyaawoni rompojan-tyaawo mapi iroka tsinani.”<sup>8</sup> Eejatzi roeyootanaa, rapiita-neero rojankinwaetane kepatsi.<sup>9</sup> Ikanta ikemaeyakini ikantakiri Jesús, apaani-paeni ipiyayitanaka, tema ikenkishiryaa-yitanakiro jempe ikantayita rirori. Riitaki

jewataneentsiri ipiyanaka antaripero-paeni. Ikanta ijekanaki apitekiro Jesús eejatzi tsinani,<sup>10</sup> katziyanaka roeyowitaka, ari rojampi-tziro ikantziro: “Tsinani, ¿Jempema ikinaaya-kinika? ¿Tekatsima itsipa yakowentemi?”<sup>11</sup> Akanakiri roori okantziri: “Tekatsi Nowinkatharite.” Ikantzi Jesús: “Eejatzi naaka eero niyakowentzimi. Piyaatee, eero papiitziro pikaariperotee.”

### Ikoñeetya-kotziri Jesús jaawiki-jatzi-paeni

<sup>12</sup> Ari rapiita-neero Jesús ryoteeri atziri-paeni, ikantziri: “Naaka koñeetyaa-kotziriri jaawiki-jatzi. Ikaate tsipateenani naaka, aritaki nokoñee-tyaakoteeri, eero ikinawaetee tsireni-kaakiriki.”<sup>13</sup> Ari ikantzi Inashitantaniri: “Powakowenta-shiwaeta pikenkitha-takota apaniroeni, te okameethatzi okaatzi pikenkitha-takowae-witaka.”<sup>14</sup> Ari rakanaki Jesús, ikantzi: “Kameetha okaatzi nokamantan-tziri, okantawitaka nokenkitha-takowitaka apaniroeni naaka. Tema niyotzi jempe nopoñaakawo, jempe janta niyaatee. Roo kanteencha tee piyoteeyini eerokapaeni.<sup>15</sup> Pametashi-teeya-kawoni poshiya-kotari atziri-paeni ryakowentantzi. Rooma naaka tekatsi niyakowente.<sup>16</sup> Aririka niyakowentante naaka, omapero-tatyaaaha okaatzi nokanta-yitziri, tema tee apaniroeni niyakowentante, tema ari nokaatziri Ashitanari otyaanta-kinari naaka.<sup>17</sup> Iroka okantzi Ikantakaan-teetani ipaetakimiri eerokapaeni:

Aririka oshiya-wakaeyaa ikenkitha-takiri apite kamantakotanta-tsiri, omapero-tatyaa okaatzi ikamantziri.

<sup>18</sup> Naaka kenkitha-takoteencha. Ari ikantakari Ashitanari otyaanta-kinari rrijatzi kenkitha-takota-kinari. Apite nokaatzi nokenkitha-takota.”<sup>19</sup>

Ikantzi Inashitantaniri: “¿Jempema ijekiri Ashitzimiri?” Ikantzi Jesús: “Tee piyotee-yanani eeroka, ari pikemitziiri Ashitanari tee piyoritzi. Ari piyotee-yinanimi naaka, ari piyotakirimi Ashitanari.”<sup>20</sup> Ari ikamantan-takirori Jesús iroka-paeni ñaantsi tajorentsi-pankoki jempe rowaeta-piintziri koriki rashita-kaetariri Tajorentsí. Roo kanteencha tekatsi aakaanterini, tema tekira omonkaa-tyaata raantee-tyaariri.

### Jempe niyaatee naaka, eero pareetaa janta eeroka

<sup>21</sup> Ari rapiita-nakiro Jesús ikantzi: “Aririka niyaatee osheki pamina-mina-witeena, roo kanteencha aritaki pikamako-yiteero pikaaripero-yitaki. Jempe-rika niyaateero naaka, eero pareeyitaa janta eeroka.”<sup>22</sup> Ari ikanta-wakahaeysani Judá-paeni: “¿Ishinewae-tatyaa irika. Rootaki ikantantari eero areeta aakapaeni jempe riyaate rirori?”<sup>23</sup> Ikantzi Jesús: “Tema eeroka jeekatsiri kepatsiki, rooma naaka nojeeki inkiteki. Roo pinampi eerokapaeni jika kepatsiki, rooma naaka nonampitawo inkiteki.”<sup>24</sup> Rootaki nokantan-tzimiri: ‘Aritaki pikamako-yiteero piyaari-peronka. Eerorika pikemijantana nokaman-takowitaka jempe noeta naaka, rootaki pikamako-

tantee-yaawori piyari-peronka.’”<sup>25</sup> Ikantzi Judá-paeni: “¿Jempema piitaka eeroka?” Ikantzi Jesús: “Tema nokaman-takimi ketziroeni.<sup>26</sup> Tema eniwitacha osheki nokantemiri, eenitatsi osheki niyakowenta-kimirí eejatzi. Tema okaatzi iñaawae-tziri otyaanta-kinari irootaki kyaariperori. Okaatzi nokaman-tayitzimiri jaawiki-jatzi, rootaki ikamantanari rirori.”<sup>27</sup> Roo kanteencha tee ikematharitziri ikenkitha-takowi-takari Ashiteeri.<sup>28</sup> Rootaki ikantan-tanakari Jesús: “Aririka pikenta-kotakaan-takiri Itomi Atziri, aripaete piyote jempe noeta. Tema tee naaka antashi-waetyaawoni nokowakaari. Apatziro niyotaan-tziro okaatzi riyotaanari Ashitanari.”<sup>29</sup> Itzimi otyaanta-kinari ari itsipa-shiretana naaka. Tee rooka-wenta-na Ashitanari, tema nanta-piintziniri okaatzi kameetha-tzimo-tziriri.”<sup>30</sup> Ikanta ikamanta-koyitakiro Jesús iroka-paeni, osheki kemijanta-nakiriri.

### Ookakaa-wenteemi Kyaariperori

<sup>31</sup> Ikantakiri Jesús maawoeni Judá-paeni ikaatzi kemijanta-nakiriri, ikantziri: “Aririka poejokiro-tanakyaawo noñaani, eerokataki kyaariperori niyotaani.<sup>32</sup> Aritaki piyoteero kyaariperori, rootaki kyaariperori ookakaa-wenteemini pijekan-teeyaari kameetha.”<sup>33</sup> Akaeyanakini Judá-paeni, ikantzi: “Icharini-paeni Abraham nakapaeni. Tekatsi omperawae-tenani. ¿Oetaka pikantan-tanari eeroka: ‘Aritaki rookakaa-wentee-teemi.’?”

<sup>34</sup> Ikantzi Jesús: “Ikaatzi antapiintzirori kaari-perori, ookemiwae-takawo omperatyarimi. Omaperotaty. <sup>35</sup> Apaani omperataari eepichokiini isheninka-teetari, riima apaani itomiteetari ashi royro isheninka-teetari.<sup>36</sup> Aririka rookakaa-wenteemi Itomiteetari, aritaki piyotee kyaaripero rookakaa-wenteemi.<sup>37</sup> Niyyoyitzimi eerokapaeni icharini-yitari Abraham. Roo kanteencha pikowae-yakini powamayina, tema tee inimotzimi nokanta-yitzimiri.<sup>38</sup> Rootaki nokamantan-tziri naaka okaatzi roñaahanari Ashitanari. Rooma eerokapaeni pantashitawo okaatzi pikemako-tziriri ashitzimiri.”

### Riitaki ashitzimiri Kamaari

<sup>39</sup> Ari ikanteeyini Judá-paeni: “¡Riitaki nowae-jatziteni naaka Abraham!”<sup>f</sup> Ikantzi Jesús: “Eerokami icharini-paeni Abraham, aritaki pantakiromi okaatzi rantayi-takiri paerani rirori.”<sup>40</sup> Roo kanteencha, pikowae-yakini eeroka powamaena nokaman-tawita-kimiro okaatzi riyotakaanari Tajorentsi. ¡Tema tee ari ikantyaa paerani Abraham!<sup>41</sup> Roojatzi pantayi-tziro okaatzi rantziri ashitzimiri.” Ari ikanteeyini Inashitantaniri: “¡Teera naaka itomipaeni theenka-tajorentsi-taniri. Tema apatziro ikanta Ashitanari, riitaki Tajorentsi!”<sup>42</sup> Ikantzi Jesús: “Riitakirikami Tajorentsi ashitemini, aritaki

<sup>f</sup> 8.41 theenka-tajorentsi-taniri = mayempiiriite. Tema roshiya-kaawenta-tziiri paerani Judá-paeni, tee roejokirotari Tajorentsi, rantayi-tziro kaari-perori.

petakota-kinami, tema nopoñaakawo naaka Tajorentsiki, irokana. Tee naaka pokashi-tachani apaniroeni, tema riitaki Tajorentsi otyaanta-kinari. <sup>43</sup> ¿Oetaka kaari pikematha-tantawo nokanta-yitzimiri? Tema tee pikowaeyini pikemijantero noñaani. <sup>44</sup> Riitaki ashitakimiri Kamaari, panta-piinta-kiniri okaatzi ikoyiri. Ashi royiro kamaari owakira etantana-kawori, rowamaashire-tantzi. Ipaapate thaeri-paeni irika, tee iñaawae-tziro kyaariperori. Aririka ikoyi ramatawi-tante, iñaawae-tziro theeyaantsi. <sup>45</sup> Rooma naaka, noñaawae-tziro kyaariperori ñaantsi, teemaeta pikemijantee-yananitzi eerokapaeni. <sup>46</sup> ¿Eenitatsi jaka pikaatee-yakini, kantenani: ‘Kaari-pero-shireri irika Jesú?’ Tema okaatzi noñaawae-tziri, kyaariperori iroka. ¿Litama kaari pikemijantanana? <sup>47</sup> Itzimi-rika rashitari Tajorentsi, ikemijantziro iñaani. Rooma eerokapaeni tee rashitzimi Tajorentsi, tee pikemijanteeeyini.”

### Itzimitaka Jeepatzii-toetani

<sup>48</sup> Ikanteeyini Judá-paeni: “Omaperotaty nokantakimiri Oshitekii-tonijatzi eeroka, tema Kamaari eeroka.” <sup>49</sup> Ikantzi Jesús: “Tee nokamaaritzi, nopinkatha-tziri naaka Ashitanari. Rooma eerokapaeni, tee pipinkatha-teeyirini. <sup>50</sup> Tee naaka kowashi-tachani pipinkathatena, tema eenitatsi itsipa kowatsiri ipinkatha-teetenena, riitaki iyakowentan-tatsini paata. <sup>51</sup> Eenitatsirika kemijanteeroni noñaani, eero ikamayitee paata. Omaperotatya.” <sup>52</sup> Ikanteeyini Judá-paeni: “Ari niyoteeyini omaperotaty pikamaaritzi. Tema kamaki Abraham, ari roshiyakari Kamantan-taniri-paeni, kamayitaki maawoeni. Opoña pikantzi eeroka: ‘Eenitatsi-rika kemijanteeroni noñaani, eero ikamayitee.’ <sup>53</sup> ¿Pawijirima eeroka nowae-jatzi-teni. Abraham? Kamaki riori, ari roshiya-yitakari Kamantan-taniri. ¿Jempema piitattyaka eeroka?” <sup>54</sup> Ikantzi Jesús: “Naakami kowashi-tachani ipinkatha-teetenami, eero okameethatzimi. Roo kanteencha eenitatsi pinkatharitakaanari, riitaki Ashitanari. Rijatzti pikenkitha-takota-piintziri eeroka, pikantzi: ‘Riitaki Notajorentsite.’ <sup>55</sup> Teemaeta piyotee-yirini eerokapaeni. Rooma naaka noñiiri. Aririka nokantemi ‘tee noñiiri,’ naaka theeri, noshiya-kotakimi eerokapaeni. Roo kanteencha omaperotaty noñiiri naaka. Nokemijantziro iñaani. <sup>56</sup> Tema irika Abraham, piwaejatzi-tetari eeroka-paeni, ikimo-shiretaki paerani iñeero nopolakirika. Imatzimaetakawo iñaakina, antawo ikimo-shiretanaki.” <sup>57</sup> Ikantzi Judá-paeni: “Tekira okaatziita 50 pojarentsite. Ari pikantzi piñiiri Abraham.” <sup>58</sup> Ikantzi Jesús: “Tekiraa itzimiita paerani Abraham, ‘Naakataki.’ Omaperotatya.” <sup>59</sup> Ikanta raayiwi-tanaka mapi Judá-paeni ikoyi rompojirimí Jesú. Omananaka riori, shitowanaki tajorentsi-pankoki.

### Retsiya-takota-kahaeri Jesús Kamampo-waakiri

**9** <sup>1</sup>Ikanta rawijanaki Jesú iñaapaakiri apaani atziri kamampo-waakittsiri, itzima-kori ikamampo-waakitzi. <sup>2</sup>Ikantzi riyotaani-paeni:

“¡Yotaanari! ¿Itama ikamampo-waaki-tantari owakira itzimapaaki irika atziri? ¿Rooma kantakaari ikaariperotzi iriri? ¿Rooma kantakaari ikaariperotzi rirori?”<sup>g</sup> <sup>3</sup>Ikantzi Jesús: “Tee roo kantakaan-teroni iyaari-peronka rirori, tee roo kantakaan-teroni iyaari-peronka ipaapate. Tema roo kantakaan-tzirori roñaahan-teetan-tyaawori ishintsinka Tajorentsi. <sup>4</sup>Tema eeniro okiteejetzi, okowa-pero-tatyaa nanteniri rantawaeri otyaanta-kinari. Rooma aririka otsireni-tanaki, tekatsi kanteroni rantawaete. <sup>5</sup>Tema eeniro nojeeki naaka jaka kepatsiki, naakataki koñeetyaa-kotziri jaawiki-jatzi.” <sup>6</sup>Ikaatakiro ikenkitha-waetaki Jesús, reewatanaki kepatsiki, ramirokaki eepichokiini kepatsi, itziritakiri rokiki kamampo-waakiri. <sup>7</sup>Ikantziri: “Piyaate pikiwa-yookityaa owaanka-naariki iiheetziri Otyaantaa-rini.” Ari ikinanaki kamampo-waakiri, ikiwaaki-tapaaka. Ikanta ipiyapaaka, aminawae-tanee kameetha. <sup>8</sup>Ikanta isheninka-paeni ikaatzzi ñaapiintziriri ikowako-tantzi ipashitee-tyaari, rojampita-wakahae-yakani, ikantzi: “¿Kaarima irika jeeka-piinta-tsiri ikowako-tantzi ipashitee-tyaari?” <sup>9</sup>Eenitatsi kantatsiri: “Riitaki.” Itsipa kantatsiri: “Kaari, riiwitaka.” Ikantzi rirori: “Naakataki piñaa-piintziri.”

<sup>10</sup> Ari rojampi-teeta-nakiri, ikantee-tziri: “¿Jempema pikantaaka paminan-taari kameetha?”

<sup>11</sup> Ikantzi rirori: “Irinta atziri iitachari Jesús, itziritan-takinawo kepatsi nokiki, ikantakina: ‘Piyaate owaanka-naariki iiheetziri Otyaantaa-rini. Ari pikiwaaki-tyaa.’ Nokanta niyaatanaki, nokiwaaki-tapaaka janta, ari naminanee.” <sup>12</sup>Ikantee-tziri: “¿Jempema nimaeka irika atziri?” Ikantzi rirori: “Tee niyotzi.”

### Rojampi-tziri Inashitantaniri-paeni Kamampo-waaki-witachari

<sup>13</sup> Ikanta rahaeta-nakiri kamampo-waaki-witachari ijekira Inashitantaniri-paeni. <sup>14</sup>Tema rootaki kitejeri imakoryaan-teetari, imatanta-kawori Jesús itziritan-takariri rooki kepatsi, roo ikowichaa-tantaari kameetha.

<sup>15</sup> Ari rapiitakiri Inashitantaniri-paeni rojampi-tziri jempe okanta ikowichaa-tantaari kameetha. Ikantanaki rirori: “Itziritan-takinawo nokiki eepichokiini kepatsi, ari niyaatanaki naaka nokiwaakita. Ari nokowichaa-tanee kameetha.” <sup>16</sup>Ari ikantzi itsipa Inashitantaniri: “Iraka atziri antakirori kaari rashí Tajorentsi, tema tee romaerintantawo kitejeri imakoryaan-teetari.” Eenitatsi itsipa kantatsiri: “¿Riimi kaari-pero-shireri, eero rantziromi añaakiri?” Tema inashiyita ikantee-yakirini Inashitantaniri-paeni, tee raapatziyawakaa. <sup>17</sup>Ari rapiitakiri rojampi-tziri kamampo-waaki-witachari, ikantziri: “¿Iita pikenkishiryaa eeroka, iitama kowichaata-kahaemiri kameetha?” Ikantzi rirori: “Kamantan-taniri rirori.”

<sup>g</sup> 9.2 Yotaanari = Rabí

<sup>18</sup>Roo kanteencha, tee ikemijanteeyini Judá-paeni riitaki kamampo-waaki-witachari irika, riitaki kowichaata-kahae-teeri kameetha. Rootaki ikaeman-takariri ipaapate ikowichaata-kahae-teeri. <sup>19</sup>Rojampi-tawakiri, ikantziri: “¿Riima pitomi irika? Pikamantena, ¿rooma itzima-kori ikamampo-waakitzi? ¿Jempema okanta ikowichaa-tantaari kameetha?” <sup>20</sup>Ikantanaki ipaapate: “Apatziro niyotzi riitaki notyomi, itzima-kori ikamampo-waakitzi. <sup>21</sup>Roo kanteencha, teera niyotzi jempe okanta ikowichaa-tantaari kameetha, tee niyotzi eejatzi iita kowichaata-kahaeriri. Pojampiteri rirori, tema antaritaki rirori, riitaki kamantemini.” <sup>22</sup>Roo ikantantari ashitariri tema ithaawan-tatyaari Judá-paeni, ikantee-yakini rirori: “Itzimi-rika kanteen-tsini Jeepatzii-toetani irika Jesús, eero noshine-teeri ikyahae apiyota-piinteeyanira.” <sup>23</sup>Rootaki ikantantari ipaapate: “Pojampiteri notyomi, antaritaki rirori.”

<sup>24</sup>Ari rapiitakiro Judá-paeni ikaemaeri kamampo-waaki-witachari, ikantziri: “Pipinkathateri Tajorentsi, pikamantena kameetha, eero pipinkatha-tashitari irika atziri kaari-pero-shireri rirori.” <sup>25</sup>Ikantzi rirori: “Tee niyotzi naaka riitakirika kaari-pero-shire-rika. Apatziro niyotzi naaka kamampo-waakiri, ikowichaata-kahaana kameetha.” <sup>26</sup>Rapiitziri rojampi-tziri, ikantziri: “¿Jempe ikantakimika? ¿Oeta rantakiri ikowichaa-takaan-teemiri?” <sup>27</sup>Ikantzi kamampo-waaki-witachari: “Aritaki nokantakimi, tee pikemijantena. ¿Oetaka pikowantari napiitemiro? ¿Pikowatziaima pikemijanteeyirini eeroka?” <sup>28</sup>Ari ikaweya-waetee-tanakiri kamampo-waaki-witachari, ikantee-tanakiri: “Pawentee-yaari eeroka irika atziri, rooma naakapaeni nawentee-yaawo Ikantakaantani awaejatziteni Moisés. <sup>29</sup>Tema niyoteeyini naaka ikenkitha-waeta-kaakiri Tajorentsi paerani Moisés. Riima irika atziri, tekatsi yoterini jempe ikinapaaki.”

<sup>30</sup>Ari rakanaki kamampo-waaki-witachari, ikantzi: “¡Arima! Tee piyoritzi eerokapaeni jempe ikinapaaki. Rooma naaka ikowichaata-kahaana kameetha. <sup>31</sup>Tema ayoteeyini maawoeni tee ikemiri Tajorentsi antzirori kaari-perori. Apatziro ikemiro ramanani pinkatha-tziriri, ikaatzi antaneerori ikoyiri. <sup>32</sup>Tekatsi akemakote tzimatsi kowichaata-kahaeriri tzimako-tzirori ikamampo-waakitzi. <sup>33</sup>Eeromi ipoñaakawo irika atziri Tajorentsi-kinta, eero imatziromi rantakiri.” <sup>34</sup>Ikantee-tanakiri kamampo-waaki-witachari: “Kaari-perori eeroka owakira pitzima-paaki. ¿Ari pikoyi piyotaa-yiteena nimaeka naaka?” Romishitowae-takiri kamampowaakiwitachari.

### Kamampo-waaki-shireri

<sup>35</sup>Tema kemaki Jesús romishitowae-takiri kamampo-waaki-witachari. Ikanta iñahaeri ikinapae, rojampi-takiri, ikantziri: “¿Pawentaarima eeroka Itomi Atziri?” <sup>36</sup>Ikantzi rirori: “¡Pinkathari! Pookotenari jempe

itzimi, nokoyi nawentee-yaari naaka.”<sup>37</sup> Ikantzi Jesús: “Aritaki piñaakiri, tema riitaki kenkitha-waeta-kaakimiri.”<sup>38</sup> Ari rotziwerowanaka irika atziri ipinkatha-tanakiri Jesús, ikantziri: “Nawentaakimi Pinkathari.”<sup>39</sup> Ikantzi Jesús: “Rootaki nopolitan-takari naaka naminayi-teeri ojaawijatzi, rootaki ikowichaa-tantee-yaari kamampo-waaki-witachari. Riima ikaatzi kowichaa-witachari, ari ikamampo-waakite rirori.”<sup>40</sup> Ikanta ikemaki Inashitantaniri ikaatzi tsipatakari Jesús, ikantakiri: “¿Pikanta-tziima naaka-paeni kamampo-waakiri?”<sup>41</sup> Ari ikantzi Jesús: “Ari poshiyaarimi mawityaakiri eerokapaeni, tekatsi yakawente-mironi pantayitakiro kaari-pero-tatsiri. Rooma pikanteeyini tee pimawityaakitzi, aritaki riyakowentan-teeta-kimiro pipiyatha-takinaha.”

### Roshiya-kaawentee-tziro piratsitanto

**10** <sup>1</sup>Opoñaa ikantzi Jesús: “Eenitatsi-rika kaari kyaatsini ikyaa-piintee-tzira piratsitantotsiki, ikyashi-takyaa-rika onampinaki, riitaki koshintzi irika, riitaki kaari-perori. Omaperotaty.<sup>1.1-27</sup> <sup>2</sup>Riima ikaatzi kyaatsiri jempe ikyaa-piintetzi, riitaki aminako-wenta-piintziriri ipireetari.<sup>3</sup> Tema riitaki aminako-wentzirori ashitakowo ashitaryaa-kopiintziriri ipireetari. Riima aminako-wentziriri ipireetari, riitaki kaemapiintziriri iwaeroki, tema riyopaante-tawaeri rirori. Riitaki omishitowa-paerini.<sup>4</sup> Aririka romishitowakiri maawoeni onkokiroeninta, riitaki jewaterini aminako-wentziriri, royaateeyanakirini ipireetari, tema riyowaante-tziri riitaki aminako-wentziriri.<sup>5</sup> Roo kanteencha teera royaatziri kaari iñaapiintzi, ari ishiya-pithatanakyaari, tema tee riyowaante-tziri.”<sup>6</sup> Ari ikantakiri Jesús rosiya-kaawenziniri, roo kanteencha tee ikematha-teeyirini irikapaeni oeta ikantako-tziri.

### Roshiyari Jesús kameethari aminako-wentan-taniri

<sup>7</sup>Ari rapiita-nakiro Jesús ikantziri: “Naakataki oshiyawori ashitakowo piratsitanto. Omaperotaty.<sup>8</sup> Tema ikaatzi etakawori ipokaki tekiraata nopolitan naaka, rosiya-shitakari koshintzi, kaari-perori irikapaeni. Roo kanteencha teera ikemijanan-teeyirini ipireetari.<sup>9</sup> Naakataki oshiyawori ashitakowontsi. Eenitatsi-rika kyaahatsini noshiyakawo naaka ashitakowontsi, aritaki rawijako-shiretee. Tema rosiya-koteeyaa-yaari ipireetari ipiya-piyata ikyaa-piintzira eejatzi ishitowa-piintzira. Tee okowityaawaetyaa rowanawo.<sup>10</sup> Riima koshintzi apatziro ipoki ikoshite, rowante, ithonkante. Rooma naaka nopolitan nañaaka-shire-takantee.

<sup>11</sup>Naakataki oshiyariri kameethari aminako-wentziriri ipireetari. Tema ikaatzi kameethari aminako-wentziriri ipireetari, ishinewentari ipira.

<sup>12</sup>Roo kanteencha ikaatzi ipineetziri raaminako-wentziri ashinentsi

<sup>1.1-27</sup> piratsitantotsi, ipireetari, ipira, nopian = owisha = oveja

ipireetari, aririka iñaawakiri owamintha-tariri ipireetari, ishiya-pithatari ipireetari, ari rowaetyaari ipireetari rookanakirira aminako-wentziriri, tzimpooka-yitanaki itsipa ipireetari. <sup>13</sup> Rootaki ishiyantari aminako-wentziriri ipireetari, tema apatziro ikoyi ipineeteri. Teera ikowa-perotzi ipireetari raminako-wentziri. <sup>14</sup> Naakataki oshiyariri kameethari aminako-wentziriri ipireetari. Niyoyitziri naaka nopira-paeni. Eejatzi ryotana rirori. <sup>15</sup> Okimitaha riyoperotana naaka Ashitanari, ari nokimitzitari naaka niyopero-tziri rirori. Noshine-wentari naaka nopira-paeni. <sup>16</sup> Eenitatsi itsipa nopira kaari jeekatsini jaka. Otzimatyee namayiteeri rirori jaka. Aritaki ikemijanta-yiteena rirori. Tema apaani ikanteeyaa ipiyoteeyaa. Apaani ikanteeyaa aminako-wentee-rini. <sup>17</sup> Tema noshinetakiro naaka nañaa-mento napiitan-teeyaawori nañahae. Rootaki retakotantanari Ashitanari. <sup>18</sup> Tekatsi shintsi-tenani, naakataki shineta-shiteencha. Otzimimotana noshintsinka noshine-tantakari, rootaki napiitan-tyaawori nañahae. Roo ikantakinari Ashitanari nantero.”

<sup>19</sup> Ikanta ikemaeyakini Judá-paeni okaatzi ikantakiri Jesús, itsiparyaa-wakaanaka ikaawitee-yanira. <sup>20</sup> Eenitatsi osheki kantaneen-tsiri: “¿Itaka pikemijanan-tariri? Ikamaari-tatzii, rootaki ishinki-wentantari.” <sup>21</sup> Eenitatsi itsipa, kantsiri: “Ikamaari-tatyeemi irika eero iñaawae-tziromi iroka ñaantsi. ¿Kantachama kamaari retsiya-takota-kaeri mawityaki-witachari?”

### Ikijaneenta-nakiri Judá-paeni irika Jesús

<sup>22</sup> Tema kyaawontsi-tapae. Ari roemoshirenkae-tziro tajorentsi-panko janta Aapatziyaweniki. <sup>23</sup> Ari ijekitakari rirori Jesús tajorentsi-pankoki, ranashi-waeta awija-nampitzira tajorentsi-pango iiheetziro “Salomóntapi.” <sup>24</sup> Ari ipiyowenta-paakiri Judá-paeni, ikantapaakiri: “¿Jempema okaatzika pikaero poñaashirenkayitakina? Eeroka-rika Jeepatzii-toetani, anjatyaa pooñaawontenawo.” <sup>25</sup> Rakanaki Jesús ikantzi: “Aritaki nokaman-tawitakimi eerokapaeni, tee pikemijantziro. Okaatzi antakaa-yitakinari itajorenka Ashitanari, oñaahanta-pero-takiro kameetha. <sup>26</sup> Roo kanteencha tee pikemijantee-yanitzi eerokapaeni, tee poshiya-kaantyaa eerokami nopira. <sup>27</sup> Ikaate oshiyanee-yaarini riyowaantetana nopira, niyotzitari naaka. Royaayitana rirori-paeni. <sup>28</sup> Naakataki añaakaa-yiteerini. Eero ipeyawaeta, tekatsi aapitha-tenarini. <sup>29</sup> Ikaatzi ipakinari Ashitanari, tekatsira aapitha-teenarini, riitaki mateerori ririiperotee, riitaki awija-pero-tanta-tsini. <sup>30</sup> Itsipa-shiretana Ashitanari, kimiwitaka apaanimi nokantyaa.”

<sup>31</sup> Ari rapiwi-takawo Judá-paeni raawitanaa mapi ikoyi rompojirimí, <sup>32</sup> ikantanaki Jesús: “Tema osheki kameethari piñaako-takinari eerokapaeni antakaa-kinari itajorenka Ashitanari. ¿Jempema otzimika powamaa-wentenari?” <sup>33</sup> Ikanteeyini Judá-paeni: “Tee roo

nokowan-tyaari nowamaa-wentemiro kameethari okaatzi pantayi-takiri, roo nowamaa-wentemiri pitheenka-tajorentsi-takiri Tajorentsi. Tekatsi piitamatsityaa eero ka, tema eero atziri, roo kanteencha poshiya-kaanta-waetaka eerokami Tajorentsi.”<sup>34</sup> Ikantzi Jesús: “Iroka ojankina-takota Ikantakaan-teetani,

Naaka kantatsini: ‘Eerokayitaki Tajorentsi.’

<sup>35</sup> Ari ayoteeyironi Jankinarentsi-perori, tee okamethatzi atekañaanetero. Riitaki Tajorentsi iitakiriri atziripaeni ‘Tajorentsi’ ikaatzi riyotakaa-yitakiri iñaani. <sup>36</sup> ¿Itaka pikantan-tanari eero ka-paeni notheenka-tajorentsitaki nokantaki naaka Itomi Tajorentsi? Tema naakataki riyoyaaki, rotyaantakina nopoiki kepatsiki. <sup>37</sup> Eerorika nantayi-tziro naaka okaatzi rantziri Ashitanari, eero pikemijanteeyini. <sup>38</sup> Roo kanteencha piñaakina nantayi-tziro, okantawityaa eero pikemijantana naaka, roo pikemijante okaatzi notajonka-wentan-tayitaki, rootaki piyopero-tantee-yaari apaani nokantanaa Ashitanariki, eejatzi apaani ikantanaana rirori.” <sup>39</sup> Ari rapiwi-tanaawo Judá-paeni ikoyi raakaanterimi, roo kanteencha Jesús ishiya-pitha-tanakari.

<sup>40</sup> Piyanaka Jesús katonkonta Parenkaariki. Ari ijekapae jempe romitsiryaatantaki paerani Juan. <sup>41</sup> Osheki atziri jatashi-takiriri iñeeri Jesús. Ikanteeyini: “Okantawitaka tee itajonka-wentan-tawita rirori Juan, roo kanteencha okaatzi ikenkitha-takota-kiriri irika atziri, omoperotatyá iroka.” <sup>42</sup> Tema osheki kemjanta-kiriri Jesús janta.

### Ikamantakari Lázaro

**11** <sup>1</sup>Eenitatsi apaani mantsiyari iitachari Lázaro, riitaki nampitawori Ashironkaaweniki, itsipatawo ritsiro, María eejatzi Marta. <sup>2</sup>(Iroka María ritsiro Lázaro, rootaki jeetanta-kariri kajankaari iitziki Awinkatharite, oshetan-tanaari oeshi.) <sup>3</sup>Okanta ritsiro-paeni Lázaro, okaemakaan-takiri Jesús, okantziri: “Pinkathari, imantsiya-tatzii pitsipa-minthari.” <sup>4</sup> Ikanta ikemawaki Jesús, ikantanaki rirori: “Iroka mantsiyarentsi tee owamaantzi, tema ari iñahaeterori itajorenka Tajorentsi, eejatzi rashí Itomi.”

<sup>5</sup> Tema retako-perotani Jesús iroka Marta, María, eejatzi Lázaro. <sup>6</sup> Ikemawitaka ikamantee-tziri imantsiya-tatzii Lázaro, eekiro ijekana-kitzii okaatzi apite kitejeri janta. <sup>7</sup> Ipoñaa ikantaneeri riyotaani-paeni: “Jame apiyee iipatsiteki Judá-paeni.” <sup>8</sup> Ikanteeyini riyotaani: “Yotaanarí! Owakira ikoyi rompojimi Judá-paeni janta, eekiro pikowatzii pipiyanee janta.”<sup>h</sup> <sup>9</sup> Ikantzi Jesús: “¿Tema ojamani okanta apaani kitejeri? Ikaatzi anashita-chari kitejeriki, tee rantziwa-waeta, tema eenitatsi koñeetyaatsiri jaka kepatsiki.”<sup>11.9-10</sup> <sup>10</sup> Riima anashita-chari tsireni-riki,

<sup>h</sup> 11.8 Yotaanarí = Rabí 11.9-10 apaani kitejeri = 12 hora

rantziwa-waeta, tema tekatsi koñeetyaatsiri.”<sup>11</sup> Eekiro ikantana-kitzii Jesús: “Makoryaaki atsipá-minthari Lázaro, roo kanteencha otzimatayee niyaate nowiriinteri.”<sup>11.11-13</sup> <sup>12</sup> Ari ikanteeyini riyotaani: “Pinkathari! Aamaashitya aritakirika retsiya-takotee, tema imakoryaatzii.”<sup>13</sup> Tema ikantawi-tatyaa Jesús kamaki Lázaro, roo kanteencha ikenkishireeyani riyotaani ikenkitha-takota-tziiro makoryaantsi.<sup>14</sup> Ari roonaaawonta-nakiro Jesús, ikantzi: “Kamaki Lázaro.<sup>15</sup> Osheki nokimo-shiretaki tee nojeeki janta, rootaki pikemijanta-pero-tantyaari eeroka. Roo kanteencha otzimatayee aate aminiri.”<sup>16</sup> Ikanta Tomás iiheetziri “Tsipari”, ikantanakiri itsipa riyotaani-paeni Jesús, ikantziri: “Jame oyaatanakiri, amini eerorika rowamahaetee aaka.”<sup>i</sup>

### Riitaki Jesús owiriintan-taniri, añaakaan-taniri

<sup>17</sup>Ikanta rareeta-paaka Jesús, ikemapaaki okaataki 4 kitejeri ikiteetan-takariri Lázaro.<sup>18</sup> Tee intena-perotzi ojeeki Ashironkaaweni nampitsi Aapatziyaweni.<sup>j</sup> <sup>19</sup>Tema osheki Judá-paeni pokayiteen-tsiri roemoshirenkiro Marta ejatzi María ikamakira iyaariri.<sup>20</sup> Okemaki Marta areetapaaka Jesús, jatanaki otonkiyo-tawakari. Rooma María roojatzi ojeekaki pankotsiki.<sup>21</sup> Okantawakiri Jesús iroka Marta: “Pinkathari! Ari pijeekimi eeroka jaka, eeromi ikamimi aarini.<sup>22</sup> Roo kanteencha niyotzi naaka okaate pikowako-teriri eeroka Tajorentsi, aritaki imatakimiro.”<sup>23</sup> Ikantziro Jesús: “Aritaki ipiriintee piyaariri.”<sup>24</sup> Okantzi Marta: “Niyotzi naaka aritaki ipiriintee paata oweyaantyaawoni kitejeri ipiriintee-rika ikaatzi kamayiteen-tsiri.”<sup>25</sup> Ikantzi Jesús: “Naakataki owiriintan-tatsiri, naakataki añaakaan-tatsiri. Ikaatzi kemijanteenani naaka, okantawityaa ikami, aritaki rañahae.<sup>26</sup> Tema ikaatzi añaayita-tsiri nimaeka, ikaatzi kemijantaanari naaka, aritaki rañahae ikamawi-takyaa-rika. ¿Pikemijantziroma iroka?”<sup>27</sup> Okantzi Marta: “Nokemijantzimi Pinkathari, tema eeroka Jeepatziitoetani, Itomi Tajorentsi, pokaentsiri jaka kepatsiki.”

### Riraakotapaakari Jesús ikiteetakirira Lázaro

<sup>28</sup> Ari okaatzi okenkithawaetakaakiri Marta, jatanaki okaemiro María, irento, okamanta-thata-paakiro, okantziro: “Areetapaaka yotaantaniri, ikaemimi.”<sup>29</sup> Okanta okemawaki roori, intsipaete okatziyanaka, oshiyashi-tanakari oñaawakiri Jesús.<sup>30</sup> Tekiraata rareetyaa Jesús nampitsiki, roojatzi ijekaki janta otonkiyo-tawakarira Marta.<sup>31</sup> Ikanta Judá-paeni ikaatzi tsipata-kawori opankoki María roemoshirenkiro, tema iñaawakiro intsipaete okatziyanaka iyaatanaki, royaatee-yanakironi

---

<sup>11.11-13</sup> makoryaantsi = mahaantsi    <sup>i</sup> **11.16** Tsipari = Dídimo    <sup>j</sup> **11.18** tee intena-perori = 3 kilómetro = 15 estadio

roshiya-kaantzi iraawaeta-tyeeyaa kitataa-rewoki.<sup>32</sup> Okanta areetapaaka María ijeekakira Jesús, otziwerowa-shita-paakari okantapaakiri: “¡Pinkathari! Ari pijeeekimi eeroka jaka, eero ikamimi aarini.”<sup>33</sup> Ikanta iñaakiro Jesús irayimo-tapaakari María, ari ikantzi-tapaakari Judá-paeni ikaatzi oyaatapaa-kirori, otsinkashiryaa-nakiri rirori, antawo okatsitzimo-shire-tanakiri.<sup>34</sup> Ari rojampi-tanakiro, ikantziro: “¿Jempema pikitataki-rika?” Ari ikantee-tanakiri: “Pipoki Pinkathari, piñeeri.”<sup>35</sup> Ari riraapaakari rirori Jesús.<sup>36</sup> Ari ikantee-yanakini Judá-paeni: “¡paminerí, osheki retakoperokari rirori!”<sup>37</sup> Eenitatsi itsipa Judá-paeni kantaneenttsiri: “Riiwitaka irika aminakaeriri mawityaakiri, ¿iitaka kaari raminanta jempe ikinakaero eero ikamanta Lázaro?”

### Rañaantaari Lázaro

<sup>38</sup> Ari rapiita-nakiro Jesús okatsitzimo-shire-tanakiri, riyaatashta-nakiri jempe ikiteetakiri. Tema omoo iroka, antawo mapi rashitakoe-tanta-kariri.<sup>39</sup> Ikantzi Jesús: “Poteenkiro mapi.” Ari okantzi Marta, ritsiro kamaentsiri: “¡Pinkathari! Aamashitya shitzitakirika, tema kaatakotaki 4 kitejeri ikamantakari.”<sup>40</sup> Ikantzi Jesús: “¿Tema nokantzitakimi aririka pikemijantena aritaki piñaakiro itajorenka Tajorentsi?”<sup>41</sup> Tema roteenkaetakiro mapi. Ari raminanaki Jesús inkiteki, ikantanaki: “Ashitanari, namanimi eeroka, tema pikemakina.”<sup>42</sup> Niyotzi ari pikanta-piintatyaa pikemana. Rootaki nokantan-tzimiri ikemantyaari atziri-paeni ikaatzi piyoteen-chari jaka, rootaki ikemijantanteemiri eeroka otyaanta-kinari.”<sup>43</sup> Ikanta iñaawae-takiro iroka ñaantsi, ishintstanakiro ikaemanaki ikantzi: “¡Lázaro! ¡Pishitowae!”<sup>44</sup> Tema shitowapae kamawiteen-chari roojotakawo manthaantsi rakoki eejatzi iitziki, roojatzí iponawoo-takawo ipona-tantee-tawakariri. Ikantzi Jesús: “Piponaryaaakoteeri, riyaateeta.”

### Ikaantza-wakaeta rowamaa-kaanteri Jesús

(Mt. 26.1-5; Mr. 14.1-2; Lc. 22.1-2)

<sup>45</sup> Rootaki ikemijanan-tanakari osheki Judá-paeni ikaatzi jateentsiri oyaatanakirori María, ikaatzi ñaakirori rantakiri Jesús.<sup>46</sup> Rootaki kanteencha eenitatsi itsipa Judá-paeni jatashi-takiriri Inashitantaniri-paeni. Ikaantza-paakiri okaatzi rantakiri Jesús.<sup>47</sup> Rootaki ipiyotan-tanakari Inashitantaniri-paeni, eejatzi reewari Omperatajorentsita-rewo, tema riyoshiita ipiyotee-yakani riiperoripaeni, ikanta-wakahayaeyani: “¿Jempema akantyaaka? Osheki iñeetakiri itajonka-wentantaki irika atziri.”<sup>48</sup> Aririka akema-mintha-tashi-tyaari, aritaki ithonkanakyaa ikemijanteeyanakini maawoeni. Ari ipokaki reewaritepaeni wirakocha, itzimpooka-paakiro tajorentsi-panko, ari ithonkakae maawoeni aakapaeni.”<sup>49</sup> Tema riiwitaka paerani reewari-perote Ompera-

tajorentsitaa-rewo iitachari Caifás, ikantanaki rirori: “Kimitaka tee piyotee-yanitzi eeroka.<sup>50</sup> Tee pikenkeshire-teeyaani rootaki kameethatsini ikama-wenta-yitee apaani atziri, eero ithonkae-tantee anampiki.”

<sup>51</sup> Ikanta Caifás Jewatzi-riri ompera-tajorentsitaa-rewo, iñaawae-takaakiri Tajorentsi. Okantawitaka tee riyatzi, riitaki Jesús ikenkitha-takotaki ikamawenteri isheninka-paeni.<sup>52</sup> Tee apatziro ikamawenteeri Judá-paeni, tema rootaki ipiyotan-teeyaari maawoensi itomipaeni Tajorentsi ikaatzi jeekayi-teentsiri jempe-rika-paeni jaka kepatsiki.<sup>53</sup> Aripaete ikowaeyakini reewarite Judá-paeni rowamaa-kaanteri Jesús.

<sup>54</sup> Rootaki kaari ikowantanaa Jesús itsipata-neeyaari Judá-paeni. Tema shitowanaki jempe inampiwi-takawo, jataki ochempi-mashiki ojeeki nampitsi iitachari Efraín. Ari ijekakaa-paeri janta itsipayi-takari riyotaani-paeni.

<sup>55</sup> Rooteentsi roemoshirenkaero Judá-paeni Anonkoryaantsi, osheki atziri jatatsiri Aapatziyaweniki rowetsika-shire-yityaa.<sup>56</sup> Osheki ramina-mina-witee-takari Jesús, rojampita-wakahayani tajorentsi-pankoki, ikantzi: “¿Jempema pikanteeyini eeroka? ¿Arima ipokaki rirori roemoshirenkaetaha?”

<sup>57</sup> Ikanta Inashitantaniri-paeni eejatzi reewari Ompera-tajorentsitaa-rewo-paeni, ikantan-tayitaki: “Eenitatsi-rika yoteentsini jempe ijeki Jesús, ikamante, naakan-teriita.”

### Ijeetan-teetari Jesús kajankaari

(Mt. 26.6-13; Mr. 14.3-9)

**12** <sup>1</sup>Tema yotapaaka 6 kitejeri roemoshirenkan-teetyaawori Anonkoryaantsi, jataki Jesús Ashironkaa-pankoniki, inampiki Lázaro rañaa-kahaeri. <sup>2</sup>Okanta otsireniityaanaki ari ikaemae-takiri Jesús rakiyoteri itsipa-minthari-paeni. Rootaki oyitian-tatsiri Marta. Ari ijekitakari eejatzi Lázaro itsipatakari Jesús rowaeyani. <sup>3</sup>Amakata-paaki María kajankaari. Osheki owinawo iroka. Ojeetan-takari iitziki Jesús. Oshetan-tanaari oeshi. Kajankaenkatanaki maawoensi pankotsiki.<sup>k</sup> <sup>4</sup>Ikanta Judas Nampitsi-weri, riyotaani Jesús pithoka-shityaarini paata, ikantanaki rirori: <sup>5</sup>“¿Oetaka kaari ipimantee-tantawo iroka kajankaari? Ari aakimi osheki koriki, riitaki apashit-yaaririmi ashironkaenkari-paeni.”<sup>l</sup> <sup>6</sup>Teera roo ikantan-tyaari Judas retakotatyaarica ashironkaenkari-paeni, tema koshintzi rirori. Riitaki kempoyaa-witariri koriki, roo kanteencha ikoshita-piintziri eepichokiini. <sup>7</sup>Ikantzi Jesús: “Piñaashi-tyaawo, tema rootaki okashiya-kaawentakinari

<sup>k</sup> 12.3 kajankaari = nardo; owinawo = apaani libra = 300 gramo    <sup>l</sup> 12.5 osheki koriki = 300 denario. Riitaki ipineetziriri antawae-tatsiri apaaniojarentsi.

aririka ikiteetakina paata.<sup>8</sup> Riima ashironkaen-karipaeni ashi rowaero ijeekimotemi, rooma naaka okapichoki-tapaaki nojeeki-motaneemii.

### **Ikamanta-wakaeta rowaeteri Lázaro**

<sup>9</sup>Tema osheki Judá-paeni yoteentsiri ari ijeeki Jesús janta Ashironkaapankoniki. Riyaaatee-yanakini janta. Tee apatziro raminiri Jesús eejatzi Lázaro, rañaa-kahaeri Jesús.<sup>10</sup> Roo kanteencha ikamanta-wakahae-yakani reewari Ompera-tajorentsitaa-rewo rowamayiri Lázaro.<sup>11</sup> Riitaki Lázaro kantakaan-takirori kaari raripero-tanta-naari Judá-paeni ikaatzi kemijanta-neeriri Jesús.

### **Areeetaa Jesús Aapatziyaweniki (Mt. 21.1-11; Mr. 11.1-11; Lc. 19.28-40)**

<sup>12</sup> Okanta okitejeta-manee, osheki atziri jateentsiri Aapatziyaweniki roemoshirenkiro Anonkoryaantsi. Ari ikemaeyakini ikanteetzi: “Areetapaaka Jesús Aapatziyaweniki.”<sup>13</sup> Ichekae-yanakini oshiyawori kompiroshi. Jateeeya-nakini itonkiyo-tawakyaari, ikaemaeyini ikantzi:

¡Kaakitaki awinkatharite!  
¡Riitaki Tajonka-wentaa-rewo, tema Pinkathari otyaanta-kiriri!  
¡Riitaki Awinkathariperoteeyaari aakapaeni Israel-paeni!<sup>m</sup>

<sup>14</sup> Ari iñaapaaki Jesús ewonkiri ikyakoetari, ikyako-tanakari, tema riitaki ikenkitha-takoe-tzitakari paerani Jankinarentsiki, ikanteetaki:<sup>12.14-15</sup>

<sup>15</sup> Kijakowentoni-jato, eero pithaawaeyini,  
Pokakira Piwinkatharite,  
Ikyako-takari ewonkiri ikyakoetari.

<sup>16</sup> Teera ikematha-witawo riyotaani-paeni Jesús owakira ikemawakiro. Roo kanteencha roenoka-shitan-taawori Jesús rowaneenkawo, aripaete ikenkishireeya-nakani, riwitaka Jesús rojankina-takoetzi.<sup>17</sup> Tema osheki ikenkitha-takoyi-taneero okaatzi iñaakiri atziri-paeni itsipatakari paerani Jesús rañaakaan-taariri Lázaro.<sup>18</sup> Rootaki riyaatan-tayita-nakari atziripaeni itonkiyo-tawakari Jesús, tema ikemako-takiri rañaakaeri kamawita-chari.<sup>19</sup> Riima Inashitantaniri-paeni ikanta-wakahae-yanakani rirori: “Piñaakiro, kimitaka eero otsinampaeri. Paminiri, rootaentsi riyataa-shiteri maawoeni.”

### **Ñaawaetzirori Igrecia-thate ikoyi iñeeri Jesús**

<sup>20</sup>Eenitatsi wirakocha-paeni intentayitanakari ikaatzi jateentsiri roemoshirenkaeyani.<sup>21</sup> Ikanta wirakocha-paeni rontsiroka-paakari Felipe,

<sup>m</sup> **12.13** Kaakitaki awinkatharite = Hosana; Waerontsi    **12.14-15** ikyakoetari = asnillo, asna

poñaachari Shima-pankoniki nampitsi jeekatsiri Tepoweneki. Ikantapaakiri: “¡Pinkathari! Nokoyi noñeeri Jesús.”<sup>22</sup> Jatanaki rirori Felipe, ikamanta-paakiri Andrés. Apitekiro riyaatanaki, ikamantakiri Jesús.<sup>23</sup> Ari ikantzi Jesús: “Monkaata-paaka roenoka-shitan-teeyaaawori rowaneenkawo Itomi Atziri.<sup>24</sup> Tema apaani okithoki kaari kamaki-tatsini aririka ipankiitero, ashi oyiro okaamatsite apaani okithoki. Rooma aririka okamaki-tapaente ipankiitero, aritaki iñahaeteero okithoki-perotee. Omaperotatyá.”<sup>n</sup>

<sup>25</sup> Eenitatsi-rika etakota-wae-tachari rantayi-tziro ikowa-shiwaetari, aritaki ipeyashi-teeyaa. Riima ikaatzi maninteeroni ikowashawaetari rantayitziri jaka kepatsiki, ikamawenta-naatziiro rañaantee-yaari.<sup>26</sup> Eenitatsi-rika kowatsini noshiya-kaanteri nomperatani, roshiya-kotenawo naaka. Jemperi-rika nojeeke naaka, aritaki ijekitee-yaari rirori nomperatani. Eenitatsi-rika nokimita-kaari nomperatani naaka, riitaki Ashitanari kantakae-yaawoni ipinkathee-tantyaariri paata.”

### **Ikamantakota Jesús rowamahaeteri**

<sup>27</sup>“¡Antawoete okantzimo-shire-takina nimaeka! ¿Jempema nokanteka? ¿Nokantema: ‘Ashitanarí, powatsinaryaako-shire-teena?’ ¡Tema rootaki nopokan-takari, nomonkaa-teero!<sup>28</sup> Ashitanarí, poñaahantero pitajorenka.” Ikemaetatzii ñaawaeta-neentsiri inkiteki, ikanteetzi: “Tema noñaahan-takiro, nimaeka napiitero.”<sup>29</sup> Ikemaki atziri-paeni piyoteen-chari, ikantee-yanakini: “Ookatha-rentsira iroka.” Roo kanteencha ikantzi itsipa-paeni: “Tema apaani ronampiri Tajorentsi ñaanata-kiriri.”<sup>o</sup> <sup>30</sup>Ikantanaki Jesús: “Tee apatziro naaka iñaanatana, tema eeroka-paeni iñaawae-wentaki.<sup>31</sup> Rooteentsi iñeeteri rowajankitaan-te jaka kepatsiki, rotsinampae-teeri pinkathari-wentziriri jaawiki-jatzipaeni.<sup>32</sup> Roo kanteencha aririka rowatzika-koetakina jaka kepatsiki, aritaki nokaema-shire-teeri maawoeni.”

<sup>33</sup> Ari rooñaawontzirori Jesús jempe okantyaa aririka rowamahae-takiri. <sup>34</sup> Ari rakaeya-nakini atziri-paeni, ikantzi: “Iyoteeyironi ikantee-tziri Ikantakaan-teetani: ‘Tema Kañaaniri Jeepatziitoetani.’ ¿Itakama pikantantari eeroka otzimatyeer rowatzika-koeteeri Itomi Atziri? ¿Jempema iitatyaaka iieteetziri Itomi Atziri?”<sup>35</sup> Ikantzi Jesús: “Eeniro ijekimo-taneemi ikantee-tziri ‘Koñeetyaatsiri,’ apatziro ijekanee eepichokiini. Poshiya-kaantero panashiteemi okoñeetyeera, eero omapokan-tzimi oshiyawori tsireniri. Tema ikaatzi anashitachani otsirenikaakitzira, tee iñeero jempe ikini.<sup>36</sup> Pikemijanteeri iieteetziri ‘Koñeetyaatsiri’ eeniro ijekimo-yitzimi, poshiya-kotyaari rirori.”

### **Tee ikemijanteyini Judá-paeni**

Ithonka-nakiro iñaawae-takiro iroka, shitowanaki Jesús. Tee roñaahan-tanaa.

<sup>n</sup> 12.24 okithoki = triho    <sup>o</sup> 12.29 Waerontsi

<sup>37</sup>Okantawitaka osheki itajonka-wentantaki Jesús inampiki isheninkapaeni, tee ikemijanteeyini. <sup>38</sup>Otzimatyee omonkaatyaa rojankina-takiri Kamantan-taniri Isaías, kantatsiri:

¡Pinkathari! ¿Iitaka kemijanteroni añaani?

¿Itzimikama roñaahakiri ishintsinka Tajorentsi?<sup>p</sup>

<sup>39</sup>Iroka otsipa rojankina-takiri Isaías, rootaki kaari ikemijantan-teeta, ikantaki paerani:

<sup>40</sup>Riitaki Tajorentsi mawityaaki-takaa-kiriri,

Imajontzi-takaa-yitakiri,

Rootaki eero ikowichaa-tanta,

Eero ikematha-tantawo.

Ari okantyaa eero ipiyashi-tantaana naaka,

Nowawijaa-kotan-teeyaariri.

<sup>41</sup>Roo iñaawae-tanta-kawori iroka Isaías, tema iñaashireta-kitziiro rowaneenkawo Jesús, rootaki ikenkitha-takotan-takariri. <sup>42</sup>Okantawitaka okaatzi kanteen-chari, osheki Judá-paeni kemijanta-neeriri Jesús, imatzita-nakawo pinkathari-paeni. Roo kanteencha tee ithawetakotziro ithaawantatyaaari Inashitantaniri-paeni, eero romishitowan-tari ikyaa-piintzira jempe ipiyota-piinteyani. <sup>43</sup>Ari okantzimaetaka. Riitaki ikowa-perotakiri raapatzyaari Inashitantaniri-paeni, riima Tajorentsi, te ikoyiri.

### Jesús iyakowenteerini atziri-paeni

<sup>44</sup>Ari ishintsitanaki icheraanaki Jesús, ikantanaki: “Ikaate kemijanteenani naaka, tee apaniro ikemijantana, tema ikemijantzi-takari otyaanteri. <sup>45</sup>Ikaatzi ñahaenani naaka, okimiwi-takawo riimi iñahaerimi otyaanta-kinari. <sup>46</sup>Rootaki nopal-takari naaka, noshiyee-yaari ‘Koñeetyaatsiri,’ nokoñee-tyakoteeri jaawiki-jatzi. Eero ijekayitee otsireni-kaakitzira ikaate kemijanteenani. <sup>47</sup>Tee roo nopal-tyaari jaka kepatsiki nowajankitaante, tema nopalatzii nowawijaa-kotante. Roo kanteencha ikaatzi kemawitawori noñaani, tee ikemijantzi, te naaka owajankiteerini. <sup>48</sup>Eenitatsi-rika maninta-kinani, kaari kemijanteeroni noñaani, tzimaki owajankiteerini. Kimiwaetaka iroka ñaantsi-paeni okaatzi noñaawae-yitakiri atziritanakyeeemi, rootaki owajankitaan-tatsini paata, ipiyatha-waante-teetakina. <sup>49</sup>Tema tee noñaawae-tashi-waetyaa naaka apaniroini, tema riitaki Ashitanari otyaanteri, riitaki kantakinari okaatzi nokanta-yitakiri eejatzi niyotaan-tayitakiri. <sup>50</sup>Niyotziro naaka ikantakan-tziri Ashitanari, rootaki aña-kaanta-tsini. Ari okantari, okaatzi nokanta-yitziri naaka, nothotyaa-tziiro okaatzi ikanta-kinari Ashitanari.”

<sup>p</sup> 12.38 ishintsinka = rako

### Ikewiri iitziki Jesús riyotaani-paeni

**13**

<sup>1</sup>Tema yotapaaka apaani kitejeri roemoshirenkae-tziro Anonkoryaantsi. Tema riyotaki Jesús monkaata-paaka rookantaneeyaaawori kepatsi, rooteentsi riyaatee itsipata-paeyaari Ashitariri. Antawo retakotakari ikaatzi kemijanta-kiriri, tema ari ikanta-piintatayaa retakotari roojatzi omonkaa-tanta-paakari maawoeni.

<sup>2</sup>Tekiraata rowae-yaani, ikaaripero-shire-takae-takari Kamaari irika Judas, itomi Simón Nampitsi-weri, ikowaki ipithoka-shityaari Jesús. <sup>3</sup>Tema riyotzi Jesús riitaki Tajorentsi otyaanta-kiriri. Riyotzitaka aritaki riyaatee itsipata-paeyaari Tajorentsi, tema riitaki Iriri, riitaki shintsi-pero-takaeriri.

<sup>4</sup>Ikanta rowae-yanira, ari ikatziya-nakari Jesús, raatonkoryaa-nakawo iithaari, rowathaki-tanakawo apaani maathaantsi. <sup>5</sup>Opoñaashita raaki nijaa ijakiro kewaako-mentotsiki. Ikewa-kiri iitziki riyotaani, roshetantanaari iitziki maathaantsi rowathaki-takarira.<sup>13-5-17</sup> <sup>6</sup>Roo ikewirim iitziki Simón Pedro, ikantanakiri: “¡Pinkathari! ¡Eerokama kewinani noetziki naaka?” <sup>7</sup>Ikantzi Jesús: “Tee pikematha-tziro nimaeka okaatzi nantziri, roo kanteencha aritaki pikematha-teero paata.” <sup>8</sup>Ikantzi Pedro: “¡Tee nokoyimaeta pikewina noetziki.” Ikantzi Jesús: “Eerorika nokewimi piitziki, teera paapatziyana.” <sup>9</sup>Ikantzi Simón Pedro: “¡Pinkatharí! Eero pikewa-shitana noetziki, tema pikewatyeena maawoeni nakoki eejatzzi noetoki.” <sup>10</sup>Ikantzi Jesús: “Ikaatzi owakira pakaana-kirori ikaawoshita, apatziro ikoyi ikewaneero iitzi, tema kitetaki maawoeni iwathaki. Tema kitetee-yakimini eeroka-paeni, okantawitaka tee maawoeni pikite-shire-teeyini.” <sup>11</sup>Tema riyotakiri Jesús itzimi pithoka-shityaarini, rootaki ikantan-takari: “Tee maawoeni pikite-shire-teeyini.”

<sup>12</sup>Tema ikaatakiro ikewa-kiriri iitzi riyotaani-paeni, ikithaa-tanaawo iithaari, jeekapae jempe rowaeyani, ikantziri: “¡Pikematha-takiroma eeroka-paeni okaatzi nantakiri? <sup>13</sup>Tema pikanta-piintakina eeroka-paeni ‘Yotaanarí, Pinkatharí.’ Omaperotatyá pikantanari eeroka-paeni, naakataki. <sup>14</sup>Tema naaka ‘Yotaantaniri,’ naaka ‘Jewari’. Roo kanteencha noshiyakari omperataarewo nokewakiro piitziki, ari pikimityaari eeroka-paeni pikewa-wakaayiteya piitziki. <sup>15</sup>Aritaki noñaaha-kimirori naaka jempe ikantee-tziro, rootaki pimayita-neeri eeroka-paeni. <sup>16</sup>Teera añee pinkatha-terini omperataarewo rawijiri omperatariri ipinkatheeeri. Teera añee eejatzzi otyaantaarewo rawijiri otyaantziriri. Omaperotatyá. <sup>17</sup>Aririka pikematha-taneero iroka, aririka pantayi-taneero, ari ikimo-shire-wenteetakimi eeroka. <sup>18</sup>Iroka nokantemiri, roo kanteencha, tee maawoeni nokanta-kotemi. Tema niyotziri naaka ikaatzi niyoshii-yiteeri. Ari omonkaa-tyaari Jankinarentsi-perori, ikanteetaki:

<sup>13.5-17</sup> Ikewa-kiri iitziki

Irika akiyota-kinari naaka, riitaki pithoka-shitenani.

<sup>19</sup>Nokamantzi-tatziimiro nimaeka, tema aririka omatakyaa, rootaki pikemijanta-pero-tanteenari ‘Naakataki’. <sup>20</sup>Eenitatsi-rika aapatziyaaarini notyaantani, naaka raapatziyaka. Eenitatsi-rika aapatziyaaarini naaka, riitaki raapatziyaka otyaanta-kinari.”

**Ikamantzi Jesúس riitaki pithoka-shityaarini Judas**  
*(Mt. 26.20-25; Mr. 14.17-21; Lc. 22.21-23)*

<sup>21</sup>Ari ikaatakiro ikenkitha-takotakiro iroka-paeni, antawo okatsitzimo-shire-tanakiri Jesúś. Ikantzi: “Pikaatee-yakini eeroka jaka eenitatsi apaani pithoka-shitenani. Omaperotatya.” <sup>22</sup>Ari ramina-wakaanaka riyotaani-paeni, tee Riyotzi jempe itzimi ikenkitha-takotziri. <sup>23</sup>Ikanta retako-perotani riyotaani Jesúś, tsipata-kariri ijeekakira rowaeyani. <sup>24</sup>Iñaana-chera-tanakiri Simón Pedro, ikantziri: “Pojampiteri jempe itzimi ikenkithata-kotziri.” <sup>25</sup>Ari ishirinka-shita-paakari okaakiini Jesúś, ikantziri: “¡Pinkatharí! ¿Jempema itzimika pithoka-shitemini?”<sup>q</sup> <sup>26</sup>Ikantzi Jesúś: “Itzimi-rika aawakironi nashetakiri eepichokiini ratanteetari, riitaki.” Rashetaki Jesúś eepichokiini ratanteetari, ipakiri Judas Nampitsi-weri, itomi Simón. <sup>27</sup>Ikanta rowawakawo Judas ratanteetari. Ari ikaaripero-shire-takaa-nakiri Kamaari. Ikantziri Jesúś: “¡Judas! Pimatero intsipaete pikenkshire-tzitakari.”<sup>r</sup> <sup>28</sup>Roo kanteencha tekatsi apaani ikaatzi rowaeyani kematha-terini Jesúś iita ikantan-tariri. <sup>29</sup>Roshiya-kaantatzii ikantatziri: “Piyaate pamanante oemoshirenkantyaari.” Tema riitaki Judas oyiriri koriki. Roshiya-kaantzi itsipa-paeni, ikantatziri: “Piyaate pamanante apayiteriri ashironkaenkarí.” <sup>30</sup>Ikanta ithonka-nakiro rowanakawo Judas ratanteetari, jatanaki. Tema tsireni-tanaki.

**Owakirari Ikantakaan-teetani**

<sup>31</sup>Tema jatanaki Judas, ikantzi Jesúś: “Monkaata-paaka nimaeka roenoka-shitan-teeyaaawori rowaneenkawo Itomi Atziri. Ari iñahaeteerori eejatzi rowaneenkawo Tajorentsi. <sup>32</sup>Aririka iñahaeteerori rowaneenkawo Tajorentsi, iñahaetzi-tyawori eejatzi rowaneenkawo itomi, riitaki Tajorentsi oñaahan-teeroni. Nimaekaha roñaahantero. <sup>33</sup>Notyomiite, kapichoki-tapaaki nojeeki-mota-neemi. Osheki paminamina-witeena, eero piñahaana. Roo kanteencha aritaki nokantzi-takari asheninka-paeni Judá-paeni, roojatzi napii-tzitemiri nokantemiro eerokapaeni: ‘Eero pimatziro piyaatee jempe nojeekeae naaka.’ <sup>34</sup>Iroka owakirari nokanta-kaantani: ‘Otzimatyee petakotawakaayiteeyaa.

---

<sup>q</sup> 13.25 okaakiini = ishipaneeki    <sup>r</sup> 13.27 Kantako-tachari jaka “ikaaripero-shire-takaa-nakiri Kamaari” tee roo kantakaan-teroni rowawakawo Judas owanawontsi, ikaaripero-shire-tanta-nakari, tema riitaki kowashi-takawori ikaaripero-shire-tanta-nakari.

Nokimita naaka netakoyi-tzimi, ari pikimitaneeyaari eerokapaeni, petakotawakaayiteeyaa.<sup>35</sup> Aririka petakotawakahaea eerokapaeni, ari riyoeteemi maawoeni eerokayitaki niyotaani.”

**Ikenkitha-takotziro Jesús rookawentantya Pedro**

(Mt. 26.31-35; Mr. 14.27-31; Lc. 22.31-34)

<sup>36</sup> Ikanta Simón Pedro rojampi-tanakiri Jesú: “¡Pinkathari! ¿Jempema piyaateka?” Ikantzi Jesú: “Janta niyaatenta naaka, eero omata poyaatena nimaeka, rooma paata aritaki omatakyaa poyaatena.” <sup>37</sup>Eekiro ishintstatzii Pedro, ikantzi: “¡Pinkathari! ¿Iitaka eero omatanta noyaatemi nimaeka? ¡Aritaki noshine-wenta-kimi naaka!” <sup>38</sup>Ikantzi Jesú: “¿Omaperotatyama pishine-wentena? Tekirarika iñeeta tyaaa, mawa pikante: ‘Tee niyotziri Jesú.’ Omaperotatyaa.”

**Roshiyawo Jesús Awotsi Rareetan-teetari Ashiteeriki**

**14** <sup>1</sup>“Eero powashire-waeteeyani. Pawentee-yaari Tajorentsi, pawenta-yina ejatzi naaka. <sup>2</sup>Janta ipankoki Ashitanari eenitatsi osheki jempe anampita-paeyaawo. Eeromi otzimi, eero nokantzimi niyaatee nowetsika-paemi jempe pinampi-yitapae-yaawo eerokapaeni. <sup>3</sup>Aririka niyaatee, nowetsika-yiteemi jempe pijepae. Opoñaashitya nopyashi-teemi, naaka-taki aaneemini. Pijeka-yitapae nojeeka-paera naaka. <sup>4</sup>Piyotee-yironi eerokapaeni awotsi ryaatan-teetari jempe niyaatee naaka.” <sup>5</sup>Roo kanteencha ikantanaki Tomás: “Pinkathari, tee niyotee-yini jempe piyaate. ¿Jempema nokantyaa niyotan-tyaawori awotsi?” <sup>6</sup>Ikantzi Jesú: “Naakataki Awotsi, Kyaariperori, Añaamentotsi. Apatziro ipampitha-wooki-teetena naaka, aritaki rareetee-takyaa ijekira Tajorentsi, Ashiteeri. <sup>7</sup>Ari piyopero-teenami naaka, aritaki piyoteerimi Ashitanari. Ro kanteencha piyotzimae-taari nimaeka, tema riitaki paminakirika.”

<sup>8</sup> Ikantzi Felipe: “Pinkathari, anjatyaa poñaayinari Ashitzimiri. Tema tekatsi itsipa nokoyiri.” <sup>9</sup>Ikantziri Jesú: “Felipe, aritaki ojamanitaki notsipa-yitakimi eeroka-paeni, ¿tekirama piyotana? Ikaatzi ñakinari naaka, iñaakiri Ashitanari. ¿Iitaka pikantantari: ‘poñaayinari Ashiteeri’? <sup>10</sup>¿Tema pikemijanta-na ari notsipatari Ashitanari, ari itsipatzitana rirori? Okaatzi nokanta-yitziri, teera naaka nintakaa-shityaawomi nokenkitha-takotemiro. Riitaki Ashitanari tsipashire-tanari, riitaki antakaa-yitanawori rantawaeri. <sup>11</sup>Pikemijantena nokantakimi ari notsipatari Ashitanari, ari itsipatzitana rirori. Okompitzi-motzimi-rika nokanta-kimiri, pikemijantaa-jeetena piñaakina notajonka-wentan-tayitaki.

<sup>12</sup> Ikaate kemijanteenani naaka, ari roshiyeedna naaka itajonka-wentan-tayitee. Aritaki imapero-tanakiro itajonka-wentante, awijanakiro

okaatzi iñaakoe-takinari naaka, tema rooteentsi niyaatee naaka notsipa-tapae-yaari Ashitanari. Omaperotaty. <sup>13</sup>Okaate pikowako-yiteenari eerokapaeni pawentahaana, aritaki nomatakimiro. Rootaki ithaamentanteetyaariri Ashitanari, iñahaetero-rika okaatzi itajonka-wentan-tayitaki Itomi.<sup>14.13-14</sup> <sup>14</sup>Okaate pikowako-yiteenari eerokapaeni pawentahaana, aritaki nomatakimiro.”

### **Ikashiya-kaeteeri Ishire tajorentsi**

<sup>15</sup>“Aririka petakoteena, aritaki pikemijanteero nokanta-yitzimiri. <sup>16</sup>Aritaki nokowako-teeri Ashitanari rotyaanteemi otsipa Ookakowentantaniri, <sup>17</sup>Ishire tajorentsi-perori iroka, rootaki tsipata-piintee-mini. Riima jaawi-jatzipaeni eero itsipatari rirori, tema tee iñeeri, tee riyotziri. Rooma eerokapaeni piyotee-yirini, ojeekimo-teemi, rootaki tsipa-shire-tee-minini.

<sup>18</sup>Eero poshiyari miritzi rookawentee-tziri, aritaki nopye notsipa-teeyeemini. <sup>19</sup>Rooteentsi, eero iñaayitaana jaawi-jatzipaeni. Roo kanteencha eerokapaeni aritaki piñaayi-teena, ari pikañaaniyitee, tema naaka kañaaniri. <sup>20</sup>Aripaete piyoyitee notsipa-shiretari Ashitanari, eejatzi eerokapaeni pitsipa-shiretana, ari nokimitzitari naaka notsipa-shire-teemi eerokapaeni. <sup>21</sup>Ikaate kemijanteenani, roñaahan-tziro kyaari-pero retakotana. Rootaki retakotanteeyaariri Ashitanari, eejatzi naaka netakotee-yaari, aritaki noñaaha-yitee-yaari.” <sup>22</sup>Ikanta Judas (kaari Nampsitsi-weri) rojampi-tanakiri: “Pinkathari, ¿Oetaka poñaahan-teenari naakapaeni, eero poñaaha-yitaari itsipa-paeni?” <sup>23</sup>Rakanaki Jesús: “Ikaatzi etakotanari naaka, ikemijanta-waantetana. Rootaki retakotanteeyaariri Ashitanari. Ari notsipatari Ashitanari notsipa-shire-yitee-yaari irika-paeni. <sup>24</sup>Riima kaari etakoteenani, ipiyatha-waante-takina. Tee naaka yotashi-waetyaawoni okaatzi nokantakimiri, tema Ashitanari otyaanta-kinari riitaki yotakaa-yitaki-nawori.

<sup>25</sup>Nokaman-tatziimiro iroka-paeni eeniro nojeeki-moyitzimi. <sup>26</sup>Rooma Ishire tajorentsi, Ookakaa-wentemini, rotyaantemiri Ashitanari poyaateenani, rootaki yotaapaa-kimironi maawoeni, okenkishiryakaemiro okaatzi nokanta-yitakimiri. <sup>27</sup>Kameetha pijeekayitee. Roo kanteencha tee nokenkitha-takota-tziro jempe okanta ijekakaantzi jaawijatzi-paeni. Tema naaka matzirori pijeekan-teeyaari kameetha. Eero powashiretako-waeta-shita, eero pithaawa-shiwaeta. <sup>28</sup>Aritaki pikemayi-takina nokantaki: ‘Rooteentsi niyaatee, roo kanteencha aritaki nopyashi-teemi eeroka-paeni, ari akaatee ajeekayitee.’ Ari petako-pero-tenami, eeromi powashire-waetami nookayi-taneemira, aritakimi pikimo-shire-wenta-kinami piyotaki

<sup>14.13-14</sup> Waerontsi

niyaatatyee Ashitanariki, awija-kinari natzirita-paenzira. <sup>29</sup>Nokaman-tzita-tziimiro nimaeka, aririka omayitakya, pawenteena naaka. <sup>30</sup>Eero nokenkitha-waeta-kaeteemi, tema awotsikitaki Kamaari pinkathari-wentan-tatsiri kepatsiki. Tema tee ipinkathari-wentana naaka. <sup>31</sup>Roo kanteencha otzimatyyee nokemijanteeri Ashitanari, rootaki riyotan-tyaari atziri-paeni netakotari naaka Ashitanari, nantziniri okaatzi ikantanari rirori. Pikatziya-yitanee. Jame aatee.”

### Roshiyawo Jesús oponkitzitha-perori pankirentsí

**15** <sup>1</sup>Eekiro ikantana-kitziiri Jesús riyotaani-paeni: “Naaka kimitawori oponkitzitha-perori pankirentsí. Riima Ashitanari roshiyari pankitzirori. <sup>2</sup>Eerorika okithokitzi otewatha, ichekiro ashitawori. Rooma kithoki-tatsiri, rowameetha-chewa-tziro, rowaankiityaa-kotziro okithoki-pero-tantyaari. <sup>3</sup>Tema kaankiityaa-koyitakimi nimaeka eerokapaeni, okantakaemi ñaantsi-paeni nokaman-tayita-kimirri. <sup>4</sup>Tema tee okithokitzi apaani otewatha pankirentsí chewaryaa-thata-tsiri, otzimatyyee oshookan-tyaawo oponkitzitha. Ari okimitari eerorika poejokirotana naaka, eerowa omata pantayi-teero kameethari. <sup>5</sup>Naaka kimitawori oponkitzitha pankirentsí, rooma eerokapaeni pikimitakawo ochewatha-paeni. Tema ikaatzi oejokiro-tanari naaka, ari nokemi-tzita-kariri rirori, kimiwitaka ikithoki-pero-teemi. Eerorika pitsipa-shiretana naaka, eero pimatziro panterimi. <sup>6</sup>Ikaatzi kaari oejokiro-teenani naaka, ari nooka-wenta-yiteeyaari. Ari ikimiteeyaa wo kamachewa-thata-tsiri pankirentsí, rahaetziro itahaetero. <sup>7</sup>Poejokiro-taneenarika, pikyaaryoo-wenta-neero okaatzi niyotaa-yitakimiri, aritaki imatakimiro Ashitanari okaate pikowako-teeriri. <sup>8</sup>Aririka poshiya-kota-kyawo kithoki-pero-tatsiri pankirentsí, aritaki ryoeteemi eeroka niyotaani. Rootaki ipinkathee-tantyaariri Ashitanari. <sup>9</sup>Osheki netakoyi-takimi eerokapaeni, noshiyakari Ashitanari retakotana naaka. Pinintaa-hae-yaawo netakoyi-teemira. <sup>10</sup>Aririka poetziñaari-kotanee-yaawo pikemijanteero nokanta-yitakiri, ari pinintaa-hae-yaawo netakotzimi, nokimitero naaka nokemijantziri Ashitanari nonintaa-waetawo retakotana. <sup>11</sup>Roo nokamantan-tzimirori iroka-paeni pikimo-shire-tziitan-tyaari maawoeni eerokapaeni, nokimiteero naaka.

<sup>12</sup>Iroka noñaani nokantzi: Otzimatyyee petakotawakaayiteeyaa nokimiteero naaka netakoyi-teemi eerokapaeni. <sup>13</sup>Eenitatsi-rika atsipewentariri ikamawenteri itsipaminthari, roñaahan-tatziiro retakoperotanta. <sup>14</sup>Notsipaminthaperotani eerokapaeni, aririka pantayi-taneero okaatzi nokantzimiri. <sup>15</sup>Ari okaatapaaki nokimi-takaantzimi omperataarewo, tema apaani onampitaa-rewo tee riyotziro okaatzi rantziri omperatariri. Eeroka notsipaminthari-paeni nimaeka, tema nokaman-takimiro maawoeni ikamanta-kinari Ashitanari. <sup>16</sup>Tee

eerokapaeni yoshiitenani, tema naaka yoshii-yiteemi eerokapaeni. Naakataki otyaanta-yitakimiri jempe-rika-paeni, poshiya-koteeyaa-pankirentsi kithoki-pero-tatsiri. Rootaki imatanteemirori Ashitanari oeta-rika pikowako-tenari pawentahaana.<sup>s</sup> <sup>17</sup>Iroka noñaani nokantzimiri: Otzimatyeet petakotawakaayiteeyaa.”

### **Ikijaneenta-nakimi jaawijatzipaeni**

<sup>18</sup>“Aririka piñaayi-takiro ikija-neenta-yitanakimi jaawijatzipaeni, pikenkeshireero ari ikantee-takina naaka ikija-neenta-waetee-takina. <sup>19</sup>Roojatzimi poshiyaa-koyit-yaari jaawija-tziipaeni, aritaki retakoyi-takimimi, ikimita-wakahaa rirori retakotawakaeyani. Roo kanteencha niyoshii-yiteemi naaka, roojatzi pitsipa-witari jaawi-jatzipaeni, rootaki ikijaneentan-tzimiri. Okimiwi-takawo nimaeka kaarimi eeroka jaawijatzipaeni. <sup>20</sup>Pikenkeshiretero nokantzi-takimiri: Teera añee pinkatha-terini omperataarewo rawijiri omperatariri ipinkatheeteri. Ari ikantee-temiri eerokapaeni ikowaete rompojeetemi, ikimii-taakina naaka. Ikaatzi kemijanta-waante-takinari naaka, aritaki ikemijanta-yiteemi eerokapaeni. <sup>21</sup>Rootaki ikowaetan-tyaari rowamahaetemi, tema eeroka niyotaani-paeni. Tema okantakaan-tziro tee riyoteeyirini Tajorentsi otyaanta-kinari jaka. <sup>22</sup>Eero rantayi-tziromi kaari kameethatatsi irikapaeni, eero nopokimi niyotaa-yiteeri. Roo kanteencha eero omataami nimaeka rookakaa-wentee-yaawo iyaari-peronka. <sup>23</sup>Ikaatzi kijaneenta-kinari naaka, ikijaneentzi-takari Ashitanari. <sup>24</sup>Eero otzimimi iyaariperonka, eeromi notajonka-wentzi-moyitziri iñaanta-kawori kaari iñaapiinteetzi. Okantawitaka iñaayitakiro, eekiro ikijaneenta-tyaana naaka, ikijaneentzi-takari eejatzi Ashitanari. <sup>25</sup>Roo kanteencha, rootaki omonkaa-tantyaari jankinarentsi, kantatsiri:

### **Ikijaneenta-shiwaе-teetakina.**

<sup>26</sup>Roo kanteencha aritaki notyaanteemiro Ishire tajorentsi ‘Ookakaawentantaniro’ poñaachari ijeekinta Ashitanari. Rootaki yotashire-takaemini, roojatzi kenkitha-takoteenani kameetha naaka. <sup>27</sup>Tema kameetha pikenkitha-takoyi-teena eerokapaeni, tema pitsipata-piintakina owakira etantana-kawori.”

**16** <sup>1</sup>“Roo nokanta-yitan-tzimiro iroka-paeni, eero pipakaantawo pawentaa-shire-tana. <sup>2</sup>Tema eero ishinetee-tzimi pikyaayitee jempe ipiyota-piinteta. Aritaki rowamahae-takimi, roshiyakaan-tzi rantatziiniri Tajorentsi kameethari. <sup>3</sup>Rootaki rantantawori, tema tee riyotziri Ashitanari, tee niyotzitari eejatzi naaka. <sup>4</sup>Roo kanteencha nokaman-tzita-tziimiro iroka, tema aririka omayitakyyaa paata, pikenkeshiretyaa aritaki nokaman-tzita-kimiro.”

<sup>s</sup> 15.16,21 Waerontsi

### Rantakaan-tziri Ishire tajorentsi

“Teera nokaman-tzitemiro owakirani, tema roojatzi notsipa-yitzimi. <sup>5</sup> Roo kanteencha jatakina nimaeka notsipa-tapae-yaari otyaanta-kinari. Tekatsi apaani ojampitenani, ikante: “¿Jempema piyaateeka?” <sup>6</sup> Apatziro powashire-teeyani pikemakinaha nokaman-takimi. <sup>7</sup> Pikemi nokaman-temiro kyaariperori. Rootaki kameetha-tzimo-tzimi. eerokapaeni niyaatee. Tema eerorika niyaatee, eero opoki iitachari ‘Ookakowentantaniro’ otsipa-shire-teemi. Rooma arika niyaatee, naaka otyaanta-paeroni. <sup>8</sup> Aririka opokapaaki Ishire tajorentsi, rootaki ooñaawonta-paaki-niriri ikenkishire-waetari jaawi-jatzi, tema ikinashi-waetaka ikenkishire-takotziro jempe okantakota kaari-perori, jempe okantakota kameetha-shire-taantsi, jempe okantakota iyakowentaantsi. <sup>9</sup> Ari riyatcaa-yiteeri kaari-perori iroka eerorika ikemijanteetana naaka. <sup>10</sup> Ari riyatcaa-yiteeri rootaki kameetha-shire-tatsiri, nowameetha-shire-tantzi naaka, tema aririka niyaatee ijeekira Ashitanari eero iñahaetaana. <sup>11</sup> Ari riyatcaa-yiteeri jempe okantakota iyakowentaantsi, tema aritaki riyakowentakiri Ashitanari pinkathari-wentziriri jaawi-jatzi.

<sup>12</sup> Eenitatsi osheki nokantemiri, roo kanteencha aritaki awijanakimi okaatzi nokanta-yitakimiri, eero pikematha-tziro nimaeka. <sup>13</sup> Aririka opokaki Ishire tajorentsi, rootaki yotakaa-paaki-mironi maawoeni kyaariperori. Eero iñaawae-tashitawo ikowayi-tziri rirori, tema ikamantan-teero okaatzi ikantziriri Ashitariri. Riyotakaa-yimiro okaate awijatsini paata. <sup>14</sup> Riitaki kemaenani noñaawaetero, rowawijayi-teemiro eerokapaeni, ari riyoeteero nowaneenkawo. <sup>15</sup> Tema okaatzi riyanitziri Ashitanari, roojatzi niyotanitziri naaka. Rootaki nokantantari: ‘Riitaki kemaenani noñaawaetero, rowawijayi-teemiro eerokapaeni.’”

### Powashire-tarika, aritaki pikimo-shire-yitee

<sup>16</sup> “Kapichoki-tapaaki eero piñaayi-taana, roo kanteencha aririka ojamani-witakyaa eepichokiini aritaki piñeena. Tema niyaatatzii naaka ijeekira Ashitanari.” <sup>17</sup> Ari rojampita-wakaanaka ryotaani, ikantzi: “¿Oetaka ikantako-tziri? Ikantayi-takae kapichoki-tapaaki eero añaayiteeri, roo kanteencha aririka ojamani-witakyaa eepichokiini aritaki añaahaeri, tema ryaatatzii ijeekira Ashitariri. <sup>18</sup> ¿Oetaka ikantako-tziri ‘kapichoki-tapaaki?’ Tee akematha-tziri oeta ikantako-tziri.” <sup>19</sup> Tema yotaki Jesúis ikowaeya-tziini rojampiteri ryotaani-paeni, ikantanakiri: “Nokantee-yakimini: ‘Kapichoki-tapaaki, eero piñaayi-taana, roo ojamani-witakyaa eepichokiini aritaki piñeena.’ ¿Rootakima pojampita-wakaa-wentari? <sup>20</sup> Pikemi nokantemi. Oshekira piraawae-teeyaa, powashiretako-waeteyaa eureka-paeni. Riima jaawi-jatzi-paeni osheki ikitzimo-shire-waeteyini. Omawitakyaa powashiretako-waetee-yaani

eeroka-paeni, aritaki piñeero paata pikimo-shire-yitee. Omaperotatyá.

<sup>21</sup> Aririka otzimaa-nitzimate apaani tsinani, okemaatsi-waeta. Roo kanteencha aririka itzimaki eenchaanikite, opeyako-tanakiro okemaatsi-waetaka, osheki okimo-shire-wenteri eenchaanikite. <sup>22</sup> Ari pikantakari eerokapaeni nimaeka, osheki powashire-waetaka. Roo kanteencha aririka nopyiashi-teemi, osheki pikimo-shire-tanee, tekatsi owashireta-kahae-mini. <sup>23</sup> Paata aririka omonkaa-teeyaa nokantakiri tekatsi pojampi-teenari naaka. Tema riitaki Ashitanari payitee-mironi oeta-rika pikowako-teeriri, tema pawentahaana naaka.<sup>t</sup> <sup>24</sup> Pamana-piintziri Ashitanari pikowako-tziri oeyita-rika, pikowako-tashi-waetakari. Rooma nimaeka aririka pikowako-teeri, pawentahae-na naaka. Aritaki pikantyaa pikowakota-piinteri, aritaki imatakimiro, rootaki pikimo-shire-tziitan-teeyaaari.”

### Notsinampaakiro naaka jaawi-jato

<sup>25</sup> “Noshiya-kaawenta-tziimiro okaatzi nokenkitha-takaemiri. Roo kanteencha rooteentsi omonkaa-teeyaa eero noshiya-kaawenteemiro, tema koñaatziro nokenkithatakoteemiri Ashiteeri. <sup>26</sup> Paata eeroka-paeni kowakoteerini Ashitanari oeyita-rika, tema naaka pawentaa-yitaa. Teera naaka kowakowenteemini eeroka-paeni. <sup>27</sup> Tema retakoyiteemi Tajorentsi. Rootaki retakotanteemiri, tema petakoyitaana naaka, pikemijantakina noipoñaawo naaka ijeekiraTajorentsi. <sup>28</sup> Nopoñaaka ijeekira Ashiteeri nopolitan-takari jaka kepatsiki. Nimaeka nooka-neero kepatsi niyaatee ijeekira Ashiteeri.”

<sup>29</sup> Ikanteyini riyotaani: “Nimaeka koñaatanaki pikenkitha-takotziri, tee poshiyakaa-wenta-waetziro. <sup>30</sup> Noñaakimi nimaeka piyotziro maawoeni, tee okowaperotyaa iita ojampitemini, tema piyotziro ikenkishire-teetari. Rootaki nokemijantantari omaperotatyá pipoñaaka ijeekira Tajorentsi.” <sup>31</sup> Ikantzi Jesús: “¿Kemijanta-yiteemima nimaeka? <sup>32</sup> Rooteentsi nimaeka pishiya-yitanaki apani-paeni, pikinayite jemperikapaeni, ari pookawenta-nakina apaniroeni. Roo kanteencha temaeta nojeeki apaniroeni, tema itsipatakina Ashitanari. <sup>33</sup> Nokaman-tatziimiro iroka-paeni piñaant-yaawori kameetha pijeeki pitsipa-tena naaka. Jaka jaawiki, osheki pikemaatsi-waetyaari eerokapaeni. Roo kanteencha, pishintsi-shireyite. Tema notsinampaakiro naaka jaawi-jato-paeni.”

### Ramanakotari Jesús Riyotaani-paeni

**17** <sup>1</sup> Ikaatakiro Jesús ikenkitha-waeta-kaeri riyotaani-paeni, <sup>2</sup> aminanaki inkiteki, ikantanaki: “Ashitanari, monkaata-paaka poñaahan-teeyaariri atziri-paeni rowaneenkawo pitomi, roñaahan-teero rirori pitomi powaneenkawo eeroka. <sup>2</sup> Eerokataki owakiriri ipinkathari-

<sup>t</sup> 16.23,26 Waerontsi

wentan-takariri maawoeni atziri-paeni, rootaki rañaayitan-teeyaari ikaatzi pashita-kaakariri.<sup>3</sup> Aririka riyoteemi apatziro eeroka Pitajorentsi-perotzi, aririka riyoteeri potyaantakiri Jeepatzii-toetani Jesú, aritaki rañaayitee.<sup>4</sup> Nomatakiro noñaahan-takiro powaneenkawo jaka kepatsiki, nothotyaakiro pikanta-kinari nantero.<sup>5</sup> Ashitanari, nokoyi notsipatee-mi nimaeka, aritaki akaate añaayiteero owaneenkawo, akimita paerani tekiraa-ta owetsikiro kepatsi.

<sup>6</sup> Tema piyoshiiteeri jaawi-jatzi ikaatzi pashita-kakinari naaka, niyotaa-yiteeri jempe piita eeroka. Eeroka ashitz-takariri paerani, riitaki pashita-kahaanari naaka. Nomatakiro nokemijanta-kahaeri piñaani.<sup>7</sup> Rootaki riyotantari nimaeka, okaatzi niyota-nitziri naaka, eerokataki yotakaa-yitanawori.<sup>8</sup> Tema niyotaa-yiteeri okaatzi piyotakaanari, ikemijanta-yitanee riroripaeni. Ikenkishiretanaa omaperota nopoñaakawo pijekira eeroka, ikemijanta-yitanee eerokataki otyaanta-kinari.<sup>9</sup> Rootaki nokowa-kowentan-tariri naaka irikapaeni. Kaari nokowa-kowentziri nampita-shwaetawori kepatsiki, apatziro nokowa-kowentziri ikaatzi pashita-kaakinari, tema eerokataki ashiyitariri.<sup>10</sup> Tema ikaatzi nashitari naaka riiyatzi pashitari eeroka. Ikaatzi pashitari eeroka riiyatzi nashitari naaka. Riiyitaki oñaahan-tayiteerori nowaneenkawo.<sup>11</sup> Eero nojeekanee jaka jaawiki, niyatee notsipata-paemi eeroka, rooma irikapaeni ari ijeekana-ki rirori. Ashitanari Tajorentsi, paminakowentenari, pimatan-tyaari pishintsinka pipakinari naaka paerani, rootaki rapataawakanteeyaa, akimitawakaa aaka.<sup>12</sup> Tema eeniro notsipyatari jaka jaawiki, naminakowentantari pishintsinka ipakinari. Tekatsi peyashi-waeta-chani. Apatziro ikantakae-yaawo ii teetziri ‘Otomí peyashi-waetaantsi,’ riitaki monkaata-kaeyaawoni ikenkithatee-takiri Jankina-rentsi-peroriki.<sup>13</sup> Roo kanteencha nimaeka niyatee pijekinta eeroka. Rootaki noñaawaetantawori iroka eenirowa nojeeki jaka jaawiki, rootaki roshiy-an-teenari ikimo-shireteeyini kameetha irikapaeni.<sup>14</sup> Niyotaa-yiteeri piñaani, rootaki ikijaneentee-tanta-nakariri, tema tee roshiy-naari jaawiki-jatzi-paeni. Nokimita naaka tee nojaawiki-jatzite.<sup>15</sup> Tee nokowako-tzimi paayiteeri ijeekira jaka jaawiki, apatziro paminakowentee-ri ikaariperota-kaetziri-kari.<sup>16</sup> Nokimita naaka, tee naaka jaawiki-jatzi, eejatzi irikapaeni tee roshiy-neeyaa-jaawiki-jatzipaeni.<sup>17</sup> Pikantakaeyaawo eeroka pashiperotanteeyaariri kametha. Tema kyaariperori piñaanitari eeroka.<sup>18</sup> Pikimitakina naaka potyaantakina nojeeki-moyiteri jaawiki-jatzipaeni, ari nokimitzi-tyaari naaka notyaanta-yiteri ijeekimo-yiteri isheninkapaeni.<sup>19</sup> Okowa-perotatyaa nimaeka natsipe-wentee-yaari irikapaeni pashita-kakinari naaka. Ari okantyaa pashitan-teeyaariri eeroka irika-paeni.

---

#### <sup>u</sup> 17.11 Waerontsi

<sup>20</sup> Tee apatziro nokowa-kowenteri irikapaeni, tema nokowa-kowentzitari ikaate kemijanteenani aririka ikenkithata-kaayiteeri irikapaeni. <sup>21</sup> Namanakowentziri maawoeni irikapaeni rapaatawakanteyaa, apaani ikantaneeyaa rapataa-neemi eeroka. Ashitanari, akimita aaka apatawakae-yaani, ari ikimi-yitee-yaari rirori rapata-wakaa-peroteeyaa, rootaki ikemijantan-teeyaari jaawiki-jatzi-paeni eerokataki otyaanta-kinari. <sup>22</sup> Iroka nowaneenkawo, okaatzi poñaaha-yitakinari eeroka, roojatzi nomateeri naaka noñaaha-yiteeriri riroripaeni. Ari rapaata-wakaa-perotyaari, akimi-tawakaa aaka. <sup>23</sup> Tema pitsipa-shiretana eeroka, ari nokimi-teeyaari naaka notsipa-shiretee-yaari riroripaeni, rootaki rapaata-wakaanta-perotyaari. Roojatzi ikenkishiryaan-tyaari jaawiki-jatzipaeni eerokataki otyaantakinari, antawo petakoyitakari pikimitakina naaka antawo petakotakina.

<sup>24</sup> Ashitanari, eerokataki ashitakaa-kinariri irikapaeni, nokoyi itsipayitee-na jempe nojeekapae naaka, ari iñaayiteerori nowaneenkawo. Eerokataki owaneenkata-kaakinari, tema petakotzi-takina eeroka tekira owetsikyaata kepatsi. <sup>25</sup> Ashitanari tampatzika-shireri, tee riyotee-yimini jaawiki-jatzi-paeni. Roo kanteencha niyotzimi naaka, eejatzi ikimitaka irikapaeni riyotzi eerokataki otyaanta-kinari. <sup>26</sup> Niyotaa-yiteeri jempe piita eeroka, eekiro niyata-kaatyero niyoteeri, notsipa-shiretee-yaari, netakoyitee-yaari pikimitana naaka petakotana.”

### Rahaetakiri Jesús

(Mt. 26.47-56; Mr. 14.43-50; Lc. 22.47-53)

**18** <sup>1</sup>Ari ithonka-nakiro Jesús ramanaka, shitowanaki itsipata-naari riyotaani riyaatero intatsikironta Cheenkariniki. Ari ijekapaaki Jesús eejatzi riyotaani-paeni janta pankirentsi-mashiki. <sup>2</sup>Iñiiro janta rirori Judas pithoka-shitan-taniri, tema ari ijekaa-piintziri Jesús maawoeni riyotaani janta. <sup>3</sup>Ari rareeta-paaka Judas itsipata-paakari owayiri-paeni eejatzi aminakowentan-taniri, riitaki rotyaantakiri reewarite Ompera-tajorentsitaarewo, eejatzi rashì Inashitantaniri-paeni. Ramayitaki ipaja-mento, ramaki eejatzi roota-mento. <sup>4</sup>Roo kanteencha Jesús riyotzitaka okaate awiji-moterini, ishitowa-shitanakiri, rojampita-wakiri: “¿Itaka paminaminatziri?” <sup>5</sup>Ikanteeyini irikapaeni: “Naminaminata-tziiri Jesús Kashiyakaaweni-jatzi.” Ari ikantzi Jesús: “Naakataki.” Arira itsipatakari Judas pithoka-shitakariri ikaatzi pokashita-kiriri Jesús. <sup>6</sup>Ikantawa-kiri Jesús: “Naakataki” ipiyaa-neentapaanaata itaapiiki, tyeeyanakini. <sup>7</sup>Rapiita-nakiro Jesús, ikantziri: “¿Itaka paminaminatziri?” Ari ikanteeyini rirori: “Naminaminata-tziiri Jesús Kashiyakaaweni-jatzi.” <sup>8</sup>Ari rapiita-nakiri Jesús, ikantziri: “Tema nokantakimi naakataki. Naaka-rika pamina-minatzi, potyaanteeri notsipa-yitakari, riyaayiteeta.” <sup>9</sup>Ari omonkaatari ikantzi-takari Jesús:

“Ashitanari, ikaatzi pashita-kaakinari, eero ipeyahaan-tawaeta apaani.”<sup>v</sup> <sup>10</sup>Ikanta Simón Pedro, otzimi-motziri rirori rojataa-mento, inojokya-nakiro, itotzitakiri ikempita-pero-nampiki iitachari Malco, romperataní Jewatziriri ompera-tajorentsitaa-rewo. <sup>11</sup>Ikantziri Jesús irika Pedro: “Powaero pojataa-mento. Riitaki Ashitanari shineta-kinari nokemaatsi-waetyaa, ¿eeroma omata nomonkaateniri?”<sup>v</sup>

**Rahaeta-nakiri Jesús janta Jewatziririki ompera-tajorentsitaa-rewo**  
(Mt. 26.57-58; Mr. 14.53-54; Lc. 22.54)

<sup>12</sup>Ikanta owayiri-paeni itsipatakari reewarite, ejatzti aminako-wentan-taniri rotyaantani Judá-paeni, roteeya-nakiri Jesús, roojota-nakiri. <sup>13</sup>Ari retapaentawo ikinakaa-nakiri ipankoki Anás. Tema riiwitaka rikonkiri Caifás jewatziriri ompera-tajorentsitaa-rewo. <sup>14</sup>Irika Caifás riitaki kantakiri paerani Judá-paeni: “Rootaki kameethata-tsini ikamawenta-yitee apaani atziri.”

**Ikyaki Pedro iyaankii-teriteki Anás**  
(Mt. 26.69-70; Mr. 14.66-68; Lc. 22.55-57)

<sup>15</sup>Ikanta Simón Pedro ejatzti itsipa yotaarewo, royaata-kowenta-nakiri Jesús. Irika itsipa yotaarewo, riyopiintziri Jewatziriri ompera-tajorentsitaa-rewo, rootaki ikyanta-paakari royaata-kowentakirira Jesús. <sup>16</sup>Ari ikatziya-paaka Pedro jakakiroki ashitakowontsi. Tema irika itsipa yotaarewo riyopiintziri Jewatziriri ompera-tajorentsitaa-rewo, ikenkitha-waeta-kaakiro aminakowentzirori ashitakowontsi, omonkyakiri ejatzti Pedro. <sup>17</sup>Okanta aminakowentzirori ashitakowontsi, ojampitakiri Pedro: “¿Tema eeroka riyotaani Atziri?” Rakanaki Pedro, ikantzi: “Tee naaka.” <sup>18</sup>Tema okatsinkaetyaatzii janta, ari ronthoeyapaakini paamari irika-paeni omperataarewo itsipayitakari aminako-wentan-taniri. Ari ikatziyaka rakitsiteeyani. Ari ikaatzitari ejatzti Pedro, rakitsiteeyani paamariki.

**Anás rojampitziri Jesús**  
(Mt. 26.59-66; Mr. 14.55-64; Lc. 22.66-71)

<sup>19</sup>Ikanta reewarite Ompera-tajorentsitaarewo retanakari Jesús rojampita-kowentziri riyotaani-paeni, oeta riyotaan-tayitziri. <sup>20</sup>Ikantzí Jesús: “Nokenkithataakaa-piintakiri maawoeni atziri. Niyotaanta-piintaki ipiyota-piinteeetaha ejatzti janta tajorentsi-pankoki, jempe ipiyota-piinteeeyani maawoeni Judá-paeni. Tee nomanakae-yaawo okaatzi nokenkitha-yitziri. <sup>21</sup>¿Oetaka pojampitan-tanari naaka? Pojampiteri ikaatzi kemakinari. Riitaki yotzirori nokanta-yitakiriri.”

<sup>v</sup> 18.11 nomonkaateniri = nomiritero kepishaari

<sup>22</sup>Ikanta ikaatakiro Jesús ikenkitha-waetaki, apaani aminakowentan-taniri ipajawoota-nakiri, ikantziri: “¿Arima pikanteri pakiri Jewatziriri ompera-tajorentsitaa-rewo?” <sup>23</sup>Ikantzi Jesús: “Eenitatsi-rika kaari-perori noñaawaetakiri, pikantenawo jempe otzimi. Rooma kameetha-rika okaatzi noñaawaetakiri. ¿Litaka pipajawootan-tanari?” <sup>24</sup>Ikanta Anás tee roojoryaa-kotakantziri Jesús, rotyaantakiri ijekira Caifás jewatziriri ompera-tajorentsitaa-rewo.

### **Ikantzi Pedro: Tee niyotziri Jesús**

(Mt. 26.71-75; Mr. 14.69-72; Lc. 22.58-62)

<sup>25</sup>Roojatzi ikatziyaka Pedro rakitsi-ta paamariki. Ari rojampitee-takiri, ikantee-tziri: “¿Tema eeroka riyotaani irika Atziri?” Romanakotanaka Pedro, ikantzi: “Tee naaka.” <sup>26</sup>Okanta ojamaniityaaki rojampiteeri eejatzí romperatani Jewatziriri ompera-tajorentsitaa-rewo, riitaki isheninkathori itotzitakiri inkaahanki Pedro ikempita, ikantziri: “¿Tema eeroka noñaaki itsipatzimi janta pankirentsi-mashiki?” <sup>27</sup>Rapiita-nakiro Pedro romanakotanaka, roojatzi iñaantanaka tyaapa.

### **Rahaeta-nakiri Jesús ijeki Pilato**

(Mt. 27.1-2,11-31; Mr. 15.1-20; Lc. 23.1-5,13-25)

<sup>28</sup>Tema kitejetzi-mataki, romishitowae-taneeri Jesús ipankoki Caifás, rahaeta-nakiri ijekira Pilato reewarite wirakocha-paeni. Tee ikyeeya-paakini Judá-paeni ipankoki Pilato, tema aririka ikyaa-wankoteri ipiyathatakawo Ikantakaan-teetani iwinkakaanteetani, eero omata roemoshirenkiro kitejeri Anonkoryaantsi. <sup>29</sup>Rootaki ishitowan-tapaakari jakakiroki Pilato, ikenkitha-waeta-kaeri, ikantziri: “¿Oetakama rantakiri irika atziri?” <sup>30</sup>Ikanteeeyini: “Eeromi ikaariperotzimi irika, eero namirimi jaka.” <sup>31</sup>Ikantzi Pilato: “Paaneeri eeroka-paeni, piyotziro ikantakaan-teetzimiri jempe pikanteri powajankiteeri.” Ikantee-yanakini Judá-paeni: “Tema tee pishine-tana nowamayiri nosheninka-paeni.” <sup>32</sup>Ari omonkaatakarí ikantzi-takari Jesús jempe okantyaa rowamahaeteri.

<sup>33</sup>Ikanta ikyaa-panaatzi Pilato inthomoeki ipankoki, ikaemapaaakiri Jesús, rojampitakiri: “¿Eerokama Iwinkatharite Judá-paeni?” <sup>34</sup>Ikantzi Jesús: “¿Piyota-shitawoma pojampitanari? Kimitaka eenitatsi kantakimiri jempe noeta naaka.” <sup>35</sup>Ikantzi Pilato: “¿Naakama isheninka Judá-paeni? Tema riitaki pisheninka-paeni amakimiri itsipatakari reewarite Ompera-tajorentsitaarewo. ¿Litakama pantakiri?” <sup>36</sup>Ikantzi Jesús: “Tee nopinkathari-wentantzi naaka jaka jaawiki. Ari okantyaaami, aritaki piñaakimi osheki nowayirite ikijako-wentena, eero raakaantana Judá-paeni. Roo kanteencha tee nopinkathari-wentantzi naka jaka.” <sup>37</sup>Rapitakiri Pilato rojampitziri: “¿Arima, eerokatakima Pinkathari?” Ikantzi Jesús: “Eerokatakí kanteen-tsiri. Rootaki notziman-takari, rootaki

nopokan-takari jaka kepatsiki nokenkithata-koteero kyaaripero. Tema ikaatzi oejokirotawori kyaaripero, ikemijanta-waantetana.”<sup>38</sup> Ikantzi Pilato: “Roojatzi-tapiinta, kyaariperori.” Ikantanakiri, shitowanaki ipiyotee-yakanira Judá-paeni, ikantapaeri: “Tee noñeero rantani irika atziri.

<sup>39</sup>Poemoshirenka-piintziro Anonkoryaantsi, pametee-yawoni nomishitowae apaani raakaan-teetziri. ¿Nomishitowa-kaanteerima iiteetziri ‘Piwinkatharite?’”<sup>40</sup> Ari ikaemae-yanakini maawoeni, ikanteeyinira: “¡Eero pomishitoyiri irika! ¡Riitaki pomishitowae Barrabás!” Tema irika Barrabás, koshintzi irika.

**19** <sup>1</sup>Ikanta Pilato ipajata-kaanta-nakiri Jesús. <sup>2</sup>Riima rowayirite-paeni wirakocha rimpitataki kitochee roshiya-kaantakiro amanthee-rentsi, rootaki ramantheetan-takariri Jesús. Opoñaashita ikithaatan-takari kityonka-mawota-tsiri kithaarentsi.<sup>w</sup> <sup>3</sup>Ipiyowenta-paakari, ishironta-wenta-waetari ikantee-yirini: “¡Irka Iwinkatharite Judá-paeni!” Ipajawoo-tanakiri. <sup>4</sup>Ari rapiitakiro ishitowapae Pilato, ikantapaeri Judá-paeni: “Paminiri, irika nomishitowakiri, tee noñeero rantani irika.” <sup>5</sup>Ari ishitowa-kaapaakiri Jesús ramantheeta-kaetakari kitoche, ikithaatee-takiri kityonka-mawota-tsiri kithaarentsi. Ikantzi Pilato: “¡Irka atziri!” <sup>6</sup>Ikanta iñaawakiri reewarite Omperatajorentsitaarewo eejatzi aminako-wentzirori tajorentsi-panko, ikaemae-yanakini, ikantzi: “¡Pikenta-kota-kaanteri! ¡Pikenta-kota-kaanteri!” Ikantzi Pilato: “Irka, paanakiri eerokapaeni pikenta-koteri, tema naaka tee noñeero rantani irika. <sup>7</sup>Ikanteeyini Judá-paeni: “Eenitatsi ikantakaan-teetakiri paerani ikanteetzi, otzimatyye rowamahaeteri irika, tema roshiya-kaanta-shiwaetaka Itomi Tajorentsi.”<sup>8</sup> Ikemawaki, Pilato okaatzi ikanteyakirini, antawo ithaawanaki. <sup>9</sup>Eejatzi ikyaanee iwinkathari-pankoteki, ikaemakaan-takiri Jesús, rojampitakiri, ikantziri: “¿Jempema pipoñaa-perotaka eeroka?” Roo kanteencha Jesús tee raki. <sup>10</sup>Ikantzi Pilato: “¿Eeroma pakana? ¿Tema piyotzi naaka pinkathari-perori, aritaki omatakyा nokenta-kota-kaantemi, ari omatakyा eejatzi nomishitowa-kaanteemi?” <sup>11</sup>Akanaki Jesús, ikantzi: “Eero ikowakae-miromi Jenoki-jatzi, eero pipinkathari-pero-wentanami. Rootaki imaperotan-takari ikarigerotaki irika amakinari jaka, tema awijanakiro okaatzi pikarigerotzi eeroka.”

<sup>12</sup>Aripaete ikowa-kowataa-witanaka Pilato romishitowa-kaanteerimi Jesús, roo kanteencha eekiro ikaemae-yatziini Judá-paeni ikanteeyini: “¡Aririka pipakahaeri irika, teera paapatziyari pinkathari-perori César! ¡Tema ikaatzi kimitakaan-tawaeta-chari pinkathari, ikijaneenta-tziiri César!” <sup>13</sup>Ikanta ikemaki Pilato, ramakaan-teeri Jesús jakakiroki,

#### w 19.2 Amanthee-rentsi, Kityonka-mawota-tsiri

roejeeekae-takiri raminakoeta-piintziri iyakowentaarewo, iiteetziro “Mapipanka,” iñaaniki Heber-paeni iiteetziro “Gabata.”<sup>14</sup> Rootaki kitejeri rowetsika-wentee-tantawori Anonkoryaantsi roemoshirenkaetero, tema tampatzikataki ooryaa. Ikantziri Pilato irikaete Judá-paeni: “¡Irika Piwinkatharite!”<sup>15</sup> Roo kanteencha kaemaeya-nakini Judá-paeni, ikantzi: “¡Powamayiri! ¡Powamayiri! ¡Pikenta-kota-kaanteri!” Ari ikantzi Pilato: “¿katachama nokenta-kota-kaanteri piwinkatharite?” Ikantzi reewari Ompera-tajorentsitaarewo: “¡Apatziro César nowinkathari-tetari, tekatsi itsipa!”<sup>16</sup> Ikanta Pilato, roepiyeeri Jesús raaneeri Judá-paeni ikenta-koteri. Ari raaneeri.

**Ikentakoe-takiri Jesús roojatzi ikamantakari**  
(Mt. 27.32-50; Mr. 15.21-37; Lc. 23.26-49)

<sup>17</sup>Riitaki natana-kirori Jesús incha-kota ikenta-kotan-tyaari, jataki iiteetziro “Atzirii-toni,” roojatzi iiteetziro iñaaniki Heber-paeni “Gólhota.”<sup>18</sup> Ari ikentakoe-takiri Jesús janta, itsipatee-takiri apite itsipa atziri, apaani rowatzika-koetaki rakoperoki, itsipa rowatzika-koetakiri rampateki.<sup>19</sup> Ari ipatakakaantaki Pilato ikentakoe-takirira Jesús apaani jankina-rentsi, kantatsiri: “JESÚS KASHIYAKAA-WENI-JATZI, IWINKATHARITE JUDÁ-PAENI.”<sup>20</sup> Osheki Judá-paeni ñaanata-kirori iroka jankina-rentsi, tema tee inteenaa-perotzi nampitsi jempe ikentakoe-takiri Jesús. Tema rojankinee-takiro iroka iñaaniki Heber-paeni, iñaaniki griebo, eejatzi iñaaniki wirakocha.<sup>21</sup> Rootaki ipokantakari reewari Ompera-tajorentsitaarewo ikantakiri Pilato: “Eero pojankinatziro: ‘Iwinkatharite Judá-paeni.’ Tema okantatyeeemi: ‘Oshiyakaan-tawaeta-chari iwinkatharite Judá-paeni.’”<sup>22</sup> Ari ikantzi Pilato: “Okaatzi nojankinatakiri, ashi owatyaawo ojankinatakahaa.”

<sup>23</sup> Ikanta imatakiro rowayirite-paeni wirakocha ikenta-kotakiri Jesús, rayitanakiri ipewiryakoho, itzijaakiro okaatzi 4 ojapeki, ipawakae-yitakawo apaani-paeni. Opoñaashita rayitakiri iithaari, tee owawi-kotatyaa roori, apaani okanta rontyee-tziro roojatzi opatzi-kaakiki.<sup>24</sup> Ikanta-wakahaeeyani owayiri-paeni: “Eero atzijaa-waetziro iithaari, apatziro añaaryaawentyaawo, ari añaero iita ayironi.” Ari omonkaatari Jankina-rentsi-perori, kantatsiri:

Ipawakae-takawo nomaatha.

Iñaaryaawentee-takawo noethaari.

Rootaki ranteeaya-kirini owayiri-paeni.<sup>25</sup> Tema ari ojeekitakari riniro Jesús jempe ikentakoe-takiri otsipatakawo irento, María iina Cleofas, eejatzi María Pankothanthaari-jato.<sup>26</sup> Ikanta iñaakiro riniro Jesús okatziyaka janta otsipatakari Riyotaani retakoperotari, ikantziro: “Tsinani, riitaki pitomin-teeyaari irika.”<sup>27</sup> Ikantanakiri Riyotaani: “Rootaki piniron-teeyaari irika.” Ari etanakawo María ojeeka-wankotziri irika Riyotaani.

<sup>28</sup>Tema riyotaki Jesús imonkaatakiro okaatzi ikantakiriri Tajorentsi, ikantanaki: “¡Nomiriwé!” Ari omonkaatari ikenkithata-koeta-kiriri Jankina-rentsi-peroriki.

<sup>29</sup>Ari owa-kotakari kepishaari janta chomoki. Rahaetaki incha-tewa, ankowiiteetaki atsimiyaateroni kepishaari, rowaanka-koeta-kiniri ipaanteki Jesús.<sup>x</sup> <sup>30</sup>Ratsimiyawitawakawo Jesús kepishaari, ikantanaki: “Matakaha maawoeni iroka.” Ari ithatanaka, jatashiretanaki.

### Rojataa-merekitee-takiri Jesús

<sup>31</sup>Tema rootaki kitejeri rowetsika-shiteetantawori kitejeri imakoryaan-teetari. Tee ikowaeyini reewari Judá-paeni ikatziya-kote ikentakoe-tziri kitejeri imakoryaan-teetari, tema iroka kitejeri rootaki ipinkatha-perotziri riroripaeni. Rootaki ikantan-takariri Pilato ikahaa-porita-kaanteri kenta-kotaarewo ikamantyaari intsipaete, rowatzikarya-kotee-riita. <sup>32</sup>Ikanta ryaatee-yanakini owayiri-paeni, ikahaa-porita-paakiri apaani itsipatakari Jesús ikentakoe-tziri, imatanakiri itsipa. <sup>33</sup>Ari ikoyi imaterimi Jesús, Iñaatziiri kamaki. Rootaki kaari ikahaa-poritan-teetari rirori. <sup>34</sup>Roo kanteencha apaani owayiri rojataa-merekitan-takari rowathaa-mento irika Jesús, ari oshitowa-nakiri riraa otsipatapanaka nijaa. <sup>35</sup>Irika kenkithatzirori iroka, riitaki ñaaperota-kirori. Omaperotatyka ikamantzimiri rootaki pikemijantan-tyaari eerokapaeni. <sup>36</sup>Rootaki omatanta-yitakari iroka-paeni omonkaatan-tyaari Jankina-rentsi-perori, ikanteetaki:

Eero ikahaawaetee-tziniri apaani itonki rirori.

<sup>37</sup>Ikantzi-teetaka eejatzi Jankina-rentsi-perori:

Ari raminakoe-takiri rojataa-merikiteeteri.

### Ikiteetakiri Jesús

(Mt. 27.57-61; Mr. 15.42-47; Lc. 23.50-56)

<sup>38</sup>Ikanta José, Tonkoeroetoni-jatzi, ikowa-koteeri Pilato, ikantziri: “Pishinetenari naaneeri Jesús.” Irika José riiyatzi kemijanta-kiriri Jesús, romanakashitawo ikemijantzi tema ithaawan-tatyari Judá-paeni. Ari ishineta-kiniri Pilato. Jataki José, raaneeri. <sup>39</sup>Ari ipokapaakiri eejatzi Nicodemo jatashita-kiriri paerani Jesús tsireniriki, ramakota-paaki kepishaari rowaetee-tziro kajankaari, osheki otenanka iroka.<sup>y</sup> <sup>40</sup>Ikanta irika José eejatzi Nicodemo raaneero iwatha Jesús, iponatan-takari manthatsi ijeetantakari kajankaari. Tema rootaki rametee-yarini Judá-paeni ikitata-piintziri kaminkari-paeni. <sup>41</sup>Tema janta ikentakoe-takirira Jesús, ari otzimiri pankirentsi-mashi, ari otzimiri owakirari omo jempe

<sup>x</sup> 19.29 incha-tewa = isopo    <sup>y</sup> 19.39 Iroka kajankaari, rowaetee-takirori kepishaari, owaa inchashi iiteetziri áloe. Osheki otenatzi okaatzi 100 libra, ikantee-tziri nimaeka 30 kilo.

ikiteeteri kaminkari, tekira ikitatan-tyaawo kamatsiri. <sup>42</sup> Ari rowaeta-kiriri Jesús, tema okaakiini ojeeki iroka omo. Rooteentsi areetyaa kitejeri imakoryaanta-piintee-yarini Judá-paeni.

**Rañaantaari Jesús**  
(Mt. 28.1-10; Mr. 16.1-8; Lc. 24.1-12)

**20**

<sup>1</sup> Okanta awijanaki kitejeri imakoryaan-teetari, ananinkanaki María Pankothanthaari-jato iyaate omooki jempe rowakoe-takiri Jesús. Oñaapaa-tziiro oteenkanaki mapi rashitan-tawitee-takawori omoo. <sup>2</sup> Piyanaka oñeeri Simón Pedro eejatzi itsipa yotaarewo retako-perotani Jesús, oshiya-perota-nakityaa, okantapaakiri: “¡Rahaetakiri Awinkatharite, tee iyotzi jempe-rika rowaeteeri!” <sup>3</sup> Ikanta Simón Pedro eejatzi itsipa yotaarewo, jateeya-nakini kitataa-rewoki. <sup>4</sup> Ishiya-pero-witana-kityaa riyaatee-yanakini. Roo kanteencha ishiya-perota-nakityaa itsipa yotaarewo, riitaki etapaakawo rareetaka kitataarewoki. <sup>5</sup> Inetapi-witapaaki omooki, iñaapaa-tziiro omaryaa-naka iponawitee-tanta-kariri, roo kanteencha tee ikyaappaaki inthomoeki. <sup>6</sup> Roojatzi rareetan-tapaakari rirori Simón Pedro, ikyaappaaki inthomoeki, iñaapaa-kitziiro rirori omaryaanaka iponawitee-tanta-kariri. <sup>7</sup> Iñiitapaakawo eejatzi maathantsi rankowitan-tawitee-takariri iitoki, otsipa rowaeta-neero tee otsipatyaawo iponawitee-tanta-kariri, kameetha rotzipiyee-taneero. <sup>8</sup> Ari ikyaappaaki itsipa yotaarewo etapaakawori rareetaka kitataarewoki. Iñaapaakiro rirori okaatzi awijeentsiri, ari ikemijanta-perota-nakiri. <sup>9</sup> Tema tekira ikematha-witawo okantziri Jankina-rentsi-perori, aritaki rañahae Jesús. <sup>10</sup> Opoñaashita ipiyayitana ipankoki irika apite yotaarewo.

**Roñaahaawo Jesús María Pankothanthaari-jato**  
(Mr. 16.9-11)

<sup>11</sup> Ari ojeeki María opatzimooki kitataarewoki iraawaeta. Okanta iraawaetakaha, onetapitzi inthomoeki omooki, <sup>12</sup> oñaatziiri apite ronampiri tajorentsi okitamaa-nikitaki iithaari, ijekae-yakini jempe romaryaa-witee-takari Jesús. Apaani ijekakki iitowitee-takari, itsipa ijekakki jempe iitzitawitakari. <sup>13</sup> Rojampita-nakiro ronampiripaeni tajorentsi, ikantziro: “Tsinani, ¿iitaka piraantari?” Okantzi roori: “Niraa-kota-tyaari Nowinkatharite, eenitatsi aakiriri, tee niyotzi jempe rowakiri.” <sup>14</sup> Roo okantaki-tziini, ari opithokanaka, oñaatziiri Jesús, roo kanteencha tee iyotawae-ri riitakirika. <sup>15</sup> Ari rojampitziro ikantziro: “¿Iitaka piraantari tsinani? ¿Iitaka pikowa-kowatziri?” Oshiyakaantzi roori riitaki ñaanatzirori aminakowentzirori pankirentsi-mashi, okantanakiri: “Jewari, eeroka-rika aakiriri, pikamantena jempe powakiri, nokoyi niyaate namineeri.” <sup>16</sup> Ikantziro Jesús: “¡María!” Ari aminanakiri roori, okantzi: “¡Raboní!” (roo ikantee-tziri iñaaniki Heber-paeni “Yotaanari.”) <sup>17</sup> Ikantzzi Jesús: “Eero poteeyana, tema tekira niyaateeta notsipata-paeyaari”

Ashitanari. Roo kanteencha piyaate pikamanteri noyemijantzinkaritepaeni, rootaatsi niyaatee notsipata-paeyaari Ashitanari, riijatzi Ashitzi-tzimiri eerokapaeni. Rii Notajorentsi-tetari naaka, riijatzi Pitajorentsi-tzitari eerokapaeni.”<sup>z</sup> <sup>18</sup> Okanta iyaatanaki María Pankothanthaari-jato, okamanta-paakiri maawoensi yotaarewo oñahaera Awinkatharite, okamanta-paakiri eejatzi okaatzi ikantakirori.

### **Roñaahaari Jesús riyotaa-nipaeni**

**(Mt. 28.16-20; Mr. 16.14-18; Lc. 24.36-49)**

<sup>19</sup> Okanta otsirenitanaki awijanaki kitejeri imakoryaan-teetari, piyotee-yakani yotaarewo-paeni. Okantakaawo ithaawan-teeyarini reewarite Judá-paeni, ashita-kotee-yakani kametha. Kyaapaaki rirori Jesús, katziya-paaka ipiyotee-yakanira, rowethata-paari ikantapaeri: “¡Pijeka-yitee kameetha!” <sup>20</sup> Ikanta rowethata-paari, roñaaha-paakiri rako, eejatzi imerekli. Ikimo-shire-yitee-yanakini irikapaeni iñaawaera Awinkatharite. <sup>21</sup> Ari rapiita-nakiro Jesús rowethatari, ikantziri: “¡Pijeka-yitee kameetha! ikimitaakina Ashitanari naaka rotyaantakina jaka, ari nokimi-tzitemiri eeroka-paeni notyaanta-yitemi.” <sup>22</sup> Opoñaashita itajonkakiri yotaarewo-paeni, ikantziri: “Ojeeka-shiretan-teeyeemini Ishire tajorentsi. <sup>23</sup> Eenitatsi-rika pipeyako-yiteeri eeroka jaka, aritaki ipeyakoe-teeri janta. Riima kaari pipeyakotzi eeroka jaka, eero ipeyakoe-teeri eejatzi janta.”

### **Ikijo-shiretzi Tomás**

<sup>24</sup> Ikanta Tomás ikaata-piintziri 12 yotaarewo, iiteetziri eejatzi “Tsipari,” tee ijeeki rirori rareetan-tapaari Jesús.<sup>a</sup> <sup>25</sup> Ikanta rareetaawo rirori Tomás, ikamanta-waeri itsipa-paeni yotaa-rewo, ikantziri: “Noñahaera Awinkatharite.” Roo kanteencha ikantzi Tomás: “Eerorika noñiiri naaka jempe ikenta-wakotee-takiri, eerorika nokyaanta-wakotari, eerorika nokyaanta-merekitari, eero nokemijantzi.”

<sup>26</sup> Okanta paata awijanaki 8 kitejeri, rapiiteero yotaarewo-paeni ipiyoteeyani. Ari ijeekitakari rirori Tomás. Rashitee-yakironi kameetha ashitakowontsi, roo kanteencha kyaapaaki Jesús, katziya-paaka ipiyotee-yakanira, rowethata-paari ikantapaeri: “¡Pijeka-yitee kameetha!” <sup>27</sup> Opoñaashita ikantziri Tomás: “Iroka nako, pikyaanta-wakotena, pikyaanta-merikitena eejatzi. Kaari ikijo-shireteetzi, ¡Pikemijante!” <sup>28</sup> Ari icheraanaki Tomás, ikantanaki: “¡Nowinkatharite, Notajorentsile!” <sup>29</sup> Ikantzi Jesús: “Tema roo pikemijantanta-matsita-nakari píñaawaana. ¡Ikimoshiretee ikaate kemijantaa-tsini kaari ñaawitanari!”

### **Iitaka rojankinatantee-tawori iroka**

<sup>30</sup> Tema osheki iñaapiintakiro yotaarewo-paeni rapiipiitakiro Jesús itajonka-wentantaki, teemaeta ojankinata-koyityaa jaka. <sup>31</sup> Roo

<sup>z</sup> **20.17** noyemijantzinkaritepaeni = niyotaani-paeni    <sup>a</sup> **20.24** Tsipari = Dídimo

kanteencha rojankinee-takiro iroka-paeni pikemijantan-teeyaari, tema irika Jesús riitaki Jeepatziiotani, Itomi Tajorentsi. Aririka pawentaa-piintee-yaari rirori pikemijanta-neeri, aritaki ikañaanitakaa-yiteemi.<sup>b</sup>

### Roñaahari Jesús 7 Riyotaani

**21** <sup>1</sup>Okanta okaatapaaki iroka-paeni, rapiitakiro Jesús roñaahari riyotaani, inkaari-cheraaki iiteetziri Tiberias. Iroka okantaka.<sup>c</sup>

<sup>2</sup>Ari ikaateeyini ijeki yotaarewo Simón Pedro, Tomás, iiteetziri eejatzi “Tsipari,” Nataniel, poñaachari Mawoshiweniki janta Tepoweniki, itomi-paeni Zebedeo, eejatzi apite itsipa yotaarewo.<sup>d</sup> <sup>3</sup>Ikantzi Simón Pedro: “Niyaatatyee noshimaatyaa.” Ikanteeyini itsipa yotaarewo: “Ari akaatanaki.” Jateeya-nakini, oteteeya-paakani pitotsiki. Roo kanteencha, tekatsi-machee rayi shimaa-witee-yakani tsireniriki.

<sup>4</sup>Okanta okitejetzi-mataki, katziya-paaka Jesús omapipokitzira inkaari. Roo kanteencha tee riyotawae-ri riyotaani-paeni riitakirika. <sup>5</sup>Ikaema-kota-paeri, ikantziri: “¡Ewankari-paeni! ¿Pahaeyakini?” ikanteeyini rirori: “¡Tetaawé!”

<sup>6</sup>Ikantzi Jesús: “Powiinkiro pakoperoki pipashikamento, aritaki paaki.” Rowiinkakiro ikantee-takiriri. Tema raaki osheki shima, tee raawayaa-kotziri inoshika-koteeri ipashikaa-mentoki. <sup>7</sup>Ikanta yotaarewo retako-perotani Jesús, ikantanakiri Pedro: “¡Riitaki Awinkatharite irinta!” Ikanta ikemawaki Simón Pedro, ikithaananaka, japokanaka inkaariki. <sup>8</sup>Riima itsipa yotaarewo-paeni pitotsiki ikinako-yitanee inoshikaata-koteeri ishimani, roojatzi raata-kotan-tapaari omapipokitzira. Tema ijeka-kota-kitzii niyankyyaa-niki.<sup>e</sup>

<sup>9</sup>Ikanta rayiitee-yapaeni, iñaapaatzii oejaka paamari, ari itashitakiri shima, eejatzi ratanteetari. <sup>10</sup>Ikantzi Jesús: “Pamaki shima owakira paakiri.” <sup>11</sup>Otetapaa Simón Pedro pitotsiki, roojoryaa-kotakiri ishimani, inoshika-kotakiri roojatzi omapipookitzira. Antari-paeni shima, ikaatzi 153. Teemaeta itzijayiro ipashikaa-mento. <sup>12</sup>Ari ikantzi Jesús: “Jame oyaa.” Tema tekatsi apaani yotaarewo ojampiterini jempe-rika iita, tema riyoperota-waeri riitaki Iwinkatharite. <sup>13</sup>Ari ipokapaaki rirori Jesús, raakiro ratanteetari, ipayitakiri apaani-paeni, ari ikimitzitakari shima. <sup>14</sup>Rootaki mawatatsiri roñaahari Jesús riyotaani-paeni rañahaera rirori.

### Paminako-wentee-nari nopira

<sup>15</sup>Ikanta ikaatakiro rowaeya-manaani, rojampita-nakiri Jesús irika Simón Pedro, ikantziri: “Simón, itomi Jonás, ¿Pininta-nama eeroka?” Ikantzi Pedro: “Piyotzi eeroka Pinkathari, nonintakimi.” Ikantzi Jesús: “Aririka okanta paminakowentenari nokimita-kaantaari nopira.”<sup>21.15-17</sup> <sup>16</sup>Rapiitakiri

<sup>b</sup> 20.31 Waerontsi    <sup>c</sup> 21.1 Tiberias = Tepowen    <sup>d</sup> 21.2 Tsipari = Dídimo

<sup>e</sup> 21.8 niyankyyaa-niki = okaatzi ojanthatzi 200 akonaki = 100 metro.    <sup>21.15-17</sup> nopira = cordero, oveja

rojampitziri: "Simón, itomi Jonás, ¿petakotanama?" Ikantzi Pedro: "Piyotzi eeroka netakotzimi." Ikantzi Jesús: "Aririka okanta paminakowentee-nari nokimita-kaantaari nopira." <sup>17</sup>Roo mawatatsiri rojampitziri, ikantziri: "Simón, itomi Jonás, ¿peta-koperotanama?" Ari rowashiretakotanaka Pedro, tema mawa rapiitakiri rojampitziri, ikantziri: "Pinkathari, eerokataki yotzirori maawoeni, piyotzi eeroka netakotzimirika." Ikantzi Jesús: "Aririka okanta paminakowentee-nari nokimita-kaantaari nopira. <sup>18</sup>Tema eeniro pewankari-perowita, pikithaata-piinta, piyaayitzi jempe pininta-kaawo. Roo kanteencha aririka pantariperotapaaki, apatziro powaanka-wakoteeyaa, itsipa kithaateemini, raayiteemi jempe te pikoyiro piyaatemi. Omaperotataya." <sup>19</sup>Ikantan-takawori Jesús iroka, ikowitzii ikematha-yiitero jempe ikantyaa ikamae paata Pedro ipinkathateerira Tajorentsi. Ari ikantziri Jesús irika Pedro: "¡Poyaatena!"

### **Yotaarewo retako-perotani**

<sup>20</sup>Ikanta ipithokanaka Pedro, iñaatziiri royaatakiri yotaarewo retako-perotani Jesús, ontsiroka-kariri Jesús roweyaanta-naawo rowaeyani, rojampita-kiriranki, ikantziri: "¿Pinkathari, itzimikama pithoka-shitemini?" <sup>21</sup>Ikanta iñaawakiri Pedro irika impoeta-paentsiri, rojampita-nakiri Jesús: "Pinkathari, ¿iitaka awiji-moterini?" <sup>22</sup>Ikantzi Jesús: "Arimi nokoyimi aritaki omatakyami rañahaemi irika, roojatzi nopyan-teeyaari paata, ¿teemaeta okowa-perotyaa piyotero iroka? Poyaatena eeroka." <sup>23</sup>Okanta paata othonka iyatakoyitanaki iroka ikantakiri Jesús, ikemayitakiro maawoeni noyemijantzinkaritepaeni, roshiya-kaantzi eero ikamitaa irika yotaarewo. Roo kanteencha tee ikantziri: "Ari nokoyi..." tema ikantatzii: "Arimi nokoyimi, aritaki omatakyami rañahaemi irika, roojatzi nopyan-teeyaari paata, ¿teemaeta okowa-perotyaa piyotero iroka?"

<sup>24</sup>Naakataki kenkithatakoteenchari nokantaki "irika yotaarewo," tema naaka ojankinata-kirori iroka jankina-rentsi. Rootaki ayoperotan-taari omaperotatyaa iroka.

<sup>25</sup>Tee nonkenkithatakotziro maawoeni rantayitakiri Jesús, tema osheki okaatzi. Arimi ojankinata-koyityaami maawoeni, kimitaka arimi awijanakiro maawoeni kepatsi opiyotyaa jankina-rentsi-paeni. Ari okantyaaari.